

# Dižə' Güen Dižə' Cobə De'en Bzoj San Juannə'

Ben' naquə Xtižə' Diozən'  
golje' goque' beṇačh

**1** Catə' gwxe yežlyonə' bazoczə  
ben' naquə Dižə'anə'. Zoe' len  
Diozən' na' ben' naquə Dižə'anə'  
ļeczə naque' Dioz. <sup>2</sup>Dezd nechte  
zoe' len Diozən'. <sup>3</sup>Na' Diozən' bene'  
par ničh ben' naquə Dižə'an bene'  
yoguə'əļoļ beṇačh, angl, bia chsa'aš,  
na' yeziqə'əchlə de'e zjəde. Bitobi  
bi de de'e gwxe de'e gwzil de'e  
cui ben le'. <sup>4</sup>Le' nse'e yeļə' mban  
zejlicane. Na' beṇə' ca' zjənapə'  
yeļə' mban zejlicane, yo'o be'eni'  
lo'o yichjla'aždao'oga'aque'enə'. <sup>5</sup>Na'  
ben' naquə Dižə'anə' nse'e be'eni'  
par yichjla'aždao' beṇačhən'. Na'  
la'aṇə'əczə chacchgua de'e malən'  
yežlyo nga gan' ble'enə', de'e malən'  
bito chgapə'an be'eni' che'enə'.

<sup>6</sup>Diozən' bsele'e to beṇə' le' Juan.  
<sup>7</sup>Bide' bedəye'e dižə' che ben' nsa'  
be'eni'inə' par ničh yoguə'əļoļ  
beṇačhən' guaquə so'onlilaže'e  
ben' nsa' be'eni'inə' catə' se'enene'  
xtižə' Juannə'. <sup>8</sup>Caguə Juan na'anə'  
nse'e be'eni'inə', sino bide' bedəye'e  
dižə' che ben' nsa' be'eni' par  
beṇačhən'. <sup>9</sup>Babžin ža bla' be'eni'  
che Diozən' yežlyo nga par šon

lo'o yichjla'aždao' beṇačhən', na'  
chse'eni'in len notə'əteze'.

<sup>10</sup>Ben' naquə Dižə'anə' gwzoe'  
yežlyon'. Na' la'aṇə'əczə len' bene'  
yežlyon', beṇə' ca' ža' yežlyon'  
bito gwsa'acbe'ine' non' naque'.

<sup>11</sup>Golje' entr neto' naquəto' beṇə'  
nasyon che'enə', na' casi yoguə'  
neto' naquəto' beṇə' nasyon  
che' bito gwyejle'eto' che'.

<sup>12</sup>Con beṇə' chse'ejle'e che', beṇə'  
chso'onlilaže'ene', chone' par ničh  
zjənaque' xi'in Dioz. <sup>13</sup>Zjənaque'  
xi'ine' caguə por ni che gwsa'alje'  
zjənaque' beṇə' belə' chen, na'  
caguə por ni che de'en gwzelažə'  
beṇə' byon' na' no'olə, na' caguə  
por ni che gone'e beṇə' byon' so  
xi'ine'. Dioz nan' bene' xi'ine'  
lega'aque'.

<sup>14</sup>Na' ben' naquə Dižə'anə' golje'  
goque' beṇačh na' gwzoe' len neto'.  
Ble'ito'one' na' gocbe'ito' de que  
naque' le'ezelaogüe beṇə' zaque'e  
la' len' naque' Xi'in tlišə' Xacho  
Diozən'. Lechguale nži'ilaže'e  
beṇačhən' na' chzejni'ine' beṇačhən'  
yoguə'əļoļ dižə' li che Diozən'.

<sup>15</sup>Juannə' bzejni'ine' che' gwne': —  
Che be'ena'anə' babi'a dižə' gwnia'  
de que ben' ze'e əchoj zaquə'əche'

ca nada', chedə' bazoczə le'enə' antslə ze'e soa' nada'.

<sup>16</sup>Na' Xi'in Diozən' laogüe de'en lechguale nzi'ilaza'e chio'o, zotezə zoe' chaclenchgüe' yoguə' chio'o chonlilažə'əchone'. <sup>17</sup>De'e Moisezən' bzejni'ine' de'e xaxtao' neto' beṇə' Izrael lei che Diozən', na' Jesocristən' bedəlo'e de que nzi'ilaza' Diozən' chio'o beṇəch na' chzejni'ine' chio'o yoguə'əloj dižə' li che Diozən'. <sup>18</sup>Ni to cui nonə' le'i Diozən'. Xi'ine' tlišə'ənə' ben' chaquene' chei babzejni'iczene' beṇəchən' can' naquə yichjla'aždao' Diozən'.

**Juan ben' bchoa beṇə' nis  
be'e dižə' che Jeso'osən'**

<sup>19</sup>Beṇə' blao che nasyon Izrael cheto'on ža' Jerosalennə' bososele'e bałə bpoz lao ben' le Juan len yebałə beṇə' gwsa'aljə lao dia che de'e Lebi beṇə' zjəyo'o lao na'aga'aque' so'one' mendad lo'o yo'odao' əblao che neto' beṇə' Izrael. Bososele'e beṇə' ca' lao Juannə' par nich gosə'ənezene' non' naque'. <sup>20</sup>Na' gože' lega'aque' clar: —Caguə nadan' Cristən' ben' naquən əselə' Diozən' par gaquəlene' nasyon che chio'o beṇə' Izraelən'.

<sup>21</sup>Na' gwse'ene': —¿Noxa le' ža? ¿əšə len' Liazən' ben' be' xtižə' Diozən' cana'?

Na' gože' lega'aque': —Caguə nada'anə'.

Nach gosə'əze'ene': —¿Ešə len' ben' naquən yidə par güe'elene' neto' xtižə' Diozən'?

Na' boži'en gwne': —Bitoczə.

<sup>22</sup>Nach gwse'ene': —¿Noxaczə le'? nich žjəyeyəžto' beṇə' ca'

bososele'ə' neto'. ¿Bi natgo' che cuino'?

<sup>23</sup>Nach gože' lega'aque': —Nada' naca' ben' chne zizjo latjə dašən', əṇia': “Le'eyoša' yichjla'ažda'olen' par nich əgwzenagle che Xanchon' catə'ən yide'enə'”, can' gwna de'e profet Isaiazən' ben' be' xtižə' Diozən' cana'.

<sup>24</sup>Na' beṇə' ca' ja'ac lao Juannə' bososele'ə' beṇə' fariseo ca' lega'aque'. <sup>25</sup>Na' gwse'ene': —¿Bixchen' chcho' beṇə' nis šə cui naco' Cristən', na' šə cui naco' Liazən' na' šə ni ben' naquən yidə par güe'elene' neto' xtižə' Diozən'?

<sup>26</sup>Na' Juannə' boži'e xtižə'əga'aque'enə' gože': —Nada' chchoa' beṇə' nis, pero na' entr le'e zo to beṇə' cui nombi'ale. <sup>27</sup>Be'enə' ze'e əchoje' na' zaquə'əche' ca nada' na' bito zaca'a par gaca' xmosə'.

<sup>28</sup>Yoguə' de'e quinga goquən yež de'en nzi' Betabara. Na' yežən' chi'in yešla'alə yao Jordannə' gan' chchoa Juannə' beṇə' nis.

**Jeso'osən' gwxaquə'əlebene' ca  
xilə' dao' ca' gwso'ot beṇə' Izrael  
ca' par gwnitlao xtołə'əga'aque'enə'**

<sup>29</sup>Beteyo ble'i Juannə' za' Jeso'osən' gan' zoe'enə' na' gože' neto' ža'ato'onə': —Le'e güiašc nga za' ben' bselə' Diozən' ben' gwxaquə'əlebe ca xilə' dao' bia ca' chotcho par chnitlao xtołə'əchon'. Le'enə' yeque'e xtołə' beṇəchən' con beṇə' so'onlilažə' le'. <sup>30</sup>Che bengan' bi'a dižə' catə'ən gwnia' de que ben' ze'e əchoj zaquə'əche' ca nada', chedə' bazoczə le'enə' antslə ze'e soa' nada'. <sup>31</sup>Bito gocbe'ida' nada' cate non' naque'.

Pero **na'a** za'a **chcho'a** **benə'** nis  
par **nich** **yeziquə'əchlə** **benə'** Izrael  
sa'acbe'ine' non' naque'.

<sup>32</sup>Na' Juannə' be'eche' dižə' **che**  
Jeso'osən' gwne': —Spirit **che**  
Diozən' de'en zo yoban' len Diozən'  
ble'ida' betjən ca to ngolbexə na'  
bžinən gwzon len Jeso'osən'. <sup>33</sup>Bito  
gocbe'ida' nada' non' naque' žalə'  
que Diozən' ben' bselə' nada' par  
chchoa' **benə'** nis gwne' nada':  
“Le'ido' yetj Spirit **chia'anə'** gan' zo  
ben' gon ca so Spirit **chia'anə'** lo'o  
yichjla'ažda'olen' na' **nabi'an** le'e.  
Na' catə' əžin Spirit **chia'anə'** gan'  
zo be'lenə', son len **le'.**” <sup>34</sup>Nada'  
babe'ida' goc can' gwne'lenə' na'  
cho'a dižə' de que bengan' Xi'in  
Diozən'.

**Benə' ca' gosə'ənaogüe'**  
**Jeso'osən' de'e neche**

<sup>35</sup>Ža beteyo zecha Juannə' len  
chopə neto' disipl **che'**. <sup>36</sup>Na' ble'ine'  
gwde Jeso'osən', na' gože' neto':  
—Le'e ggüiašc na' zda ben' bselə'  
Diozən' ben' gwxaquə'əlebe ca xilə'  
dao' bia ca' chotcho par chnitlao  
xtolə'əchon'.

<sup>37</sup>Na' **chopte** neto' gože' ca'  
jenaoto' Jeso'osən'. <sup>38</sup>Na' beyechj  
Jeso'osən' na' ble'ine' banaoto'one'.  
Na' gože' neto': —İBixchen' naole  
nada'?

Na' gožto'one': —Maestr, žga zo'?

<sup>39</sup>Nach gože' neto': —Le'e šo'o na'  
le'ile.

Na' gwyejlento'one' na' ble'ito'  
gan' zoe'lenə', na' bega'anlento'one'  
do yeto **chop** or, **chedə'** ca orən'  
banaquə ca do cheda tap.

<sup>40</sup>Nada' lena' Ndres **benə'** bišə'  
Simon Bedən' beneto' dižə' de'en

be' Juannə' na' gwnaoto' Jeso'osən'.

<sup>41</sup>Na' Ndresən' antslə ze'e gone'  
bichlə jəyeni'e Simon biše'lenə'  
na' gože'ene': —Babežaglaoto'  
Mesiasən'—, zeje dižə' Cristən'  
ben' gwlej Diozən' par gaquəlene'  
nasyon Izrael **cheton'**.

<sup>42</sup>Nach Ndresən' gwche'e Simon  
biše'lenə' gan' zo Jeso'osən'. Na' lao  
chgüia Jeso'osən' **le'** gože'ene': —  
Len' Simon xi'in Jonas. Pero yesə'əsi'  
**benə'** le' Sefas—, zeje dižə' Bed.

**Jeso'osən' gwleje' Lipən' na'**  
**Natanaelən' par əžja'aclene' le'**

<sup>43</sup>Beteyo Jeso'osən'  
gwchoglaogüe'len yeyeje' Galilean',  
na' bežague' Lipən' na' gože'ene': —  
Yo'o len nada'.

<sup>44</sup>Lipən' naque' **benə'** Betsaida,  
laž Ndresən' na' laž Bedən'. <sup>45</sup>Nach  
Lipən' bežague' Natanaelən' na'  
gože'ene': —Babežaglaoto' ben' bzoj'  
Moizezən' xtiže'e le'e **libr** ca' gan'  
**lecza** bzoje' lein', na' **che** **lecze'**len  
boso'ozoj **benə'** ca' gwso'e xtižə'  
Diozən' cana'. Len' Jeso'osən' **benə'**  
Nasaret, xi'in Jwsen'.

<sup>46</sup>Na' gož Natanaelən' **le'**: —İBat  
benecho Nasaret na' əchoj **benə'**  
güen?

Na' gož Lipən' **le'**: —Yo'o **nich**  
**ənezdo'**.

<sup>47</sup>Na' catə' Jeso'osən' ble'ine'  
bachžin Natanaelən' baozə, gwne'  
**che'**: —Na' za' to **benə'** Izrael gwlaž  
**checho** ben' naquə **benə'** güen, na' ni  
latə'əzə cui naque' **benə'** goxoayag.

<sup>48</sup>Na' gož Natanaelən' **le'**: —İNac  
chac nombi'o nada'?

Na' Jeso'osən' gože'ene': —Antslə  
ze'e əne' Lipən' le', catə'an zecha'o  
xan yag yixgüionə', ble'ida' le'.

<sup>49</sup>Nach Natanaelən' gože'ene': — Maestr, len' naco' Xi'in Dioz. Len' naco' Rei ben' chbezəto' yedəṇabia' neto' beṇə' Izrael.

<sup>50</sup>Na' Jeso'osən' gože'ene': — ĩEpor ni che de'en gwnia' de que ble'ida' le' xan yag yixgüion' chejli'o de que Diozən' gwleje' nada' par gaquəlena' nasyon chechon' ža? De'e zaquə'ache ca de'e nga ze'e za'ac.

<sup>51</sup>Nach Jeso'osən' goze'e neto': — De'e li əchnia' le'e, le'ixejele yoban' gan' zo Diozən' na' angl che' ca' əse'ep se'etje' yežlyo nga gan' zoa', la' Dioz nan' bsele'e nada' golja' beṇəch.

**Gotə' to yelə' gošagna' yež  
de'en nzi' Cana**

**2** Gwde šonə ža nach gotə' to yelə' gošagna' yež de'ena' nzi' Cana distrit che Galilea, na' gwyey xna' Jeso'osən'. <sup>2</sup>Na' leczə gwsa'axe' Jeso'osən' len neto' disipl che' nich gwyeyto' gan' chac yelə' gošagna'anə'. <sup>3</sup>Na' caguə goque binon' par əse'ej yoguə' beṇə' ca' ža'anə'. Nach xna' Jeso'osən' gože'ene': — Bito bi bino dech chega'aque'.

<sup>4</sup>Na' gož Jeso'osən' le': — Nagüe, ĩbixchen' chi'o nada' ca'? Ze'e əžin or gaquəlena' beṇə' quinga.

<sup>5</sup>Na' xne'ena' gože' beṇə' ca' chso'on mendadən': — Le'e gon bitə'ətezə de'e əne'.

<sup>6</sup>Na' nitə' xop yej ga chož nis. Yej ca' zjənac ca' choso'očin beṇə' Izrael gwlaž cheto' ca' par chsa'a chəsə'əyib cuinga'aque' segon can' na lei cheto'onə'. Na' to to yej ca' chožən do xon' che'e o do ši che'e

nisən'. <sup>7</sup>Na' gož Jeso'osən' beṇə' güen mendad ca': — Le'e yosša' yej ca' nisən'.

Na' gosə'əgue'en xte ca gosə'əža'an. <sup>8</sup>Nach goze'e lega'aque': — Le'e gašə' latə'an na'a, na' le'e žjənežjon' be'en chgüe'ej chguaon'.

Nach gwsa'aše'en jəsə'ənežjue'en be'en chgüe'ej chguaon'. <sup>9</sup>Na' bnix be'en nisən' banaquən bino, pero bito gwnezene' ga gwza'anṇə', con beṇə' ca' gwsa'ašə' len na' zjəneze. Nach goxe' ben' chšagna'anə' <sup>10</sup>na' gože'ene': — Yoguə' beṇə' chdie' zgua'atec bino šao', na' catə' beṇə' ca' ža'anə' bazjəne'ejə' zilən', nach cho'e lega'aque' de'e corrient. Pero na' le' bzago'o bino šao' nga xte na'ach.

<sup>11</sup>De'e nga ben Jeso'osən' Cana distrit che Galilean' goquən miłagr nech de'en bene' par blo'e de que nse'e yelə' guac che Diozən'. Na' neto' disipl che' benliłaza'əto'one'.

<sup>12</sup>Gwde na' gwyeyto' Capernaum len le' na' len xne'ena' na' beṇə' biše'e ca'. Na' jəsoto' na' to chopə šonə ža.

**Jeso'osən' bebeje' beṇə' ca' chso'on  
ya'a chy'o yo'odao' əblaonə'**

<sup>13</sup>Na' bazon galə' lni pascw che neto' beṇə' Izrael catə'an gwyeyto' len Jeso'osən' Jerosalennə'. <sup>14</sup>Catə' bžinto' chy'o yo'odao' əblao che neto' beṇə' Izrael na' ža' beṇə' chəsə'yəyotə' go'on na' xilə' na' ngolbexə, na' len beṇə' ca' zjəchi' choso'oše'e mech. <sup>15</sup>Nach Jeso'osən' bene' to sot de do na' bebeje' yoguə'əloł beṇə' ca' ža' chy'o che yo'odao' əblaonə' len xilə' ca', len

go'oṅ ca'. Na' beslase' xmech beṅə' goša' mech ca', na' gwlo'oni'ane'e mes chega'aque' ca'. <sup>16</sup>Na' gože' beṅə' ca' chso'otə' ngolbexən': — Le'e yebej yoguə'əloḷ bia quinga nga. Cui gonle ya'a nga liž Xa'anə'.

<sup>17</sup>Nach jəyeza'alažə' neto' disipl che' can' nyoj Xtižə' Diozən' gan' nan: “De'e tant chil' yichja' che liž'onə' xte cheyožlaža'a.”

<sup>18</sup>Na' beṅə' ca' zjənaquə beṅə' blao che nasyon Izrael cheto'on ža'anə' gwse'ene': — İBi yeḷə' guac əgwlo'ido' neto'onə' par niç ənezeto' šə napo' yeḷə' gwnabia' par bebejo' beṅə' ca'?

<sup>19</sup>Na' Jeso'osən' gože' lega'aque': — Le'e yochinj yo'odao' nga na' šonə žazə yeyona'an.

<sup>20</sup>Nach beṅə' blao ca' gwse'ene': — Xopeyon iz gwso'one' yo'odao' nga, čəna' le' yeyono'on šonə žazə?

<sup>21</sup>Pero Jeso'osən' gwne' ca' che cuerp che'enə', chsa'aque'əlebene'en ca yo'oda'onə'. <sup>22</sup>Nach catə' bžin ža bebane' ladjo beṅə' guat ca', neto' disipl che' jəyeza'alažə'əto' can' gwne'enə'. Na' gwyejle'eto' can' na Xtižə' Diozən' de'en nyojən de que Jeso'osən' yebane' ladjo beṅə' guat ca', na' leczə gwyejle'eto' de'en gože' neto'.

**Jeso'osən' nezene' bin' yo'o lo'o yichjla'aždao' beṅəçən'**

<sup>23</sup>Žlac gwzo Jeso'osən' Jerosalennə' lao lni pascon', beṅə' zan gwso'onlilaže'ene' catə' besə'əle'ine' miḷagr ca' de'en bene'. <sup>24</sup>Pero na' Jeso'osən' bito ben cuine' lao na' beṅə' ca' čhedə' baneze nle'ine' yichjla'aždao' beṅəçən'. <sup>25</sup>Na' bito byažjene' no əgwzejni'i

le' can' naquə yichjla'aždao' beṅəçən' čhedə' le' nezene' bin' yo'o lo'o yichjla'aždao' to toe'.

**Jeso'osən' na' ben' le Nicodemo**

**3** Na' zo to beṅə' fariseo ben' le' Nicodemo. Na' naque' beṅə' blao che nasyon Izrael cheton'. <sup>2</sup>Nicodemon' gwyeje' lao Jeso'osən' še'elə na' gože'ene': — Maestr, nezetə' de que Diozən' bsele'e le' par chzejni'ido' neto', čhedə' la' notono no chac gon ca naquə miḷagr ca' chono' šə cui zo Diozən' len le'.

<sup>3</sup>Na' gož Jeso'osən' le': — De'e li əchnia' le' šə non' cui galjə yeto bito gaquə soe' ca nabia' Diozən' le'.

<sup>4</sup>Nach gož Nicodemon' le': — İNacxa gon to beṅə' galje' šə banaque' beṅə' golə? İEguaquəch yeyo'e lo'o le'e xne'e na' galje' yeto?

<sup>5</sup>Nach gož Jeso'osən' le': — De'e li əchnia' le', šə non' cui galjə len nis na' len Spirit che Diozən', bito gaquə soe' ca nabia' Diozən' le'. <sup>6</sup>Beṅə' zjənaque' belə' chen chəsə'əzan chəsə'əbeque' xi'inga'aque' leczə bi'i belə' chen. Beṅə' ca' chon Spirit che Diozən' par niç chsa'alje', Spiritən' chnežjon lega'aque' yeḷə' mban zejlicane. <sup>7</sup>Bitə yebando' can' gwnia' le' de que chonən byen galjə yoguə'əle yeto. <sup>8</sup>Ca naquə be'enə' de'en cheçhj, gatə'ətezə chene'en cheçhjən, na' chendo' cholən, na' nic nezdə' gaxa za'annə' na' nic nezdə' gaxa šejənnə'. Can' naquən che yoguə'əloḷ beṅə' chon Spirit che Diozən' par niç chsa'alje'.

<sup>9</sup>Nach Nicodemon' gože'ene': — İNacxa chactguan' par chac can' na'onə'?

<sup>10</sup>Na' Jeso'osən' gože'ene': —  
Le' naco' beṇə' blao entr beṇə'  
ca' choso'osed choso'olo'i beṇə'  
Izrael gwlaž checho ca' xtižə'  
Diozən', ɛəna' cui chejni'ido' de'e  
ngan'? <sup>11</sup>De'e li əchnia' le', de'e  
nezetə'onə' chyixjue'eto' na' de'e  
bale'ito'onə' cho'eto' dižə' chei,  
na' cui chzenagle. <sup>12</sup>De'en chac  
yežlyo ngan' bagwnia' le'e na' cui  
chejle'ele. ɛNacxa gaquən' šejle'ele  
šə nia' le'e de'en chac yoban'?

<sup>13</sup>Ni to beṇə' cui zo yežlyo nga  
beṇə' babeyep yoban' par nezene'  
can' chac yoban'. Pero ca naca'  
nada' ža, gwzəo' yoban' len Diozən'  
na' bsele'e nada' yežlyo nga par  
golja' beṇəch, na' zotezə zoa' len  
Diozən' ben' zo yoban'. De'e na'anə'  
neзда' can' chac yoban'. <sup>14</sup>Na' can'  
gwlis de'e Moisezən' bel de bronsən'  
to le'e yag latjə dašən', can' cheyalə'  
yesə'əlise' nada' to le'e yag, nadan'  
bsele' Diozən' golja' b'əṇəch. <sup>15</sup>Na'  
gaquə chia' ca' par niçh notə'ətezə  
beṇə' gonlilažə' nada' bito cuiayi'e,  
sino gatə' yelə' mban zejlican' che'.

#### Chaque Diozən' che beṇəchən'

<sup>16</sup>Lechguale chaque Diozən'  
che chio'o beṇəch na' beṇ Xi'ine'  
tlišə'ənə' par niçh na' notə'ətezcho  
chonlilažə'əchone' bito cuiayi'icho  
mas de yelə' mban zejlicane' checho.  
<sup>17</sup>Diozən' bsele'e Xi'inən' yežlyo nga  
caguə par niçh əchoglaogüe'en che  
chio'o beṇəch de que napcho dolə',  
sino par niçh gone' ca cui yeyejcho  
lao yi' gabilən'.

<sup>18</sup>Chio'o chonlilažə'əcho Xi'in  
Diozən' baçh nchoglaon' checho de  
que bito bi dolə' napcho, pero beṇə'  
cui chso'onlilažə' le' nchoglaon

cheqa'aque' de que zjənapə'  
dolə' chedə' bito chso'onlilažə'e  
Xi'in tlišə' Diozən'. <sup>19</sup>Can' chac,  
beṇə' ca' cui chso'onlilažə' le'  
bançhoglaon' cheqa'aque' de que  
zjənapə' dolə', por ni che de'en  
babidə Xi'in Diozən' yežlyon'  
nse'e be'eni' par yichjla'aždao'  
beṇəchən', na' chəsyə'əbeichene'  
de'e žchołən' cle ca be'eni' che'enə'  
chedə' chso'one' de'e malən'.  
<sup>20</sup>Beṇə' ca' chso'on de'e malən'  
chəsa'əgue'ine' be'eni' che'enə', na'  
bito chse'enene' əgwse'eni'in lo'o  
yichjla'ažda'oga'aque'enə', chedə'  
bito chse'enene' la'alaon de que  
de'e malən' chso'one'. <sup>21</sup>Caguə ca'  
chio'o chzenagcho che dižə' li che  
Diozən' par choncho can' cheyalə'  
goncho. Chio'o cho'echo latjə  
chse'eni'in lo'o yichjla'ažda'ochon'  
chedə' chene'echo goncho ca  
sa'acbe'i beṇə' de que Diozən'  
chaclene' chio'o len bi de'en  
chonchon'.

#### Juan ben' bçhoa beṇə' nis be'e dižə' che Jeso'osən' de'e yoblə

<sup>22</sup>Gwde na' neto' disipl gwyejto'  
len Jeso'osən' yež dao' ca' zjəchi'  
gan' mbane Jodean'. Na' žlac  
bega'antə'onə' Jeso'osən' bene'  
par niçh neto' bçhoato' beṇə' nis.  
<sup>23</sup>Na' Juannə' leczə chçhoe' beṇə'  
nis yež de'en nzi' Enon de'en chi'  
gałə'əzə yež Salim, gan' dechgua  
nis. Na' ja'ac beṇə' na' gosə'əchoe'  
nisən'. <sup>24</sup>Cana' bitonə' gatə' Juannə'  
ližyan'.

<sup>25</sup>Na' gotə' to bžaš entr disipl che  
Juannə' na' entr yeto' çhopə beṇə'  
Izrael gwlaž cheto' ca' che de'en  
chəsa'əçhoe' beṇə' nis. <sup>26</sup>Na' disipl

che Juannə' ja'aque' laogü'e'enə'  
na' gwse'ene': —Maestr, ben' gwzo  
len le' yešl'a'alə yao Jordannə', ben'  
cho'o xtiž'e, le' bachchoe' beṇə'  
nisən' na' yoguə'əzə beṇə' chja'ac  
ga'an zoe'enə'.

<sup>27</sup>Nach Juannə' gože' lega'aque':  
—Notono no əye'elao' šə cui gon  
Diozən' par nič so'elao' beṇə'  
le'. <sup>28</sup>Le'e nezele can' bagwnia'  
de que bito naca' nada' Cristən'  
ben' bsele' Diozən' par gaquəlene'  
ṇasyon chechon'. Nada' naca' ben'  
bsele' Diozən' par cho'a xtižə'  
Cristən' nič ṇita' beṇə' probnid  
par yoso'ozenague' che' catə'ən  
yide'enə'. <sup>29</sup>Catə' chəsə'əšagna'  
beṇə', beṇə' byo ben' chšagna'  
le'enə' chzi'e no'olən'. Na' beṇə'  
migw che ben' chšagna'anə', zechē'  
cuite'enə' chebeichgüeine' chenene'  
chšil ben' chšagna'anə'. Ca'aczn'  
chac len nada' ža, lechguale  
chebeida' de'en chso'elao' beṇə'  
Cristən'. <sup>30</sup>La' le'enə' cheyalə'  
šejəchlə gague' beṇə' blaoc; pero ca  
naquə nada', šejəchlə te chia'.

#### Ben' za' gan' zo Diozən'

<sup>31</sup>Ca naquə ben' za' gan' zo  
Diozən', le' naque' blaoc ca  
notə'ətezəchlə beṇə'. Na' ca naquə  
notə'ətezəchlə beṇə' ža' yežlyo nga,  
be'en che yežlyo nga zjənaque' na'  
xtižə' yežlyo ngan' chso'e. Pero na'  
ben' za' gan' zo Diozən', le' naque'  
beṇə' blaoc ca notə'ətezəchlə  
beṇə'. <sup>32</sup>Le' cho'e dižə' che de'en  
babe'ine' gan' zo Diozən' na' che  
de'en babenene' na', na' notono  
no chzenag xtiž'e'enə'. <sup>33</sup>Na' šə  
non' choso'ozenag xtižə' ben' za'  
gan' zo Diozən' choso'olo'e de que

zjəneze' Diozən' cho'e dižə' li.

<sup>34</sup>Na' Xi'in Diozən' ben' bsele'enə'  
cho'e xtižə' Diozən' chedə' Diozən'  
chone' par nič zotezə zo Spirit  
che'enə' len le' dote tyemp.

<sup>35</sup>Diozən' chaquene' che Xi'ine'enə'  
na' babene' ca chejni'ine' yoguə'əlo'  
par nič le' əgwzejni'ine' beṇə'chən'.

<sup>36</sup>Na' chio'o chonlilažə'əcho  
Xi'in Diozən' de yelə' mban  
zejlicane checho. Na' beṇə' ca'  
chso'onczə yichjlaoga'aque' cui  
chso'onlilažə'ene', bito gatə' yelə'  
mban zejlicane chega'aque' sino  
yesə'əzi'e castigw zejlicane.

#### Jeso'osən' be'e dižə' len to no'olə Samaria

**4** Na' beṇə' fariseo ca'  
gwsa'acbe'ine' de que beṇə'  
zanch jəsə'ənaogüe' Jeso'osən' cle  
ca Juannə' na' de que beṇə' zanch  
chchoe' nis cle ca Juannə'. <sup>2</sup>Pero  
caguə cuin Jeso'osən' bchoe'  
lega'aque' nis sino neto' disipl  
che' bcho'ato' beṇə' nis. <sup>3</sup>Na' ca  
naquən' gwneze Jeso'osən' can'  
bagwsa'acbe'i beṇə' fariseo ca' de  
que beṇə' zan zjəsə'ənao le' nach  
beza'ato' distrit che Jodean' na'  
beyejto' distrit che Galilean'.

<sup>4</sup>Par bežinto' Galilean' bedeto'  
distrit che Samaria na'alə. <sup>5</sup>Ca'  
goquən' bežinto' to yež de'e nzi'  
Sicar distrit che Samaritan'. Naquə  
yežən' galə'əzə len yežlyon' de'en  
bnežjw de'e Jacobən' de'e xi'ine'  
Jwsen'.

<sup>6-8</sup>Na' žia to pos na' de'e nzi' "Pos  
che de'e Jacobən'". Jeso'osən' bach  
chjxaque'ene' ngüe'e nezən' na'  
gwchi'e cho'a posən'. Bach naquə  
ca do gobiž. Na' neto' gwyejto' lao'



yežən' par si'tito' de'e gaoto'. Na' bžin to no'olə Samarian' par güe'e nis, na' Jeso'osən' gože'ene': —Doa' latə' nis ye'ēja'.

<sup>9</sup>Na' no'olə Samarian' gože'ene': —¿Nactecxan' le' naco' beṇə' Izrael chṇabdo' nada' nis ye'ejo'? len no'olə Samaria nada'—. (Ca naquə beṇə' Izrael gwlaž čheto' ca' bito chəsə'əṇe' beṇə' Samaria ca'.)

<sup>10</sup>Na' Jeso'osən' gože'ene': —Žalə' ṇezdo' de'en chene'e Diozən' gōṇe' le' na' žalə' chacbe'ido' non' naca' nada' chapa'a le': “Doa' latə' nis ye'ēja'”, le' əṇabdo'on nada' na' nada' gōṇa' le' nis de'e choṇ yełə' mban zejlicane.

<sup>11</sup>Na' no'olən' gože'ene': —Señor, caguə noxo'o bi gašə'ədo'onṇə' na' pos nga naquən zitjw. ¿Gaxa si'o nis de'en choṇ yełə' mban zejlicane de'en nao' ca'? <sup>12</sup>¿Echacdo' de que zaquə'əcho' le' ca de'e xaxta'ocho Jacobən' ben' bocua'an len neto' pos nga ga güe'ėje' na' xi'ine' ca' na' bia yixə' che' ca'?

<sup>13</sup>Na' gož Jeso'osən' le': —Notə'ətezə beṇə' ye'ej nis nga bia'aczə əbiləchene'en de'e yoblə. <sup>14</sup>Pero na' notə'ətezə beṇə' ye'ej nisən' de'en əgwnežjua' nada' cuatəch əbilene'en la' gatə' yełə' mban zejlicane che'enə'. Na' nis de'en əgwnežjua'ane' gaquən lo'o yichjla'aždaogüe'en ca to nis de'e chxitə' chžia chaldin na' de'e cuat yebizən.

<sup>15</sup>Na' no'olən' gože'ene': —Señor, beṇ nada' nisən' nao' ca' par niç cuich əbilda' na' cuich yida' dexia'an nga.

<sup>16</sup>Jeso'osən' gože'ene': —Beyej jəyene be'en chio'onə' na' le'e da nga.

<sup>17</sup>Nach gož no'olən' le': —Notono be'en chia' zo.

Na' gož Jeso'osən' le': —Leiczədo' can' nao' de que notono be'en chio' zo, <sup>18</sup>la' gueyə' be'en chio' bagwnitə' beṇə' nšagna'aleno', na' ca naquə ben' zoleno' ṇa'a caguə nšagna'aleno'one'enə'. De'e li can' bagwnao'.

<sup>19</sup>Na' gož no'olən' le': —Señor, bachache'ida' de que le' chyixjue'ido' bi de'en na Diozən'. <sup>20</sup>De'e xaxta'o neto' beṇə' Samaria gwso'elaogüe'e Diozən' ya'an zo na', na' le'e nale de que Jerosalen na'anə' cheyałə' güe'ela'ocho Diozən'.

<sup>21</sup>Na' gož Jeso'osən' le': —No'olə, gwyejle' chia' de que gwžin ža catə' bitoch gonən byen žje'ela'ole Xacho Diozən' ya'an zo na' na' ni Jerosalenṇə'. <sup>22</sup>Le'e nacle beṇə' Samaria bito nombia'ale ben' chejṇi'alažə'əle. Neto' beṇə' Izrael nombi'ato' Diozən' ben' chejṇi'alažə'əto'. Na' entr neto' beṇə' Izrael əchoj ben' chac yebej beṇəchən' xni'a de'e malən'. <sup>23</sup>Gwžin ža na' ṇa'a baza'an beṇə' ca' chse'ejṇi'alaže'e Xacho Diozən' can' chazlaže'enə' əso'elaogüe'ene' do yichj do lažə'əga'aque' na' segon de'en naquə de'e li, chedə' Xacho Diozən' chyilje' beṇə' əso'elao' le' ca'. <sup>24</sup>Diozən' bito naque' beṇə' belə' chen. Na' beṇə' ca' chse'ejṇi'alaže'e le' cheyałə' so'elaogüe'ene' do yichj do lažə'əga'aque' na' segon de'en naquə de'e li.

<sup>25</sup>Na' gož no'olən' le': —Nezda' de que yidə ben' gwlej Diozən' par gaquəlene' chio'o, ben' nzi' Mesias o Crist. Catə' yide' na' chixjue'ine' chio'o yoguə'əloł de'e quinga.



<sup>26</sup>Nach Jeso'osən' gože'ene': — Nada'an naca' ben' nao' ca' na' cho'elena' le' dižə'.

<sup>27</sup>Na' lei cho'elene' no'olən' dižə' catə' bežin neto' disipl che'. Na' bebaneto' de'en cho'elene' to no'olə dižə' pero ni toto' cui gwɲabeto'one' bi dižə'an cho'elene' no'olən' o bixçhen' chšillene'ene'. <sup>28</sup>Nach no'olən' bcua'an che'e che'enə' na' beyeje' yežən' jəyeže' beṇə' gwlaž che' ca': <sup>29</sup>—Leda legüia to beṇə' bagwne' nada' yoguə'əte de'en babena'. ĩšə bengalizən' Cristən'?

<sup>30</sup>Na' besə'əžaše' yežən' ja'aque' gan' zo Jeso'osən'. <sup>31</sup>Žlac zjəyeda no'olən' gotə'əyoito' Jeso'osən' che'eto'one': —Maestr, gwdao.

<sup>32</sup>Na' Jeso'osən' gože' neto': — Bito nezele de to yelə' guao chia'.

<sup>33</sup>Nach gwnato' entr neto': —ĩšə nolizə babedegua' de'e gwdaogüe'enə'?

<sup>34</sup>Na' gož Jeso'osən' neto': —Par nada' naquən ca to yelə' guao chona' can' chene'e ben' əbselə' nada' niç gaquə yoguə' de'en chene'ene' gaquə. <sup>35</sup>Le'e nale: “Ñe'e dech yetap bio' par yedobə cwsešən'.” Na' nada' əchnia' le'e, de yeto cwseš de'e cheyałə' yedobə, beṇə' ca' yoso'ozenag che Diozən' šə güe'elenchga'acchone' xtiže'enə'. Legon xbab de que bagolə gatə'əyoiga'aquechone' yoso'ozenague' che'. <sup>36</sup>Ben' chon par niç beṇə' choso'ozenague' che Diozən' chaclene' beṇə' par niç chəsə'əzi'e yelə' mban zejlicane. Na' Diozən' chone' ca zoe' mbalaz por ni che de'en chaclene' lega'aque'. Can' chac, ben' chyixjui'e xtižə' Diozən' de'e neche na' ben' chon

par niç beṇə' choso'ozenague' chei txennə' chəsyə'əbeine'. <sup>37</sup>De'e li can' na dižə'an de'en de: “Beṇə' yoblən' chaz na' beṇə' yoblən' chelap.”

<sup>38</sup>Nada' baçh chselə'a le'e ca beṇə' yesyə'əlapə' gan' cui gwso'one' žin. Beṇə' yoblə bagosə'əyixjui'e xtižə' Diozən' na' le'e gonle par niç beṇə' ca' gwse'ene'ne' xtiže'enə' yoso'ozenague' chei.

<sup>39</sup>Na' zan beṇə' ža' lao' yež Sicarən' gan' mbane Samaritan' gwso'onlilaže'e Jeso'osən' por ni che de'en gwna no'olən': “Bagwne' nada' yoguə'əte de'e babena'.”

<sup>40</sup>Na' cata' besə'əžin beṇə' Sicarən' gan' zoe'enə' gwsa'atə'əyoine' Jeso'osən' yega'ane' len lega'aque', na' bega'ane' çhopə ža. <sup>41</sup>Na' beṇə' zanch gwso'onlilaže'ene' por ni che dižə' de'en be' cuin Jeso'osən'. <sup>42</sup>Na' gwse'e no'olən': —Na'a chonlilažə'əto'one' caguə por ni che de'en gwnao' na'azən' sino por ni che de'en babeneto' cho'e dižə' cuinczəto'. Baņezetə' de que de'e liczə bengan' Cristən' ben' gwlej Diozən' par yebeje' beṇaçhən' xni'a de'e malən' con beṇə' se'ejle'e che'.

**Jeso'osən' beyone' xi'in to beṇə' blaö**

<sup>43</sup>Na' cata' goc çhopə ža zoto'onə', beza'ato' beyejto' Galilean'. <sup>44</sup>Na' cuin Jeso'osən' bagwnacze' de que beṇə' gwlaž che notə'əteze profet beṇə' cho'e xtižə' Diozən' bito chso'ene' yelə' bala'an na' nic chse'ejle'e che'. <sup>45</sup>Pero na' cata' bežinto' Galilean', beṇə' Galilea ca' besyə'əbeine' na' bosə'ozenague' che Jeso'osən' chedə' leczə' lega'aque' ja'aque' Jerosalenṇə' par lni pascon' na' besə'əle'ine' yoguə'

de'e güen de'en bene' bedote lao  
l̄ninə'.

<sup>46</sup>Na' gozejto' len Jeso'osən' yetš'i'i  
yež Canan' distrit che Galilean'  
gan' bene' par ničh beyac nisən'  
bino. Na' yež Capernaunnə' zo to  
beṇə' blao beṇə' chon žin che rein'  
na' chacšenchgüei xi'ine'enə'. <sup>47</sup>Xa  
bi'inə' catə' benene' rson bežinto'  
Galilean' zeza'ato' Jodean', bide' lao  
Jeso'osən' na' gotə'əyoine' le' šeje'  
žjəyeyene' xi'ine'enə', chedə' bazon  
gatbo'. <sup>48</sup>Na' Jeso'osən' gože'ene':  
—Šə cui le'ile miłagr na' bichlə de'e  
zaquə' yebanele, bito šejle'e'le chia'.

<sup>49</sup>Nach ben' chon žin che rein'  
gože' le': —Señor, yo'ošga antslə  
cuinə' gat bi'i chia'anə'.

<sup>50</sup>Na' Jeso'osən' gože'ene': —  
Beyej. Bito gat bi'i chio'onə'.

Nach gwyejle' be'lenə' de'en gož  
Jeso'osən' le' na' beze'e. <sup>51</sup>Na' lao  
bazengüe'e nezən' jəsə'əšag xmosə'  
ca' le' na' gwse'ene': —Bacheyaque  
bi'i chio'onə'.

<sup>52</sup>Nach gwṇabene' lega'aque' bi  
or gwzolao beša'alazə'əbo'. Na'  
lega'aque' gwse'ene': —Neje cheda  
to gobiž bechojbo' de'e lan'.

<sup>53</sup>Nach xabo'onə' gocbe'ine'  
or na'anə' gož Jeso'osən' le' de  
que bito gat bi'i che'lenə'. Nach  
benlilaže'e Jeso'osən', le' na'  
family che'lenə' na' yoguə' beṇə' ža'  
liže'lenə'.

<sup>54</sup>De'e nga goc chop las ben  
Jeso'osən' miłagr catə' ze'e beze'e  
Jodean' na' bežine' Galilean'.

**Jeso'osən' beyone' to beṇə'  
nat to part cuerp che'lenə'**

**5** Gwdenə' golə' to l̄ni che neto'  
beṇə' Izrael Jerosalennə' na'

gwyej Jeso'osən'. <sup>2</sup>Jerosalen na'  
žia to tanc de'en nzi' Betesda dižə'  
ebreo. Žian galə'əzə cho'a puert  
che syodan' de'en nzi' “Che xilə'  
ca’”. Na' nyechj mbi'i cuit cue'ej  
tanquən' gueyə' ca cha'ašil dao'.

<sup>3</sup>Na' beṇə' zan beṇə' güe' zjəde'  
lo'o cha'ašil da'onə', no beṇə' l̄chol,  
beṇə' coj, na' no beṇə' zjənat to  
part güejə cuerp chega'aque'enə'.  
Zjədie' chəsə'əbeze' batə'əquən'  
ta nisən'. <sup>4</sup>To angl betje' tgüejə  
bte' nisən', na' con beṇə' chyobe  
chetj lo'o nisən' catə'ən cheyož  
chta anglən' len, le'lenə' cheyaque  
che bitə'ətezə yižgüe' de'e che'ine'.

<sup>5</sup>Na' entr beṇə' ca' len to beṇə' byo  
bagoc ši'inšonəchoa iz chacšenene'.

<sup>6</sup>Na' Jeso'osən' ble'ine' be'lenə'  
na' gocbe'ine' de que bagwža de'  
ca'. Na' gože'ene': —¿Eche'endo'  
yeyacdo'?

<sup>7</sup>Na' beṇə' güe'lenə' gože'ene':  
—Señor, caguə no beṇə' zo cue'e  
nada' lo'o tanquən' catə'ən chda  
nisən'. Na' žlacte əzya'a nada' par  
šo'a, beṇə' yoblə chyobene' chetje'  
lo'o nisən'.

<sup>8</sup>Nach gož Jeso'osən' le': —Gwyas  
na' botobə xta'onə' na' gwda.

<sup>9</sup>Na' le'e beyactei be'lenə' na'  
botobe' xte'lenə' na' gwzolao chde'.  
Goc de'lenə' ža dezcanz. <sup>10</sup>Nach beṇə'  
blao che neto' beṇə' Izrael gwse'e  
ben' beyaquen': —Ža dezcanz na'a.  
Bito de lsens yeyoa' xta'onə'.

<sup>11</sup>Nach gože' lega'aque': —Ben'  
beyone nada' gože' nada': “Botobə  
xta'onə', beyoa'an na' gwda.”

<sup>12</sup>Na' gwse'ene': —¿Noxan' gož  
le': “Botobə xta'onə' na' gwda”?

<sup>13</sup>Na' ben' beyaquene' bito nezene'  
non', chedə' Jeso'osən' babebi'ize'e

gan' ža' beṇə' zan ca'. <sup>14</sup>Gwdechla bedil Jeso'osən' le' lo'o yo'odao' əblaonə' na' gože'ene': —Bač beyacdo' ṇa'a. Bitoch bi de'e mal gono' par nič cui gac čhio' to de'e maləch.

<sup>15</sup>Nach beza' be'ene' na' gwɔdixjue'ine' beṇə' blao che ṇasyon Izrael čheto'on de que Jeso'os na'anə' beyone le'. <sup>16</sup>Na' de'e na'anə' beṇə' blao ca' bosolagzeje' bosolagzide' Jeso'osən' chəsə'yiljlaže'e naclən' so'one' par so'ote'ene' de'en bene' miłagr ca' ža dezcanzən'. <sup>17</sup>Na' Jeso'osən' gože' lega'aque': —Xa'anə' chelalene' yoguə' ža, na' leczə ca' nada'.

<sup>18</sup>Nach beṇə' blao che ṇasyon čheto'on mazəchlə gosə'yiljlaže'e naclən' so'one' par so'ote'ene' por ni che de'en gwne' de que Diozən' naquə Xe', caguə tloazə de'en cui bembə'ane' ža dezcanz na'anə'. Na' de'en gwne' de que Diozən' naque' Xe' zejen de que tozəczə can' zaque'e len Diozən'.

#### Yelə' chnabia' che Xi'in Diozən'

<sup>19</sup>Na' gož Jeso'osən' lega'aque': —De'e li chnia' le'e, bito gaquə bi gona' to gwłazza', nadan' naca' Xi'in Diozən'. De'en chle'ida' chon Xa'anə', lenṇə' chona'. Yoguə'əloł de'en chon Xa'anə', leczə lenṇə' chona'. <sup>20</sup>Xa'anə' chaquene' čhia', na' chlo'ine' nada' yoguə' de'en chon cuine'. Na' əgwlo'ine' nada' de'e zaquə'əch ca de'e quinga de'e gona' par nič yebanele. <sup>21</sup>Xa' Diozən' chbeje' beṇə' na' chone' ca chatə' yelə' mban zejlicane čhega'aque' par nič cui əsa'aque' ca beṇə' guat len

yichjla'ažda'oga'aque'ene'. Na' ca'aczən' chona' nada' naca' Xi'ine', chbeja' beṇə' par chnežjua' yelə' mban zejlicane čhega'aque'. <sup>22</sup>Bito chčhoglao Xa' Diozən' che ni to beṇə' šə nape' dolə', sino babene' nada' yelə' chnabia'anə' par əchoglaogua'an che beṇə'chən' šə non' napə dolə'əne', nadan' naca' Xi'ine'. <sup>23</sup>Xa' Diozən' chene'ene' de que yoguə'əloł beṇə' so'one' nada' yelə' bala'an can' chso'e le' yelə' bala'an. Ben' cui choṇ nada' naca' Xi'in Dioz yelə' bala'an, lente Xa' Dioz na'anə' cui cho'e yelə' bala'an, čhedə' len' bsele'e nada'.

<sup>24</sup>De'e li chnia' le'e, ben' chzenag xtiža'anə' na' chonlilaže'e Diozən' ben' əbselə' nada' de yelə' mban zejlicane che'. Na' cuat si'e castigon', čhedə' bitoch naque' len yichjla'aždaogü'e'en ca beṇə' guat, sino bade yelə' mban zejlicane che'. <sup>25</sup>De'e li chnia' le'e gwžin ža catə'ən beṇə' ca' zjənaque' len yichjla'ažda'oga'aque'ene' ca beṇə' guat əse'ene' xtiža'a nada' Xi'in Dioz, na' beṇə' ca' yoso'ozenag čhia' yesə'əbane' zejlicane. Na' bač chzola'o chac ca' ṇa'a. <sup>26</sup>Xa' Diozən' nse'e yelə' mban zejlicane na' chac gwnežjue'en beṇə'chən', na' ca'aczə babene' par nič nada' nsa'a yelə' mban zejlicanen' na' chac chnežjua'an che beṇə'chən', nadan' naca' Xi'ine'ene'. <sup>27</sup>Na' leczə bene' nada' yelə' chnabia'anə' par nič əchoglaogua'an non' napə dolə' čhedə' bsele'e nada' golja' beṇə'ch. <sup>28</sup>Bito yebanele de'e nga. Gwžin ža catə' yoguə'əloł beṇə' guat ca' ža' lo'o ban' əse'ene' əṇia' lega'aque'. <sup>29</sup>Na' beṇə' ca' gwso'on de'e güen

žlac gosə'əbane' yesyə'əchoje'  
par yesə'əbanche' zejlicane. Na'  
benə' ca' gwsə'on de'e mal žlac  
gosə'əbane' yesyə'əchoje' par  
əsa'aque' castigw.

**Jeso'osən' bzejni'ine' de  
que nape' yelə' chnabia'**

<sup>30</sup>Bito bi gaquə gona' de'e  
bia'azəlaža'a. Chzenaga' bin'  
na Xa'anə' par nič nəzda'  
naquən' chchoglaogua'an che  
benəchən' šə non' napə dolə'.  
Na' chchoglaogua'an che to toe'  
can' cheyalə'əczə gaquə chedə'  
bito chona'an de'e bia'azəlaža'a.  
Chona'an con can' chene'e Xa'anə'  
ben' əbsele' nada'anə'. <sup>31</sup>Žalə' toza'  
nada' cho'a dižə' non' naca', bito  
naquən de'e šejle'ele chia'. <sup>32</sup>Pero  
zo Xa'anə' cho'e dižə' non' naca',  
na' nəzda' de que dižə' de'en cho'e  
chia'anə' naquən de'e li. <sup>33</sup>Bach  
bsele'əle benə' lao Juannə' par  
jəsə'ənabene' le' chia'. Na' Juannə'  
be'e dižə' li non' naca'. <sup>34</sup>Pero ca  
naca' nada' bito chyažjda' ənezda'  
dižə' de'e güe' ni to benəchən'  
chia'. Parzə nič le'e šejle'ele  
chia' na' gona' ca cui yeyejle lao  
yi' gabilən', de'e na'anə' che'enda'  
yosa'alažə'əle de'en gwna Juannə'  
chia'. <sup>35</sup>Juannə' goque' ca to  
lampara de'e chse'eni'ichgua, na'  
gone'ele bebeile šlož can' bsed  
əblo'ine'enə'. <sup>36</sup>De to de'e cho'en  
xtiža'a de'e zaquə'əche ca dižə' chia'  
de'en choe' Juannə'. Nada' chona'  
yoguə'əlol de'en chon Xa'anə' lao  
na'a gona', na' de'en chona' cho'en  
dižə' de que le'enə' bsele'ele nada'.  
<sup>37</sup>Na' leczə Xa'anə' ben' bsele'  
nada' cuine' babe'e xtiža'a. Na'

bitonə' gwzenagle xtiže'enə' nic  
ne'e le'ile can' naque'enə'. <sup>38</sup>Bitonə'  
gone chele xtiže'enə' chedə' bito  
chonlilažə'əle nada' naca' ben'  
əbsele'enə'. <sup>39</sup>Chsedyaṇə'əle Xtižə'  
Diozən' de'en nyojən, chaquele  
naple yelə' mban zejlicane laogüe  
de'en chsedlen. Na' de'e ca'  
zjənyojən chso'en xtiža'a. <sup>40</sup>Pero  
cui chene'ele gonlilažə'əle nada' par  
gaple yelə' mban zejlicane.

<sup>41</sup>Par nada' bito bi nonən šə  
benəchən' so'one' nada' yelə'  
bala'an o šə cui. <sup>42</sup>Nada' nombi'a  
le'e na' nəzda' cabi chaquele che  
Diozən'. <sup>43</sup>Xa'anə' bsele'e nada'  
na' benə' nada' yelə' chnabia' par  
chona' con can' ne'enə' na' cabi  
chejle'ele chia'. Na' šə benə' yoblə  
yide' to gwłazze', gwyejle'ele che'.  
<sup>44</sup>Bito gaquə šejle'ele chia' chedə'  
la' chi' yichjle chonle ca so'on  
ljuežjle ca' le'e yelə' bala'an na' cui  
cheyiljle naclən' gonle par nič  
Diozən' gone' le'e yelə' bala'an.  
Tozə le'enə' cho'e yelə' bala'an  
de'en naquə de'e zaque'e. <sup>45</sup>Bito  
gonle xbab de que nada' gua'a le'e  
part lao Xa'anə'. De'e Moisezən',  
ben' zole lez gaquəlen le'e lao  
Diozən', le'enə' güe'le le'e part lao  
Xa'anə'. <sup>46</sup>Žalə' gwyejle'ele che de'e  
Moisezən' na' šejle'etele len chia'  
nada', chedə' chia' nadan' bzoje'.  
<sup>47</sup>Na' ca naquən' cui chejle'e de'en  
bzoje'enə', čnacxa gonczle šejle'ele  
de'en bagwnia' le'e?

**Jeso'osən' bguaogüe'  
guye'y' mil benə' byo**

**6** Gozde de'e ca' gwyejto' len  
Jeso'osən' yešla'alə Nisdao'  
Galilean'. Na' nisda'onə' leczə nzi'in

Nisdao' Tiberias. <sup>2</sup>Na' beṇə' zan bedəsə'ənao le' cḥedə' besə'əle'ine' miḷagr ca' de'en chone' cheyone' beṇə' güe' ca'. <sup>3</sup>Na' gwloeto' to lao ya'a len Jeso'osən' na' na' gwche'eto' len le'. <sup>4</sup>Na' bazon baozə galə' lni cḥe neto' beṇə' Izrael de'en nzi' lni pascw. <sup>5</sup>Na' catə' bgüia Jeso'osən' na' ble'ine' de que baza'ac beṇə' zan gan' zoe'enə', na' gože' Lipən': —¿Gaxa si'icho de'e əsa'o yoguə' beṇə' quinga?

<sup>6</sup>Jeso'osən' gwne' ca' parzə niçh ye' Lipən' nac chaquene' cheyaḷə' gonto', la' banezczene' naquən' gone'. <sup>7</sup>Na' gož Lipən' le': —Tmil pes cabi gaquen si'icho de'e əsa'ogüe' latə' güejən.

<sup>8</sup>Na' zo to disipl cḥe Jeso'osən', ben' le Ndres, bišə' Simon Bedən'. Na' Ndresən' gože' Jeso'osən':

<sup>9</sup>—Nga zo to bi'i byo na' de gueyə' yetxtil de sebad cḥebo' na' yechopə beḷ ya'a. Pero bi de gon de'e quinga la' beṇə' zannə'.

<sup>10</sup>Nach Jeso'osən' gože' neto': —Le'e gon mendad yesə'əbe' beṇə' ca'.

Chi'ichgua yixye daquə' latjən', nach gosə'əbe' beṇə' ca' laogüeinə'. Naquə ca do gueyə' mil beṇə' byo cui cuent no'olə na' cui cuent bidao'.

<sup>11</sup>Nach gwxi' Jeso'osən' yetxtil ca'. Na' beyož be'e yelə' choxcwlen cḥe Diozən' bene' cḥe cḥe neto' disipl par be'eto' cḥe beṇə' ca' bazjəchi'. Na' lecza ca'atezəczə bene' len beḷ ya'a ca'. Be'eto' lega'aque' con catə'ətə' de'e gwse'enene'. <sup>12</sup>Na' catə' beyož gwse'eljene' nach gože' neto': —Le'e yetobə pedas ca' de'en bega'an par niçh cui bi cuiayi'.

<sup>13</sup>Nach botobəto' pedas ca' de'en besyə'əga'an beyož gwsa'o beṇə' ca',

na' goquən šižin žomə lao gueyə' yetxtil de sebadən'. <sup>14</sup>Na' beṇə' ca' catə' besə'əle'ine' miḷagr de'en ben Jeso'osən' nach gosə'əne': —De'e liczə bengan' profetən' ben' bagwlezcho selə' Diozən' yežlyo nga par gaquəlene' chio'o.

<sup>15</sup>Na' catə' gocbe'i Jeso'osən' de que gwse'enene' yesə'əcḥe'əxəxjene' par so'onene' rei cḥega'aque'enə', nach bebi'iže'e gozeje' ya'ada'onə' toze'.

#### Gwda Jeso'osən' lao nisda'onə'

<sup>16</sup>Na' catə' beḅjw že'enə' neto' disipl cḥe Jeso'osən' beyetjto' cho'a nisda'onə'. <sup>17</sup>Na' beyo'oto' to lo'o barcw par zjəyedato' Capernaunnə'. Bagol, na' Jeso'osən' bitonə' yele'e gan' zjəyedato'onə'. <sup>18</sup>Na' chas chatə' nisda'onə' la' to be' fuert chechj. <sup>19</sup>Ca do cḥopə legw babeza'ato' lao nisda'onə' catə' ble'ito' zezə' Jeso'osən' lao nisən' galən' zda barcon'. Na' bžebto'. <sup>20</sup>Nach gože' neto': —Nada'anə'. Bito žeble.

<sup>21</sup>Nach neto' chebeito' bego'oto'one' lo'o barcon'. Nach le'e bežinteto' cho'a nisda'onə'.

#### Beṇə' zan cḥəsyə'əyilje' Jeso'osən'

<sup>22</sup>Na' beteyo beṇə' ca' besyə'əga'an yešla'alə nisda'onə' bito besyə'əželene' Jeso'osən'. Gwsa'acbe'ine' caguə bi barcw gotə'əch sino yetoga de'en beyo'oto', na' gosə'əņezene' bito beyo'o Jeso'osən' lo'o barcon' gan' beyo'o neto'. <sup>23</sup>Nach besə'əžin to cḥopə barcw ca' de'en za'ac syoda de'en nzi' Tiberias, besə'əžinən galə'əzə gan' əgwsa'ogüe' catə'ən gwde be'

Xancho Jeso'osən' yełə' choxcwlen che Diozən'. <sup>24</sup>Na' catə' besə'əle'i beñə' ca' caguə no Jeso'osən' nłā'anə', na' ni neto' disipl che', nach besyə'əyo'e lo'o barcw dao' ca' na' ja'aque' Capernaunnə' chesyə'əyilje'ene'.

**Jeso'osən' naque' yełə' guao de'e chnežjon yełə' mban zejlicane che beñə' chso'onlılaže'ene'**

<sup>25</sup>Na' catə' besyə'əželene'

Jeso'osən' yešłā'alə nisdə'onə' na' gwse'ene': —Maestr, ıbatə'əquə' belə'o ngan'?

<sup>26</sup>Na' Jeso'osən' gože' lega'aque': —De'e li chnia' le'e, cheyilje nada' caguə por ni che bagwyejni'ile bi zejen miłagr ca' bable'ile bena', sino por ni che de'en gwdaole na' beljele. <sup>27</sup>Bito cue'e yichjle gonle par niç gatə' de'e ye'ej gaole de'en chde chei, sino lecue'e yichj le'e gon par niç gaguə ye'ej gaole de'en gon le'e yełə' mban zejlicane. Diozən' bsele'e nada' golja' beñəch na' nada' gona' de'en ye'ej gaole par niç əbanle zejlicane. Na' Diozən' babene' par niç nezele bsele'e nada'.

<sup>28</sup>Na' gwse'ene': —ıBi cheyalə' gonto' par niç yebei Diozən' neto'?

<sup>29</sup>Na' gož Jeso'osən' lega'aque': —De'e nga gonle par niç yebei Diozən' le'e, gonlılaže'əle nada' ben' əbsele'ena'.

<sup>30</sup>Nach gwse'ene': —ıBi miłagr gono' par niç gonlılaže'əto' le'? ıBi gono' le'ito' ža? <sup>31</sup>De'e xaxta'ocho ca' gwsa'ogüe' mana latjə dašən', can' nyoj Xtizə' Diozən' nan: “Yełə' guao de'e za' yoban' be'e lega'aque' gwsa'ogüe'.”

<sup>32</sup>Nach Jeso'osən' gože' lega'aque': —De'e li əchnia' le'e, caguə de'e Moisezən' bnežjue' lega'aque' yełə' guao de'en za' yoban', sino Xa' Dioz na'anə'. Na' Xa'anə' babselə'e par le'e to yełə' guao de'e zaquə'əche na' de'e li za'an yoban'. <sup>33</sup>Na' yełə' guao de'en babselə' Xa' Diozən', za'an yoban' na' betjən yežlyon' na' chnežjon yełə' mban zejlicane che notə'ətezə beñə' chao len.

<sup>34</sup>Nach gwse'ene': —Señor, beñšga neto' yełə' guaon' nao' ca' yedote.

<sup>35</sup>Na' Jeso'osən' gože' lega'aque': —Nada' naca' yełə' guao de'en chnežjon beñə' yełə' mban zejlicane. Notə'ətezə beñə' chse'ejle' chia' yesyə'əbei la'ažda'oga'aque'ena' zejlicane, na' de'en chso'onlılaže'e nada', nite'e mbalaz zejlicane.

<sup>36</sup>Na' bagwniacza' le'e, la'anə'əczə bable'ile nada' naca' yełə' guaonə', bitoczə chonlılaže'əle nada'.

<sup>37</sup>Yoguə' beñə' ca' chbej Diozən' par əsa'aque' nada' txen, chžin ža catə' chso'onlılaže'e nada'. Na' notə'ətezə beñə' ca' chso'onlılaže' nada', chebeida' chsa'aque' nada' txen. <sup>38</sup>Nada' za'a yoban' na' betja' yežlyon' caguə par niç gona' de'e bia'azəlaža'anə', sino par niç gona' can' chene'e Xa'anə' ben' əbselə' nada'. <sup>39</sup>Na' de'e ngan' de'en chene'e Xa'anə' ben' əbselə' nada', de que yoguə'əloł beñə' bagwleje' par əsa'aque' nada' txen, ni toe' cui gua'a latjə cuiayi'e sino que yosbanga'aca'ane' ladjo beñə' guat ca' šə bagwsa'ate' catə' əžin ža šo'o fin che yežlyon'.

<sup>40</sup>Xa'anə' chene'ene' de que yoguə'əloł beñə' se'ejni'ine' non'

naca' nada' na' so'onlilaže'e nada',  
par nich əgwnežjue' lega'aque'  
yelə' mban zejlicane, na' nada'  
yosbanga'aca'ane' ladjo beṇə' guat  
ca' šə bagwsa'ate' catə'ən əžin ža  
šo'o fin che yežlyon'.

<sup>41</sup>Na' beṇə' blao che nasyon

Izrael cheton' besə'əže'eše'e che

Jeso'osən' de'en gwne': "Nada'

naca' yelə' guao de'en za' yoban'."

<sup>42</sup>Na' gosə'əne': —İEcaguə bengan'  
Jeso'os xi'iq Jwse ben' nombia'acho  
na' leczə ca' xne'ena'? İBixchexa  
nga nalize' de que ze'e yoban' betje'  
yežlyon'?

<sup>43</sup>Nach Jeso'osən' gože' lega'aque':  
—Bito že'ešə'əle chia' entr le'e.

<sup>44</sup>Ni to cono no gonlilažə' nada'  
šə Xa'anə' ben' əbsele' nada' cui  
gone' ca selejle'e chia'. Na' beṇə' ca'  
chse'ejle'e chia' yosbanga'aca'ane'  
ladjo beṇə' guat ca' šə bagwsa'ate'  
catə' əžin ža šo'o fin che yežlyon'.

<sup>45</sup>Gan' nyoj de'e ca' boso'ozoj de'e  
profet ca' beṇə' ca' gwso'e xtižə'  
Diozən' cana' nan: "Na' yoguə'əlole'  
əgwse əgwlo'i Diozən'." Nachən'  
yoguə'əloj non' neze can' na Xa'anə'  
na' choso'ozenag che', yoguə' beṇə'  
can' chso'onlilaže'e nada'.

<sup>46</sup>Bito nacho zo nochlə beṇə'  
babe'ine' Xa'anə' sino toza' nada',  
la' nadan' za'a gan' zo Xa' Diozən'.

<sup>47</sup>De'e li chnia' le'e, beṇə' ca'  
chso'onlilažə' nada' de yelə' mban  
zejlicane chega'aque'. <sup>48</sup>Nada' naca'  
yelə' guao de'en chnežjon beṇə'  
yelə' mban zejlicane. <sup>49</sup>Xaxta'ocho  
ca' gwsa'ogüe' manan' latjə  
dašən', pero bia'aczə gwsa'ate'.

<sup>50</sup>Nadan' cho'a dižə' de que naca'  
yelə' guao de'en za' yoban' de'en  
chnežjon yelə' mban zejlicane

che beṇə' ca' chsa'ogüe'en par  
nich ca' cuich zjənaque' len  
yichjla'ažda'oga'aque'ena' ca beṇə'  
guat. <sup>51</sup>Nadan' naca' yelə' guao  
de'en za' yoban'. Nsa'a yelə' mban  
zejlicane' na' chac chnežjua'an  
beṇə'ən'. De'e na'anə' beṇə' ca'  
sa'o yelə' guao nga yesə'əbane'  
zejlicane. Na' yelə' guao de'e  
əgwnežjua' əsa'ogüe' naquən cuerp  
chia'anə', na' əgwnežjua'an par  
nich notə'ətezə beṇə'ch guaquə  
yesə'əzi'e yelə' mban zejlicane'.

<sup>52</sup>Nach gwche' bžəš entr beṇə'  
blao che nasyon Izrael cheton'  
gosə'əne': —İNacxa gone'en gon  
cuerp che'ena' gaocho?

<sup>53</sup>Na' Jeso'osən' gože' lega'aque':  
—De'e li chnia' le'e, Diozən'

bsele'e nada' golja' beṇə'ch, na' šə  
cuinə' gaole cuerp chia'anə' na'  
šə cuinə' ye'ejle xchena'anə', bito  
de yelə' mban chele zejlicane.

<sup>54</sup>Beṇə' ca' chsa'o cuerp chia'anə'  
na' chse'eje' xchena'anə' de yelə'  
mban zejlicane chega'aque', na' šə  
bagwsa'ate' catə' əžin ža šo'o fin  
che yežlyon', yosbanga'aca'ane'  
ladjo beṇə' guat ca'. <sup>55</sup>Na' cuerp  
chia'anə' naquən yelə' guao de'e  
le'ezelaogüe de'e zaque'e, na'  
xchena'anə' de'en chse'eje'ena'  
naquən le'ezelaogüe de'e zaque'e.

<sup>56</sup>Na' beṇə' ca' chsa'o cuerp  
chia'anə' na' chse'eje' xchena'anə'  
nitə'ətezə nite'e len nada' na' nada'  
zotezə zoa' len lega'aque'. <sup>57</sup>Xa'anə'  
ben' zo zejlicane le'ena' bsele'e  
nada', na' zoa' chedə' le' chone' ca  
zoa', na' ca'atezəczən' ben' gao  
cuerp chia'anə' soe' chedə' gona'  
ca soe'. <sup>58</sup>Cuorp chia'anə' naquən  
yelə' guao de'en za' yoban'. Na'



yelə' guao nga bito naquən ca manan' de'en gwsa'o xaxta'ocho ca' na' bia'aczə gwsa'ate'. Beṇə' ca' chsa'ogüe' yelə' guao nga nia' ca' nite'e zejlicane.

<sup>59</sup>De'e quinga əbsed əblo'i Jeso'osən' lo'o yo'odao' Capernaunnə'.

**Xtižə' Jeso'osən' chnežjon  
yelə' mban zejlicane che  
beṇə' ca' choso'ozenag chei**

<sup>60</sup>Na' beṇə' zan beṇə' ca' zjəsə'ənao Jeso'osən' catə' gwse'enenē' can' gože' lega'aque' nach gosə'əne': —Zi'ichgua naquə dižə' quinga. ¿Noxaczə šejle'e che'?

<sup>61</sup>Na' gocbe'i Jeso'osən' de que chəsə'əže'eše'e por ni che de'en gože' lega'aque', na' gozne': —¿Epor ni che de'en gwnia' can' chene'ele yebiguə'əle gosxanlə? <sup>62</sup>¿Naquəchxa gonlen' šə le'ile nada' yeyepa' gan' gwzoa' antslə? nadan' bselə' Diozən' golja' beṇəch. <sup>63</sup>Caguə por ni che de'en goljle beṇəch de yelə' mban zejlicane chele sino šə yo'o Spirit che Diozən' lo'o yichjla'ažda'olen' de yelə' mban zejlicane chele. Dižə' de'en babi'a len le'e zaquə'an par yichjla'ažda'olen' na' əbanle zejlicane šə šejle'ele chei. <sup>64</sup>Ne'e nitə' balle cui chonlilažə'əle nada'.

Jeso'osən' gwne' ca' chedə' dezd gwzolao zjəsə'ənao beṇə' le' nezene' noquə' beṇə' ca' cui gwso'onlilaže'ene' na' non' əgwde le' lao na' beṇə' ca' chəsə'əgue'i le'. <sup>65</sup>Na' gože' lega'aque': —Chac can' gwnia'anə' de que notono no chac gonlilažə' nada' šə Xa'anə' ben' əbselə' nada' cui chone' par nič gonlilaže'e nada'.

<sup>66</sup>Nach besyə'əbi'ižə' beṇə' zan beṇə' bagosə'ədalene' Jeso'osən', bitoch gosə'ənaogüe'ene'. <sup>67</sup>Na' Jeso'osən' gože' šižinte neto': —¿Elen le'e chene'ele žjəya'acle?

<sup>68</sup>Na' gož Simon Bedən' le': —Xanto', notono nochlə de no zaquə' əgwzenagto' chei. Nezetə' de que le' chonə' yelə' mban zejlicane che notə'ətezə neto' chzenagto' xtižə'onə'. <sup>69</sup>Neto' bachejle'eto' na' baṇezetə' de que len' naco' Cristən' ben' bagwlej Diozən' par gaquəlene' nasyon chechon'. Naco' Xi'in Dioz ben' zo zejlicane.

<sup>70</sup>Na' Jeso'osən' gože' neto': —Nada' gwleja' le'e šižinle na' nezdə' de que tole chzenagle che gwxiye'lenə'.

<sup>71</sup>Gwne' ca' che Jod Iscariotən' xi'in Simonnə' la' Jod nan' əgwdi'ene' lao na' beṇə' ca' chəsə'əgue'i le', len nacte' txen neto' šižinto'.

**Beṇə' bišə' Jeso'osən' bito  
gwso'onlilaže'e le'**

**7** Cato' bagwde de'e ca' Jeso'osən' gwzacze' chsed chlo'ine' beṇə' ca' ža' distrit che Galilean'. Bito gone'ene' yeyeje' Jodean' par soe' na' chedə' beṇə' blao che nasyon Izrael cheton' chəsə'əyiljlaže'e naclən' so'one' par so'ote'ene'. <sup>2</sup>Na' bazon galə'əzə lni che neto' beṇə' Izrael de'en nzi' "lni che yo'o de laguə'". <sup>3</sup>Na' beṇə' bišə' Jeso'osən' gwse'ene': —Bito yega'ano' nga, sino gwyej Jodean' par nič disipl' chio' ca' ša' na' yesə'əle'ine' de'e ca' chonə'onə'. <sup>4</sup>Ni to beṇə' cui chone' bgašə'əzə to de'e chone' šə chene'ene' gombia'

benə' le'. Šə de'e li chono' miłagr,  
ben par nich yesə'əneze yoguə'əlol  
benə' can' chono'onə'.

<sup>5</sup>Benə' biše'e ca' gosə'əne'  
ca' chedə' ni lega'aque' cui  
gwso'onlilaže'e le'. <sup>6</sup>Nach gož  
Jeso'osən' lega'aque': —Bitonə'  
žin ža par gwlo'a non' naca',  
pero ca naquə le'e ža, guaquə  
žja'acle lñin' batə'ətezən'. <sup>7</sup>Benə'  
ca' cui zjənonbia' Diozən' bito  
chəsə'əgue'ine' le'e, pero  
chəsə'əgue'ine' nada', chedə'  
chzejni'iga'acda'ane' de que  
chso'one' de'e malən'. <sup>8</sup>Le'e žja'ac  
lñina'. Nada' bito sa'a na'a chedə'  
bitonə' žin ža chia'anə' par sa'a  
lñin'.

<sup>9</sup>Na' beyož gože' lega'aque' ca'  
bega'ane' Galilean' yeto čopə ža.

**Jeso'osən' gwyeye' Jerosalennə'  
gan' yo'o lñinə'**

<sup>10</sup>Nach gwde gwsa'ac benə' biše'e  
ca' əzja'aque' lñinə' lecza gwza' le'  
zde' lñinə', pero caguə zaquə'əlao  
sino bgašə'əza. <sup>11</sup>Na' benə' blao  
če nasyon Izrael cheto'onə'  
besyə'əyilje' le' lao lñinə' na'  
gosə'əne': —¿Ganxa be'ena'anə'?

<sup>12</sup>Na' benə' ca' zjənžag lao lñinə'  
zane' gwso'e dižə' če Jeso'osən'  
len ljuežjga'aque'. Na' caguə tozə  
can' gosə'əne' che'. Bale' gosə'əne':  
—Naque' benə' güennə'.

Na' yebale' gosə'əne': —Abi,  
chonleizene' benə'anə'.

<sup>13</sup>Pero ni toe' cui gwso'e dižə' che'  
zaquə'əlao chedə' besə'əžebe' benə'  
blao če nasyon cheto'onə'.

<sup>14</sup>Na' do gašjə zda lñinə' catə'  
gwyo'o Jeso'osən' lo'o yo'odao'  
əblao če neto' benə' Izrael

na' gwzolaos chsed chlo'ine'.

<sup>15</sup>Na' chəsyə'əbane benə' blao ca',  
chəsə'əne': —¿Bixa chejni'i bengan'  
len caguə babsede' can' nsed  
chio'onə'?

<sup>16</sup>Nach Jeso'osən' gože' lega'aque':  
—De'en chlo'ida'anə' caguə de'e  
chaljəlaža'anə', sino ben' əbselə'  
nada' blo'ine'en nada'. <sup>17</sup>Notə'ətezə  
benə' chene'ene' gone' can' chene'e  
Diozən', le' ənezene' šə de'en  
chlo'ida'anə' naquən če Diozən'  
o šə naquən de'e bia'azəlaža'a.

<sup>18</sup>Benə' ca' chso'e dižə' de'e  
bia'azəlažə'əga'aque' chəsyə'əyilje'  
no so'e lega'aque' yelə' bala'an.  
Caguə ca' nada' chedə' cheyilja'  
naclə gona' par nich Diozən' ben'  
bselə' nada' si'e yelə' bala'an. De'e  
na'anə' guaquə gaple confyans de  
que nada' cho'a dižə' li, na' bito  
chxoayaga' benə'.

<sup>19</sup>Le'e cho'ela'ole de'e Moisezən'  
ben' bzoj lei če Diozən', len ni tole  
cui chonle can' nannə'. ¿Bixchen'  
chyljlažə'əle naclən' gonle par  
gotle nada'?

<sup>20</sup>Na' benə' ca' zjənžaguən'  
gwse'ene': —Chac tonto'. ¿No  
chyljlažə' naclə gone' par gote' le'?

<sup>21</sup>Jeso'osən' gože' lega'aque':  
—Tozə miłagr de'en babena' ža  
dezcanzən' na' de'e na'anə'  
yoguə'əle chebanele. <sup>22</sup>De'e  
Moisezən' bzoje' de que cheyałə'  
socho señy de'en ne' sirconsision.  
Pero caguə gwzolaon len le' sino  
len de'e xaxta'ocho ca' benə' ca'  
gwnitə' antslə ca le'. Na' le'e  
chzole bi'i byo dao' ca' señy de'en  
ne' sirconsision ža dezcanzən'.

<sup>23</sup>Na'a ža, šə chaquele chonən  
byen gwzole no bidao' señy de'en

ne' sirconsision ža dezcanzən' par gonle complir can' na lei de'en bzoj de'e Moisezən', žbixčhen' chža'ale nada' de'en beyona' to beṇə' ža dezcanzən' len yoguə'əljə de'en chac che'? <sup>24</sup>Bito con gonle xbab de que to de'e chle'ile chon beṇə' naquən de'e mal, sino le'e co'o rson nič ənezele šə de'e li chone' de'e mal o šə chone' de'e güen.

**Jeso'osən' be'e dižə' de que gwze'e gan' zo Diozən'**

<sup>25</sup>Nach to čhopə beṇə' Jerosalen ca' gosə'əne': —žEcaguə bengan' chəsyə'əyilje' par nič so'ote'ene'? <sup>26</sup>Le'e ggüiašc can' cho'e dižə' nga zaquə'əlao na' bitobi chse'ene'. De repentlja beṇə' gwnabia' ca' bach chso'one' xbab de que naquəczel' Cristən' ben' gwlej Diozən' par gaquəlene' nasyon chechon'. <sup>27</sup>Pero na' nezecho ga beṇə' be'lenga, mas catə' yidə Cristən' ni to cono əneze ga be'ena'.

<sup>28</sup>Ne'e chsed chlo'i Jeso'osən' lo'o yo'odao' əblao che neto' beṇə' Izrael catə'an gosə'əne' ca'. Nach gwne' zižjo gože' lega'aque': — Nada' nombi'ale na' nezele ga beṇə' nada'. Na' caguə con za'a de'e bia'azəlaža'anə'. De'e li zo ben' əbsele'ə nada' la'anə'əczə le'e bito nombi'alene'. <sup>29</sup>Nada' nombia'ane' čhedə' gan' zoe' nan' gwza'a na' len' bsele'e nada'.

<sup>30</sup>Nach chəsə'əyiljaže'e naclən' so'one' par yesə'əzene' Jeso'osən', pero notono no gwzen le' čhedə' bitonə' əžin ža par gague' lao na'aga'aque'ena'. <sup>31</sup>Na' beṇə' zan gwso'onlilaže'e Jeso'osən' na' gosə'əne': —Catə'an yidə Cristən'

bitolja gone' miłagr zanch can' chon benga.

**Xa'ag yo'odao' ca' ja'aque' par žjəsə'əxene' Jeso'osən'**

<sup>32</sup>Na' beṇə' fariseo ca' gwse'enene' beṇə' zan chso'e dižə' che Jeso'osən'. Nach boso'oxi'e len bxož əblao che nasyon Izrael četon' boso'osele'e xa'ag yo'odao' četo' ca' par žjəsə'əxene' le'. <sup>33</sup>Na' Jeso'osən' chsed chlo'ichene' gwne': —Gwzocha' yeto tyemp dao' len le'e nach yeya'a gan' zo ben' əbsele'ə nada'. <sup>34</sup>Yeyilje nada' na' cabi yeželele nada', la' gan' soa' nada', le'e bito gaquə yidle.

<sup>35</sup>Nach beṇə' blao che nasyon Izrael četon' gosə'əne' entr lega'aque': —žGa yeyej bengan' cui yeželechone'? žEšə šejlene' beṇə' gwlaž checho ca' zjənaselas entr beṇə' griego ca' na' žjəsedene' beṇə' griego ca'? <sup>36</sup>žBi zeje dižə' de'e nga gwna benga? Gwne': “Yeyilje nada' na' cui yeželele nada'.” Na' leczə gwne': “Ga'an soa' nada', le'e bito gaquə yidle.”

**Jeso'osən' be'e dižə' che Spirit che Diozən'**

<sup>37</sup>Na' ža le'ezelaogüe na' ža xen che lninə' gwzecha Jeso'osən' gan' chsed chlo'ine' na' gwne' zižjo: — Notə'ətezle šə de'e tant chene'ele gatə' yelə' mban zejlicane chele xte banacle ca to beṇə' chbillaže'e, legonlilažə' nada' na' gona' yelə' mban zejlicane chele. <sup>38</sup>Le'e chonlilažə'əle nada', so de'en nabia' yičhja'ažda'olen' can' na Xtižə' Diozən' de'en nyojən, gonən par nič gaquəlenle yeziquə'əchlə beṇə'

par yesə'əzi'e yelə' mban zejlicane. De'e na'anə' saquə'əlebele ca yao ca' de'en chso'onən par niç yežlyon' de tcho'alaoga'aque'n choscha'on bitə'ətezə.

<sup>39</sup>Jeso'osən' gwne' ca' chedə' gwnezene' Spirit che Diozən' yedəson lo'o yichjla'aždao' chio'o chonlilažə'ačo le' par niç gaquəlencho beṇə' yesə'əzi'e yelə' mban zejlicane. Na' ca naquə Spiritən' bitonə' yedəson lo'o yichjla'aždao' beṇə' ca orən', chedə' beṇə' ca' chəsə'əgue'i Jeso'osən' bitonə' so'ote'ene', na' bitonə' güe' Diozən' le' yelə' bala'an xen.

**Gwsa'aque' choplə por  
ni che Jeso'osən'**

<sup>40</sup>Beṇə' ca' ža'anə' gwse'ene' chsed chlo'i Jeso'osən' na' baļe' gosə'əne': —De'e ličzə bengan' profetən' ben' naquən yidə.

<sup>41</sup>Na' yebaļe' gosə'əne': —Bengan' Cristən' ben' gwlej Diozən' par gaquəlene' nasyon chechon'. Pero baļe' gosə'əne': —İEna' nacho de que Galilea na' əchoj Cristən'?

<sup>42</sup>İEcaguə na Xtižə' Diozən' de'en nyojən de que Cristən' galje' lao dia che de'e Rei Dabin' na' de que galje' yež Belen laž de'e rein'?

<sup>43</sup>Na' gotə' bžaš entr beṇə' ca' ža'anə' na' gwsa'aque' choplə por ni che Jeso'osən'. <sup>44</sup>Baļe' gwsa'aque' cheyalə' yesə'əzene'ene', pero bito gwso'one' ca'.

**Beṇə' gwnabia' che beṇə' Izrael  
ca' bito gwse'ejle'e che Jeso'osən'**

<sup>45</sup>Na' xa'ag yo'odao' che neto' beṇə' Izrael besyə'əžine' lao beṇə' ca' bosə'oseļe' lega'aque'. Na' bχoz

əblao che nasyon che-ton' na' beṇə' fariseo ca' gwse'e lega'aque':

—İBixchen' cui əgwche'elene'?

<sup>46</sup>Na' xa'ag yo'odao' ca' gwse'e lega'aque': —Xte ža neža ni tozə beṇə' cuinə' ne' güen ca güennə' chne bengan'.

<sup>47</sup>Nach beṇə' fariseo ca' gwse'e lega'aque': —İElente le'e bagwxoayagle? <sup>48</sup>Ni tozə neto' naquəto' beṇə' blao na' naquəto' beṇə' fariseo cuinə' šejle'eto' che'. <sup>49</sup>Pero beṇə' zan quinga ža' nga bito zjanombi'e lei de'en bzoj de'e Moizezən', na' bazjəmbi'ayi'e.

<sup>50</sup>Na' Nicodemon', ben' gwyey lao Jeso'osən' še'elə, lene' beṇə' blao ca'. Na' Nicodemon' gože' lega'aque':

<sup>51</sup>—Lei chechon' bito cho'en latjə choglaochon che to beṇə' de que malən' bene' sin cui güe'e dižə' nac goquə na' sin cui əžaš əche'enə bixa bene'ena'.

<sup>52</sup>Nach gwse' beṇə' ca' le': —İEna' nacho leno' len' naco' beṇə' Galilea? Bsed na' ənezdo' de que ni to profet cuinə' əchoj Galilean'.

**Besyə'ədoļe'ene' to no'olə len xtoe'**

<sup>53</sup>Na' besa'aque' jəya'aque' ližga'aque'.

**8** Nach Jeso'osən' gwyeye' ya'a de'en ne' Ya'a Olibos. <sup>2</sup>Na' beteyo catə' gwyeni' gwyeye' de'e yoblə yo'odao' əblao che neto' beṇə' Izrael. Na' yoguə' beṇə' ca' ža' na' gosə'əbigue'e laogüe'ena' na' Jeso'osən' gwchi'e na' gwzolaogüe' chsed chlo'ine' lega'aque'. <sup>3</sup>Nach beṇə' ca' choso'osed choso'olo'i lei de'en bzoj de'e Moizezən' na' len beṇə' fariseo ca' bedəsə'əgüe'e to no'olə beṇə' besyə'ədoļe'ene'

len xtoe'. Na' boso'ozeche'ene'  
gwchoł beṇə' ca' lao Jeso'osən'.

<sup>4</sup>Na' gwse'e Jeso'osən': —Maestr,  
no'ol nga babedolə'əto'one' mer  
delene' to xtoe'. <sup>5</sup>Na' lei de'en  
bzoj de'e Moizezən' chonən  
mendad gotcho no'ol ca' chso'on  
ca' əgwšizə'əga'acchone' yej. ¿Bixa  
ənao' le'? ¿bi cheyalə' gonechone'?

<sup>6</sup>Gwse'e Jeso'osən' ca' chedə'  
gwse'enenē' yesə'əbeje'ene' dižə'  
de'e yesə'əchine' contr le'. Nach  
Jeso'osən' con bcheque'e na'  
bzoje' lao yon' len xbene'. <sup>7</sup>Na'  
gwnitə'əcheche' chəsə'əṇabene'  
le' nacxa əṇe'ene'. Nach  
gwche'eša'ogüe'e na' gože'  
lega'aque': —Guaquə con to  
le'e beṇə' cui de xtole'e solaole  
əgwšizə'əle no'olə nga yejən'.

<sup>8</sup>Nach bcheque'e de'e yoblə  
bzoje' lao yon'. <sup>9</sup>Na' beṇə' blao ca'  
beṇə' ca' chəsə'əcuiš no'olən' catə'  
gwse'enenē' de'en gož Jeso'osən'  
lega'aque', gosə'ənezene' lo'o  
yichjla'ažda'oga'aque'ene' de  
que yogue'e de xtolə'əga'aque'.  
Nach gwzolaobesyə'əchoj tgüejə  
tgüejə', gwzolaotec besyə'əchoj  
beṇə' ca' zjəngoləch nach beṇə'  
ca' yelə' xte bega'an yetozə  
Jeso'osən' len no'olən' ladjo beṇə'  
ca' choso'ozenag che'. <sup>10</sup>Na' catə'  
bebe'ešao' Jeso'osən' caguə no  
beṇə' ca' ble'ichene' laogüe'ene'  
sino yetozə no'olən'. Na' gože'ene':  
—No'olə, ¿gan beṇə' ca' choso'ocuiš  
le'? ¿Eni toe' cui beṇ le' castigw?

<sup>11</sup>Nach no'olən' gože'ene': —Ni  
toe' Señor.

Nach Jeso'osən' gože'ene': —Ni  
nada' bito gona' le' castigw. Beyej  
na' cuich gono' de'e malən'.

**Jeso'osən' nse'e be'eni' par  
yichjla'aždao' beṇəchən'**

<sup>12</sup>Na' Jeso'osən' gozoe' dižə'ən  
yetši'i len beṇə' ca' ža'anə', gože'  
lega'aque': —Nada' nsa'a be'eni'  
par yichjla'aždao' beṇəchən'.  
Beṇə' ca' chso'onlilaže'e nada'  
na' choso'ozenague' chia' bitoch  
chso'ontezə chso'one' de'e  
malən'. Yo'o be'eni'in lo'o  
yichjla'ažda'oga'aque'ene' chedə'  
zjənapə' yelə' mban zejlicane.

<sup>13</sup>Nach beṇə' fariseo ca'  
gwse'ene': —Le'etezə cho'o dižə'  
che cuino', na' bito naquən de'e  
se'ejle' beṇə'.

<sup>14</sup>Na' gož Jeso'osən' lega'aque':  
—La'anə'əczə cho'a dižə' che  
cuina', xtiža'anə' naquən de'e  
li. Nada' nezda' gan' gwza'a na'  
gan' yeya'a, pero le'e bito nezele  
gan' gwza'a na' gan' yeya'a. <sup>15</sup>Le'e  
con to chosbague'əle nada' de que  
napa' dolə' por ni che bi de'en  
chle'ile chona'. Nada' bito za'a par  
choglaogua'an che beṇə' de que  
zjənapə' dolə'. <sup>16</sup>Pero na' šə catə'  
choglaogua'an che notə'ətezə beṇə'  
de que zjənapə' dolə', zaquə'əczə can'  
əṇia'anə' chedə' bito choglaogua'an  
che beṇə' to gwlažza' sino con can'  
na Xa'anə' ben' bsele' nada'. <sup>17</sup>Lei  
chechon' de'en bzoj de'e Moizezən'  
nyojən nan de que dižə' de'en əso'e  
chopə testigw cheyalə' šejle'echo  
de que naquən de'e li šə tozə can'  
yesə'əne'. <sup>18</sup>Nada' cho'a dižə' che  
cuina' na' Xa'anə' lecəə cho'e dižə'  
chia', na' le'ene' bsele'e nada'. Neto'  
naquəto' testigw ca' chopə.

<sup>19</sup>Na' gwse'ene': —¿Gaxa zo  
xa'onə'?

Na' gwna Jeso'osən': —Ni nada' ni Xa'anə' cui nombi'ale. Žalə' nombi'ale nada' leczə nombi'ale Xa'anə'.

<sup>20</sup>Dižə' ca' be' Jeso'osən' bsed blo'ine' gan' chəsə'əgüe'e mech lo'o yo'odao' əblao che neto' beṇə' Izrael. Na' ni to cono gw Xen le' chedə' cuinə' žin ža par gague' lao na' beṇə' ca' chəsə'əgüe'i le'.

**Jeso'osən' gwne': "Gan' yeya'anə' le'e cabi gaquə da'acle"**

<sup>21</sup>Na' gož Jeso'osən' lega'aque' yetš'i: —Nada' yeya'a, na' le'e yeyilje nada', pero gan' yeya'anə' le'e cabi gaquə da'acle, chedə' le'e gatle catə' cuinə' yedinjele xtolə'əle ca'.

<sup>22</sup>Na' beṇə' blao che nasyon Izrael cheto'on gosə'əne': —İEyeyot cuine'enə' ža, de'en ne' gan' yeyeje' bito gaquə šejcho?

<sup>23</sup>Na' gože' lega'aque': —Le'e chzenagle che gwxiye'enə', na' nada' chzenaga' che Diozən'. Le'e chonle can' chso'on yeziquə'əchlə beṇə' cui zjənombia' Diozən', na' nada' bito chona' ca'. <sup>24</sup>De'e na'anə' gwnia' le'e de que gatle catə' cuinə' yedinjele xtolə'əlen'. Šə cui chejle'e de que nada' naca' doxen can' gwnia'anə', gatle sin cui yedinjele xtolə'əle ca'.

<sup>25</sup>Na' gwse'ene': —İNo naco' le'enə'?

Na' gož Jeso'osən' lega'aque': —Nada' naca' ben' bagwnia' le'e bedote. <sup>26</sup>Ne'e dech de'e zan de'e ənia' chele gwzejni'ida' ca naquə xtolə'əle ca'. Xa'anə' bsele'e nada' par cho'a dižə' len beṇə'chən' de'en babenda' gwne'. Na' Xa' na'anə' cho'e dižə' li.

<sup>27</sup>Jeso'osən' be'e dižə' che Xe' Diozən', na' lega'aque' bito gwse'ejni'ine' šə che Dioz nan' cho'e dižə'. <sup>28</sup>Na' Jeso'osən' gože' lega'aque': —Diozən' bsele'e nada' golja' beṇə'ch, na' te gotle nada' le'e yag corozən' cana' ənezele de que naca' ben' gwnia'anə'. Na' leczə ənezele de que cabi bi chona' de'e bia'azəlaža'a, sino con bin' babzejni'i Xa'anə' nada', lenṇə' chnia'. <sup>29</sup>Xa'anə' babsle'e nada' na' zocze' len nada'. Bito chbejyichje' nada' chedə' do tyempte chona' de'en chazlaže'enə'.

<sup>30</sup>Na' žlac choe' Jeso'osən' dižə' quinga beṇə' zan gwsə'onli'ilaže'e le'.

**Noquə'ən zjənaquə xi'in Dioz na' noquə'ən nitə' xni'a de'e malən'**

<sup>31</sup>Na' Jeso'osən' gože' baļə beṇə' gwlaž cheto' ca' bachse'ejle'e che': —Šə sotezə sole gonle de'e chnia' le'e gwlo'en de que de'e liczə banacle disipl chia'. <sup>32</sup>Na' šə sotezə sole gonle de'en chnia' le'e, nach ənezele bi zeje dižə' li chia'anə', na' šə banezele bi zejen, bitoch gacle ca esclabos.

<sup>33</sup>Na' gwse'ene': —Dia che de'e Abraanṇə' naquəto' na' xte ža neža bitonə' gacto' ca esclabos. İBixəchen' nao' le' de que bitoch gaquəto' ca esclabos?

<sup>34</sup>Na' gož Jeso'osən' lega'aque': —De'e li chnia' le'e, yoguə' beṇə' chso'on de'e malən' nite'e xni'a de'e malən' ca esclabos. <sup>35</sup>Beṇə' naquə esclabo caguə do tyempte gague' cuent len familyən' gan' naque' esclabo, pero beṇə' golje' lao familyən', do tyempte gague' cuent len familyən'. <sup>36</sup>Na' šə nada'

Xi'in Diozən' gona' ca əchojle xni'a de'e malən' par niç cuich gacle ca esclabos, de'e liczə əchojlen'.

<sup>37</sup>Nezda' de que nacle xi'in dia çe de'e Abraannə' pero bia'aczə cheyiljažə'əle naclən' gonle par niç gotle nada', na' chonle ca' çhedə' bito chone chele xtiža'anə'.

<sup>38</sup>Nada' cho'a dižə' çe de'en bablo'i Xa'anə' nada', na' le'e chonle can' na xalen'.

<sup>39</sup>Na' gwse' beṇə' ca' Jeso'osən': —Neto' naquəto' xi'in dia çe de'e Abraannə'.

Na' gož Jeso'osən' lega'aque': —Žalə' nacle doalje xi'in dia çe de'e Abraannə' gonle can' ben de'e Abraannə' žalə' ca'. <sup>40</sup>Na' la'anə'əczə babzejni'ida' le'e dižə' li de'en babsed blo'i Diozən' nada', le'e chene'ele gotle nada'. De'e Abraannə' cabi bene' can' chonlen'.

<sup>41</sup>Tozəczə can' chonle len xalenə'.

Nach gwse'e le': —Tozə Diozən' naque' Xato' na' bito chzenagto' çe nochlə beṇə'.

<sup>42</sup>Na' Jeso'osən' gože' lega'aque': —Žalə' Diozən' naquə xale guaquele çhia', çhedə' nada' gwza'a gan' zo Diozən'. Caguə za'a de'e bia'azəlažə'anə'. Len' əbsele'e nada'. <sup>43</sup>¿Bixchen' cui chejni'ile de'en chnia' le'e? Bito chejni'ile çhedə' la' bito chene'ele gwzenagle xtiža'anə'. <sup>44</sup>Gwxije' nan' naquə xale. Nachən' chebeile chonle can' chene'ennə'. Len naquən güet beṇə' dezd catə'ən gwxe yežlyon', na' cui chdalenən dižə' li çe Diozən' çhedə' cui yo'o dižə' lin' lo'o yichjla'ažda'ogüe'ennə'. Catə' chnen de'e güenlažə' chnen con can' naquə cuinei çhedə'

naquən güenlažə' na' yoguə' dižə' güenlažə' za'an çhei. <sup>45</sup>Na' cabi chejle'ele çhia' nada', çhedə' nada' əchnia' le'e dižə' li. <sup>46</sup>Ni tole cui gaquə əgwlo'ele de que babena' bi de'e malən'. Nada' cho'a dižə' li, ¿bixchen' cui chejle'ele çhia'?

<sup>47</sup>Beṇə' ca' zjənaquə xi'in Dioz choso'ozenague' çe xtiže'enə'. Na' ca naquə le'e cui nacle xi'ine', de'e na'anə' bito chzenagle çe'.

### Ze'e galjlə de'e Abraannə' bazoczə Cristən'

<sup>48</sup>Na' beṇə' blaoc çe nasyon Izrael çeton' gwse'ene': —Leiczeto' can' nato' de que le' naco' beṇə' Samaria na' de que chac tonto'onə'.

<sup>49</sup>Na' gož Jeso'osən' lega'aque': —Bito chac tonta'. Nada' əchnežjua' yelə' bala'an çe Xa'anə' na' le'e chnitle yelə' bala'an çhia'anə'.

<sup>50</sup>Nada' caguə chylja' no gon nada' yelə' bala'annə'. Xa'anə' chone' nada' yelə' bala'an, na' len' əgwlo'e non' napə dolə' na' non' cui napə dolə'. <sup>51</sup>De'e li chnia' le'e, notə'əteze beṇə' choso'ozenag xtiža'anə', cuat năbia' yelə' gotən' lega'aque'.

<sup>52</sup>Nach beṇə' blaoc çe nasyon Izrael çeton' gwse'ene': —Na'a babeyož gwnezeto' de que chac tonto'onə'. De'e xaxta'ocho Abraannə' gote' na' leczə de'e profet ca' beṇə' ca' gwso'e xtižə' Diozən' cana'. Na' le' nao' de que beṇə' ca' choso'ozenag çhio' cuat năbia' yelə' gotən' lega'aque'. <sup>53</sup>¿Ezaquə'əcho' le' ca de'e xaxta'ocho Abraannə'? Len' gote' na' leczə ca' de'e profet ca'. ¿Noxan' chacdo' naco'?

<sup>54</sup>Na' gwna Jeso'osən': —Žalə' nada' choe' cuina' yelə' bala'an,



cabi zaquə' yelə' bala'annə'. Pero Xa'anə' chone' nada' yelə' bala'an, ben' nale naquə' Dioz chelen'.

<sup>55</sup>Le'e bito nombia'alene', pero nada' nombi'ane'. Žalə' nia' cui nombia'ane' gaca' beṇə' güenlažə' ca le'e. Nada' nombia'ane' ža, na' chzenaga' xtiže'enə'. <sup>56</sup>De'e xaxta'ocho Abraannə' bebeine' gwyexle'e de que le'ine' tyemp ni zoa' yežlyo ni. Na' bable'ine'en na'a na' zoe' mbalaz.

<sup>57</sup>Na' gwse' beṇə' blao che nasyon Izrael cheton' le': —Ni šiyon iz cuinə' žino'. ¿Ena' neze'ido' de'e Abraannə'?

<sup>58</sup>Na' gož Jeso'osən' lega'aque': —De'e li əchnia' le'e, ca ze'e galjla de'e Abraannə' bazocza' nada'.

<sup>59</sup>Nach gosə'əzi'e yej par yoso'ošiže'ene'en. Na' Jeso'osən' bocuaše'le na' beze'e yo'odao' əblaonə'. Bito gwsa'acbe'ine' catə' bedie' gwcholga'aque'enə' zjəyede'.

**Jeso'osən' bene' par niçh ble'i  
to beṇə' golje' nçhole'**

**9** Na' txen chdato' len Jeso'osən' catə' ble'ito' to beṇə' byo beṇə' golje' nçhole'. <sup>2</sup>Na' gožto'one': —Maestr, ¿no napə dolə' de'en goljə bengan' nçhole'? ¿əle' o šə xaxne'enə'?

<sup>3</sup>Na' Jeso'osən' gože' neto': —Benga golje' nçhole' caguə por ni che xtole'enə', na' caguə por ni che xtolə' xaxne'enə', sino par niçh la'alaon can' gon Diozən' len le'.

<sup>4</sup>Cheyałə' goncho xšin Diozən' ben' bselə' nada' žlac nede latjə. Gwžin catə' cuich gatə' latjə gonchon.

<sup>5</sup>Žlac nezoa' yežlyo nga chgua'a be'eni' lo'o yichjla'aždao' beṇə'.

<sup>6</sup>Beyož gwne' ca' gwcho'on xene'en lao yon' na' bene' beṇjw len xen' che'enə'. Na' gwdebe' beṇjon' jelaog beṇə' lçholən'. <sup>7</sup>Na' gože'ene': —Gwyex jəyedib jelaog'onə' cho'a tanc de'en nzi' Siloe—. Na' Siloe zejen dižə' Nselə'.

Na' gwyexe' na' beyib jelaogüe' ca'. Na' beze'e jəyede' bachle'ine'.

<sup>8</sup>Na' beṇə' gwliž che' ca' na' beṇə' ca' besə'əle'i le' yoguə' las catə' ne'e nçhole' gosə'əne': —¿Ecaguə bengan' bable'icho bedote chi'e chnabe' caridan'?

<sup>9</sup>Bale' gosə'əne': —Bengan'.

Na' bale' gosə'əne': —Cabi naquə le' sino ca naquə bengan' naque'.

Na' le' gwne': —Nada'anə'.

<sup>10</sup>Na' gwse'ene': —¿Nacxa goquən' gwzolao chle'ido'?

<sup>11</sup>Na' gože' lega'aque': —To beṇə' le Jeso'os bene' beṇjw na' gwdebe'en jelaogua'anə' na' gože' nada': “Gwyex cho'a tanc de'en nzi' Siloen' na' jəyedibən.” Na' gwyə'a na' beyiba'an, na' gwzolao chle'ida'.

<sup>12</sup>Nach gwse' beṇə' ca' le': —¿Ganxa be'enə'?

Na' gože' lega'aque': —Bito nežda'.

**Beṇə' fariseo ca' gosə'əṇabene'  
be'enə' nac goquən' chle'ine'**

<sup>13</sup>Na' gosə'əche'e ben' goquə beṇə' lçholən' gan' nitə' beṇə' fariseo ca'.

<sup>14</sup>Na' naquə ža dezcanz catə'an ben Jeso'osən' beṇjon' de'en gwdebe' jelaog be'enə' par ble'ine'. <sup>15</sup>Na' beṇə' fariseo ca' lecza gosə'əṇabene' le' nac goquən' bachle'ine'. Na' le' gože' lega'aque': —Ben' beyone nada' gwdebe' beṇjon' jelaogua'anə' na' beyiban' na' gwzolao chle'ida'.

<sup>16</sup>Nach to çhopə beṇə' fariseo ca' gosə'əne': —Nezecho bito zo Diozən'

len benga chedə' bito chomba'ane'  
ža dezcanzən'.

Na' baŀe' gosə'əne': —¿Nac gon to  
benə' güen de'e mal gone' miŀagr  
quina?

Na' gwsa'aque' choplə entr  
lega'aque'. <sup>17</sup>Nach de'e yoblə gwse'le  
be'en goljə ncholən': —¿Bi nao' le'  
che ben' ben par niç chle'ido'?

Na' le' gwne': —Naque' to profet  
benə' bselə' Diozən'.

<sup>18</sup>Na' benə' blao che nasyon  
Izrael cheton' bito gwse'ejle'e  
che ben' šə len' golje' nchole' na'  
na'a bachle'ine' xte que gwsa'axe'  
xaxne'ena'. <sup>19</sup>Na' gosə'əna'abene'  
lega'aque' gwse'ene': —¿Ebengan'  
xi'inlen' ben' nale golje' nchole'?'  
¿Nacxa goquən' chle'ine' na'a?

<sup>20</sup>Na' gwse' xaxne'e ca'  
lega'aque': —Nezetō' de que bengan'  
xi'into'onə', na' de que golje' nchole'.  
<sup>21</sup>Mas nac chaquən' bachle'ine' bito  
nezeto', nic nezeto' noxa ben par  
niç bachle'ine'. Le' bazejəczene'.  
Lenabe le', güe'ecze' dižə' naquən'  
goc che'.

<sup>22</sup>Xaxne'e ca' gosə'əne' ca' de'en  
besə'əžebe' benə' blao che nasyon  
Izrael cheto'onə', chedə' lega'aque'  
bach zjənone'en de que notə'əteza  
benə' güe'e dižə' de que Jeso'osən'  
naque' Cristən' ben' gwlej Diozən'  
par gaquəlene' nasyon cheton', cabi  
əso'e latjə šo'oche' lo'o yo'oda'onə'.  
<sup>23</sup>De'e na'anə' gosə'əna xaxne'e ca':  
“Bazejəczene'. Lenabe le'.”

<sup>24</sup>Nach de'e yoblə gwsa'axe' ben'  
goljə nchol gwse'ene': —Be'elao'  
Diozən' na' gwzo'one' testigw de que  
clelən' babe'eleno' neto' dižə' bache.  
Neto' nezeto' de que Jeso'osən'  
naque' to benə' güen de'e mal.

<sup>25</sup>Na' gwne': —Šə naque' benə'  
güen de'e mal, bito nezda'. De'en  
nezda', nada' goca' benə' lçhol' na'  
na'a chle'ida'.

<sup>26</sup>Na' de'e yoblə gwse'ene': —¿Bi  
benene' le'enə'? ¿Nac benen' par  
niç bachle'ido'?

<sup>27</sup>Na' gože' lega'aque': —Bagwnia'  
le'e na' cui chzenagle. ¿Bixchen'  
chene'ele yenele de'e yoblə? ¿Elen  
le'e chene'ele gacle disipl che'enə'?

<sup>28</sup>Na' gwsa'ade'ene' dižə'  
gwse'ene': —Le' naco' disipl che',  
pero neto' naquəto' disipl che de'e  
Moisezən'. <sup>29</sup>Nezetō' de que Diozən'  
be'elene' de'e Moisezən' dižə' cho'a,  
pero benga bito nezeto' gan' ze'ena'.

<sup>30</sup>Na' ben' goljə ncholən' gože'  
lega'aque': —Nactequən' le'e cui  
nezele ga ze'ena', len babene' par  
niç chle'ida'. <sup>31</sup>Na' nezecho de que  
Diozən' cabi chzenague' che benə'  
ca' chso'on de'e mal. Con benə'  
chso'ene' yeŀə' bala'an na' chso'one'  
can' chene'ene'ena', lega'acze'  
chzenag Diozən' chei. <sup>32</sup>Dezd gwxe  
yežlyon' ni to conoŀə' yene de  
que bagwzo benə' chone' par niç  
chle'i benə' goljə nchol. <sup>33</sup>Žalə' cui  
zo Diozən' len le' caguə bi miŀagr  
gaquə gone'.

<sup>34</sup>Na' benə' blao ca' gwse'ene':  
—Pendejw, len' goljo' ncholō'  
yeŀə' benə' mal chio'onə', čəna le'  
əgwseddo' neto'onə'?

Na' besyə'əbeje'ene' fuer.

**Benə' ca' zjəncchol  
yicħjla'ažda'oga'aque'ena'**

<sup>35</sup>Gocbe'i Jeso'osən' de que  
babesyə'əbeje' be'ena' fuer,  
na' jəšague'ene' gože'ene':  
—¿Echonlilažo'o le' Xi'in Diozən'?

<sup>36</sup>Na' gož ben' le': —¿Noxa'an ža? señor, par nič gonlilaža'ane'.

<sup>37</sup>Na' gož Jeso'osən' le': — Nada'anə' ben' bable'ido' antslə na' nada'anə' cho'elena' le' dižə'.

<sup>38</sup>Nach be'enə' bzo xibe' be'elaogü'e Jeso'osən', gwne': — Xana', chonlilaža'a le'.

<sup>39</sup>Na' gwnach Jeso'osən': —Nada' za'a yežlyo nga par nič la'lalaon che be'nachən' non' zjənapə dolə' na' non' cui zjənapə dolə'. Za'a chgua'a be'eni' par be'nə' ca' chsa'acbe'ine' zjənčhol yichjla'ažda'oga'aque'enə', na' za'a par yeca'a be'eni' che be'nə' ca' chsa'aquene' cui zjənčhol yichjla'ažda'oga'aque'enə'.

<sup>40</sup>Na' balə be'nə' fariseo ca' nitə' galə'əzə gwse'enenə' de'e nga. Na' gwse'e Jeso'osən': —¿Echacdo' len neto' nčhol yichjla'ažda'oto'onə'?

<sup>41</sup>Na' gož Jeso'osən' lega'aque': — Žalə' cui chejni'ile bito bi xtolə'əle de. Pero por ni che de'en nale de que chejni'ile, de'e na'anə' deczə xtolə'əlen'.

### Jempl che xle'ej xilə' ca'

**10** De'e li chnia' le'e, be'en cui cho'o cho'a puert xle'ej xilə' ca' na' ga yoblə chepe' par cho'e, be'nə' bguan be'enə'. <sup>2</sup>Be'en cho'o cho'a puertən', le'enə' goye xilə'əna'. <sup>3</sup>Na' be'en chapə puert che xle'ej xilə' ca' chsaljue' par nič cho'o be'nə' goyebən'. Na' xilə' ca' choso'ozenaguəb xtiže'enə' čhedə' zjənombia'ab le', na' chaxe'eb cho'e laga'aguəb catə' chbeje'eb. <sup>4</sup>Na' catə' bagwleje' yoguə' bia che' ca' lo'o xle'ejga'aguəbən', chbialaogü'e laoga'aguəbən' na' chjəsə'ənaob le' čhedə' zjənombi'ab ši'enə'.

<sup>5</sup>Na' bito žjəsə'ənaob be'nə' yoblə, sino yesə'əxonjəb le' čhedə' cui zjənombi'ab ši'enə'.

<sup>6</sup>Jeso'osən' be'e jempl nga par bzejni'ine' be'nə' ca' ža'anə', pero bito gwse'ejni'ine' bi zejen de'en gože' lega'aque' ca'.

Jeso'osən' chgüia chye' chio'o  
ca to goye xilə' be'nə' chgüia  
chye' bia che' ca' binlo

<sup>7</sup>Nach gozne Jeso'osən' gože' lega'aque': —De'e li əchnia' le'e, nada' gwxaquə'əlebəda' ca cho'a puert che xle'ej xilə' ca'. <sup>8</sup>Yoguə' be'nə' goxoayag ca' babla'ac antslə ca nada' chəsə'əne' de que Diozən' bsele'e lega'aque' pero gwxaquə'əlebəga'aque' ca be'nə' bguan. Na' ca xilə' ca' cui choso'ozenaguəb xtižə' be'nə' cui zjənombi'ab, ca'acžən' be'nə' ca' chso'onlilažə' nada' cui choso'ozenague' che be'nə' goxoayag ca'. <sup>9</sup>Nada' gwxaquə'əlebəda' ca cho'a puert che xle'ej xilə' ca'. Xilə' ca' chəsya'əyo'ob lo'o xle'ejga'aguəb na' chəsə'əchojəb par chəsə'əyiljəb de'e chsa'ob. Na' ca xle'ej xilə' ca' chcue'ejən lega'aguəb par nič cui bi gac čhega'aguəb, ca'acžən' chcue'ēja' be'nə' ca' chso'onlilažə' nada' par nič cui bi gac čhega'aque'.

<sup>10</sup>Be'nə' goxoayag ca' gwxaquə'əlebəga'aque' ca be'nə' bguan be'nə' ca' chda'ac lechguale con to de'e yesə'əbane', na' so'ote', na' yesə'ənitlaogü'e. Nada' za'a par nič chnežjua' yelə' mban zejlicane che be'nə' ca' chso'onlilažə' nada' na' par nič nite'e mbalaz juisy.

<sup>11</sup>Nada' chgüia chya' be'nə' ca'

chso'onlilažə' nada' can' chon to beṇə' goye xilə' beṇə' chgüia chye' xilə' che' ca' binlo. Na' de'en chgüia chyega'aca'ane' chsanlažə' cuina' so'ot beṇə' nada'. <sup>12</sup>Baḷə beṇə' ca' choso'oye' xilə' chesə'əzi'e laxjwga'aque', la' xilə' ca' bito zjənaquəb bia chega'aque'. De'e na'anə' chəsə'əbejyichje'eb na' choso'oxonje' catə' chəsə'əle'ine' za' no becoyo'o, chedə' bito zjənaque' xan xilə' ca'. Chso'e latjə chniz becoyo'onə' xilə' ca' na' choslasəb lega'aqueb. <sup>13</sup>Chesə'əxonje' chedə' bito zjənzi'ine' xilə' ca' de'en cui zjənaquəb bia chega'aque', con zjənaque' goyeb.

<sup>14</sup>Nada' chgüia chya' beṇə' ca' chso'onlilažə' nada' ca to beṇə' goye xilə' beṇə' chgüia chye' xilə' che' ca' binlo. Na' nombi'a beṇə' ca' chso'onlilažə' nada', na' lega'aque' zjənombi'e nada'. <sup>15</sup>Nombi'aga'aca'ane' ca Xa'anə' nombi'e nada' na' nada' nombi'a Xa'anə'. Na' de'en chgüia chyega'aca'ane' chsanlažə' cuina' so'ot beṇə' nada'. <sup>16</sup>Na' nitə' beṇə' ga yoblə beṇə' cui zjənaquə beṇə' Izrael beṇə' so'onlilažə' nada' na' yoso'ozenague' chia'. Leczə lega'aque' cheyalə' əgwto'ba' par nich yoguə'əlol no so'onlilažə' nada' əsa'aque' tozə len lježjga'aque' na' toza' nada' ggüia gwy'a yoguə'əlolga'aque'.

<sup>17</sup>Chsanlažə' cuina' so'ot beṇə' nada' pero techlə yebana'. Na' chaquəche Xa'an chia' de'en chazlaža'a chona' ca'. <sup>18</sup>Ni to cono yeque'e yelə' mban chia'anə' sino chsanlažə' cuina' so'ot beṇə' nada'. Napa' yelə' gwnabia'anə' par

gwsanlažə' cuina' so'ote' nada', na' napa' yelə' gwnabia' par yeyas yebana' ladjo beṇə' guat ca'. Na' Xa'anə' babene' mendad gona' ca'.

<sup>19</sup>Na' de'e yoblə gwsa'ac beṇə' blao che nasyon Izrael cheton' choplə por ni che dižə' ca' de'en gwse'enene' be'e. <sup>20</sup>Zan beṇə' ca' gosə'əne': —Chac tonte'enə', bito chacbe'ine' bi dižə'an cho'e. ¿Bixchen' chzenagle che'?

<sup>21</sup>Na' baḷə' gosə'əne': —Dižə' quinga caguə naquən ca che beṇə' chac tontən'. ¿Eguaquə gon to beṇə' chac tont par le'i beṇə' lchol'?

**Beṇə' blao che beṇə' Izrael ca' cuiczə gwse'enene' se'ejle'e che Jeso'osən'**

<sup>22</sup>Na' Jerosalennə' chac lni che yo'odao' əblao che neto' beṇə' Izrael de'en ne' “Dedication”. Na' naquə tyemp zag. <sup>23</sup>Na' Jeso'osən' chde' cha'ašil che yo'odao' əblaonə' part de'en chəsə'əne' “Cha'ašil che Salomon”. <sup>24</sup>Na' gwse'echj beṇə' blao che nasyon Izrael cheton' Jeso'osən' na' gwse'ene': —¿Bixchen' ne'e chono' par chaczejlažə'tecto' šə len' Cristən' ben' gwlej Diozən' par gaquəlene' nasyon cheton'? Šə le'enə' Cristən', gwna neto' clar.

<sup>25</sup>Na' gož Jeso'osən' lega'aque': —Bagwnia' le'e na' cui chejle'ele. Milagr ca' de'en babena' len yelə' guac che Xa'anə' chəsə'əlo'en de que le'enə' bsele'e nada'. <sup>26</sup>Na' le'e bito chejle'ele chia' chedə' cui nacle txen len beṇə' ca' chso'onlilažə' nada'. <sup>27</sup>Nombi'a beṇə' ca' chso'onlilaže'e nada' na' lega'aque' choso'ozenague' chia'. <sup>28</sup>Na' nada' chnežjoga'aca'ane'

yelə' mban zejlicane, na' cuat yesə'əbiayi'e. Ni to cui no no əca'aḁaxj lega'aque' lao na'anə'.<sup>29</sup> Xa'anə' bagwleje' lega'aque' par niḁh chgüia chyega'aca'ane'. Na' ni to cui no no gaquə əca'aḁaxj lega'aque' lao na' Xa'anə' chedə' nape' le'ezelaogüe' yelə' chnabia' xen.<sup>30</sup> Nada' na' Xa'anə' tozə can' naquə yichjla'ažda'oto'onə', tozə can' naquə yelə' guac cheto'onə' na' tozə can' chonto'.

<sup>31</sup>Nach beḁə' blao che nasyon Izrael cheton' gosə'əzi'e yej par yoso'ošiz'e'ene'en.<sup>32</sup> Na' gož Jeso'osən' lega'aque': —De'e zan de'e güen bable'ile bena' len yelə' guac che Xa'anə'. ¿Non' de'e ca' babena' chonən par əgwšizə'əle nada' yejən'?

<sup>33</sup>Na' beḁə' blao ca' gwse'e le': —Caguə por ni che bi de'e güen de'en babeno'on əgwšizə'əto' le' yejən', sino por ni che chzia chnito'o Diozən'. Con beḁəchzə le' na' nao' de que naco' Dioz.

<sup>34</sup>Na' gož Jeso'osən' lega'aque': —Le'e chsedle Xtižə' Diozən' de'en nyoj gan' nan: “Nada' gwnia' de que le'e nacle ca Dioz.”<sup>35</sup> Na' Xtižə' Diozən' de'en nyojən caguə de'e te cheinə'. Na' lenḁə' nan de que Diozən' gwne' che beḁə' ca' əbnežjue' xtižə'enə' de que gwsa'aque' ca Dioz.<sup>36</sup> Ca naquə Diozən' gwne' zjənaque' ca cuine', čbixchen' nale de que chzia chnita'a Diozən' de'en gwnia' naca' Xi'ine'? Le'enə' gwleje' nada' par gaquəlena' beḁəchən' na' bsele'e nada' yežlyo nga.<sup>37</sup> Žalə' de'e ca' chona'anə' bito zjənaquən de'en chon Xa'anə', bito šejle'ele chia'.<sup>38</sup> Pero na' de'en

zjənaquən de'en chone'enə', cheyalə' šejle'ele de que naca' Xi'ine' la'anə'əczə cui chejle'ele xtižə'anə'. Šə šejle'ele che de'e ca' chona'anə' na' ənezele de que Xa'anə' zoe' len nada' na' nada' zoa' len le'.

<sup>39</sup>Na' de'e yoblə bosə'əsy'e naclən' gaquə ədolē'e, pero bito besyə'əželene' naclən' so'one'.

<sup>40</sup>Na' gwsa'ato' len Jeso'osən' jəsoto' yešla'alə yao Jordannə' gan' gwzo de'e Juannə' antslə catə'ən bchoe' beḁə' nis.<sup>41</sup> Na' zan beḁə' bda'aque' gan' zoto' par bosə'ozenague' xtižə' Jeso'osən' na' gosə'əne' che': —La'anə'əczə de'e Juannə' ni to miłagr cui bene', yoguə'əlol de'en gwne' che benga naquən de'e li.

<sup>42</sup>Na' beḁə' zan beḁə' nitə' na' gwsə'onlilažə'e Jeso'osən'.

Can' goquə catə'ən got ben' le Lach

**11**<sup>1-2</sup>Na' goquən chacšene to beḁə' Betania beḁə' le Lach. Betania nan' naquən laž Maria na' Marta, na' lega'aque'enə' zjənaque' beḁə' zan Lachən'. Maria nga ben' bcuase' set zix ni'a Xancho Jeso'osən' na' bxie' ni'enə' len yišə' yichje'enə'.<sup>3</sup> Na' beḁə' zan Lachən' bosə'osele'e rson gan' zo Jeso'osən' gwse'ene': —Xanto', be'en chacdo' chei chacšenene'.

<sup>4</sup>Na' catə' gwneze Jeso'osən' na' gwne': —Yižgüe' che'enə' bito naquən de'e gattecze', sino par əye' Diozən' yelə' bala'anən' chacšenene' na' par niḁh nada' si'a yelə' bala'an, nada' naca' Xi'in Diozən'.

<sup>5-6</sup>Gwde gwneze Jeso'osən' de que chacšene Lachən', nebega'ane' yechopə ža gan' zoe'enə' la'anə'əczə

chaquene' che Martən', che beṇə' bile'enə' na' che Laḥən'. <sup>7</sup>Nach gože' neto': —Ləšo'o Jodean' de'e yoblə.

<sup>8</sup>Nach gožto'one': —Maestr, bi ža na'azən' gwsa'aclačə' beṇə' blao che nasyon chechon' yoso'ošiže'e le' yej. ĩEna' de'e yoblə šejo' na'anə'?

<sup>9</sup>Na' gwna Jeso'osən': —ĭEcagua šižiṇ orən' naquə težan'? Beṇə' chda teža bito chčhegü'e chedə' la' nye'eni'inə'. <sup>10</sup>Mas beṇə' chda še'elə chčhegü'e chedə' cuich nye'eni'. Ca'aczə naquən len nada', bito bi bi gaquə chia' žlac cuiṇə' əžin ža par so'ote' nada'.

<sup>11</sup>Gwde gwne' ca' gozne' neto': —Beṇə' migw checho Laḥən' bagwtase', na' ša'a žjəyesbana'ane'.

<sup>12</sup>Na' gožto'one': —Xanto', šə bachtase'enə' goyacczene'.

<sup>13</sup>Jeso'osən' gwne' ca' chedə' gwṇezene' bagot Laḥən', na' neto' bento' xbab de que gwne' ca' che bišgalən'. <sup>14</sup>Nach Jeso'osən' gwne' neto' clar: —Bagot Laḥən'. <sup>15</sup>Na' chebeida' cui gwzoa' lao chacšenene', par niḥ ṇa'a gona' ca šejle'echle chia'. Le'e šo'o gan' de'enə'.

<sup>16</sup>Nach beṇə' ljuežjto' Tomasən' gože' neto': —Le'e šo'o par niḥ len chio'o so'ote' šə bachso'ote' Jeso'osən'.

Tomas na'anə' ben' boso'osi'e Didimo chedə' naque' beṇə' cuaš.

**Jeso'osən' chosbane' beṇə' guat ca'**

<sup>17</sup>Nach gwyejto' len Jeso'osən' Betanian', na' catə' bžinto'onə' gwse' beṇə' ca' le' de que bagoc tap ža boso'ocuaše'e Laḥən'.

<sup>18</sup>Na' Betanian' chi'in galə'əzə

Jerosalennə' ca do gašə legw. <sup>19</sup>Na' beṇə' zan beṇə' Izrael gwlaž cheto' ca' ža' Jerosalennə' besə'əžine' gan' zo Martən' na' Marian' par chso'e lega'aque' yelə' chxenlažə' de'en got beṇə' zanga'aque'enə'. <sup>20</sup>Nach Martən' catə' gwṇezene' bazon əžinto' na' bchoje' bedəšague' neto', na' Marian' bito bchoje' ližga'aque'enə'. <sup>21</sup>Nach Martən' gože' Jeso'osən': —Xana', žalə' gwzo' catə'ən gocšene beṇə' zana'anə' bito gote' žalə' ca'. <sup>22</sup>Pero la'aṇə' bagote', nezdə' de que Diozən' gone' bitə'ətezə de'en əṇabdo'one'.

<sup>23</sup>Nach gož Jeso'osən' le': —Goban beṇə' zano'onə'.

<sup>24</sup>Nach Martən' gože'ene': —Nezda' de que gobane' catə'ən yesy'əban beṇə' guat ca' žan' šo'o fin che yežlyon'.

<sup>25</sup>Na' gož Jeso'osən' le': —Nada' chac chosbana' beṇə' guat ca' na' nada' nsa'a yelə' mban zejlicane par beṇə' ca' chso'onlilažə' nada'. De'e na'anə' beṇə' ca' chso'onlilažə' nada' la'aṇə'əczə sa'ate', de yelə' mban zejlicane chega'aque'. <sup>26</sup>Na' notə'ətezə beṇə' chso'onlilaže'e nada' zjənapə' yelə' mban zejlicane na' cuat ṇabia' yelə' gotən' lega'aque'. ĭEchejli'o de'e nga?

<sup>27</sup>Na' gože'ene': —Xana', chejli'a de que naco' Xi'in Dioz. Chejli'a de que naco' Cristən' ben' babselə' Diozən' yežlyo nga par gaquəlene' neto'.

**Jeso'osən' gwcheže' cho'a  
ba che Laḥən'**

<sup>28</sup>Beyož gwna Martən' ca' nach beyeje' na' jəyeyeže' Maria bile'enə'

žizizə: —Baza' Maestrən' na' chne' le'.

<sup>29</sup>Na' Marian' catə' benene' can' gož Martən' le' le'e gwzoža'ate' bide' gan' zoto' len Jeso'osən'. <sup>30</sup>Na' caguə babžinto' lao yežən' ca orən', nenaguə'oto' gan' bedəšag Martən' neto'. <sup>31</sup>Na' beṇə' Jerosalen ca' nitə' len Marian' liže'enə', beṇə' ca' chso'e lega'aque' yeḷə' chxenlažə', catə' besə'əle'ine' gwza' Marian' nach gosə'ənaogüe'ene' chsa'aquene' cho'a ba na'an zde' zjəcheže'.

<sup>32</sup>Na' Marian' catə' ble'e gan' zoto'onə' ble'ine' Jeso'osən', na' bzo xibe' laogüe'enə' na' gože'ene': —Xana', žalə' le' gwzo' nga catə'an chacšene beṇə' zana'anə', bito gote' žalə' ca'.

<sup>33</sup>Na' catə' ble'i Jeso'osən' chbež Marian' na' lecəə chəsə'əbež beṇə' Jerosalen ca' nžague'enə', de'e juisy de'e goquene' na' bžaglaogüe' lo'o yichjla'ažda'ogüe'enə'. <sup>34</sup>Na' gože' lega'aque': —¿Ga əbcuašə'əlene'?

Na' lega'aque' gwse'ene': —Xanto', yo'o na' le'ido'.

<sup>35</sup>Na' gwchež Jeso'osən'. <sup>36</sup>Na' gosə'əna beṇə' Jerosalen ca': —Le'e ggüiašc catequən' chaquene' che'.

<sup>37</sup>Na' balə beṇə' ca' gosə'əne': —Le' ngan' bene' par nič ble'i beṇə' lchol' ca'. ¿Ecu' gaquən' žalə' bene' par nič cui gat Lačən'?

**Jeso'osən' bosbane' Lačən'  
ladjo beṇə' guat ca'**

<sup>38</sup>Na' de'e yoblə de'e juisy de'e goque Jeso'osən' lo'o la'aždaogüe'enə'. Nach yoguə'oto' gwyejto' cho'a ban' len Jeso'osən'. Na' ban' naquən to bloj na' da' to yej cho'inə'. <sup>39</sup>Nach gož Jeso'osən': —Leca'a yejən'.

Na' Mart zan de'e beṇə' guatən' gože'ene': —Xana', bachla' ben' zban, la' bač goc tap ža na'a gote'.

<sup>40</sup>Na' gož Jeso'osən' le': —Bagwnia' le' šə chonlilažo'o nada' nach šejni'ido' bi zeje ca de'en gwlo'e Diozən' yeḷə' guac xen che'enə'.

<sup>41</sup>Nach beṇə' ca' gosə'əque'e yejən'. Na' Jeso'osən' gwliis laogüe'en yobalə gwne': —Xa', choxcwleno' babzenago' chia'.

<sup>42</sup>Nada' nezdə' de que syempr chzenago' chia'. Pero ənia' ca' par nič beṇə' ca' ža' nga se'ejle'e de que len' əbselo'o nada'.

<sup>43</sup>Na' beyož gwne' ca' lao orasyonnə', belgüiže' de'e beṇə' guatən' gwne' zizjo gože'ene': —Lač bechoj'.

<sup>44</sup>Nach le'e bechojte Lačən', zjəncheləyoy ni'a ne'e ca' cint de lachə' na' to bey nazjə laogüe'enə'. Na' gož Jeso'osən' lega'aque': —Le'e yozaše' lachə'ənə' na' le'e gwsane' yeyeje'.

**Boso'oxi'e yesə'əzene' Jeso'osən'**

<sup>45</sup>Na' zan beṇə' Jerosalen ca' beṇə' ca' zja'ac len Marian' besə'əle'ine' miłagr de'en ben Jeso'osən' na' gwso'onlilaže'e le'. <sup>46</sup>Pero bale' ja'aque' lao beṇə' fariseo ca' jse'eže' lega'aque' can' bene' bosbane' Lačən'. <sup>47</sup>Nach bəxoz əblao che nasyon Izrael cheton' na' beṇə' fariseo ca' besə'ətobe' yoguə'əloḷ beṇə' ca' chəsə'ənabia' nasyon cheton'. Nach boso'oxi'e gosə'əne': —¿Nacə gonchon'? la' miłagr zannə' chon bengə. <sup>48</sup>La' šə gaquecho ljoye'enə', yoguə' beṇə' so'onlilaže'e le', nach da'ac beṇə'



nasyon Roma na' yoso'oziaye'e yo'odao' əblao checho nga na' len nasyon chechon'.

<sup>49</sup>Entr beṇə' golə beṇə' blao ca' toe' le Caifas na' naquəche' bχoz əblao ca izən'. Na' gože' lega'aque: —Le'e caguə bi nezenen'. <sup>50</sup>Nic chonle xbab de que napən chio'o cuentən' tozə ben' gotcho lguala cuiayi' yoguə'əcho len nasyon checho nga.

<sup>51</sup>Caifasən' naquəche' bχoz əblao ca izən' na' caguə con gwne' ca' to gwłazze'lenə'. Dioz nan' bene' par gwɔdixjui'e de que so'ote' Jeso'osən' por nasyon Izrael cheto'onə'. <sup>52</sup>Na' caguə so'ote'ene' par nasyon cheto' na'azənə'. Leczə so'ote'ene' par nich yoguə' beṇə' ca' bagwlej Diozən' par əque'e ca xi'ine' gatə'ətezə nasyon, yesyə'əyaque' tozə so'elaogüe'ene'. <sup>53</sup>Na' ža na' gwzolao boso'oxi'e naclən' so'one' par so'ote'ene'.

<sup>54</sup>Na' de'e nan' bitoch gwda Jeso'osən' zaquə'əlao entr beṇə' gwłaz che'to' ca'. Na' gwza'ato' gwyeyto' to yež de'len nzi' Efrain, chi'in galə'əzə latjə dašən'. Na' gwzoto' na' len le'.

<sup>55</sup>Na' lni pascw che neto' beṇə' Izrael bazon baozə. Na' beṇə' zan beṇə' za'ac to to yež ja'aque' Jerosalennə' antslə ze'e galə' lni pascon' par gwso'on cuinga'aque' xi'ilažə' can' na lei cheto'onə'.

<sup>56</sup>Na' besyə'əyilje' Jeso'osən', na' ca nite'e chyo'o yo'odao' əblao cheton' gwse'e ljuěžje': —İBi xbab chontgualə? İəgüide' lni nga?

<sup>57</sup>Gosə'əne' ca' chedə' bχoz əblao che nasyon Izrael cheton' na' beṇə' fariseo ca' bagwso'one' mendad de

que notə'ətezə beṇə' ənezene' gan' zo Jeso'osən' gwzenene' lega'aque' par nich yesə'əzene'ene'.

**Marian' chgüe'e set zix ni'a Jeso'osən'**

**12** Na' xop ža antslə lni pascon', gwyejlento' Jeso'osən' Betanian' gan' zo Laçhən' ben' bosbane' ladjo beṇə' guat ca'. <sup>2</sup>Na' balə beṇə' Betania ca' boso'osi'ini'e to xše' par Jeso'osən', na' Martən' bdie' de'len güe'ej gwdaoto' len le'. Na' Laçhən' chi'e cho'a mesən' txen len Jeso'osən' na' len neto' na' beṇə' ca' ye'la'. <sup>3</sup>Na' Marian' de tya set zix che' de'e zaquə'əchgüei na' gwlo'en ni'a Jeso'osən'. Na' bxie' ni'ienə' len yišə' yichje'lenə'. Na' doxen yo'onə' gwła'achgua ze set zixən' gwlo'e ni'ienə'. <sup>4</sup>Na' zo Jod Iscariotən', ben' naquə neto' txen. Le'lenə' banaquən əgwdie' Jeso'osən' lao na' beṇə' ca' chəsə'əgue'i le'. Jodən' naque' xi'in to beṇə' le Simon. Na' Jodən' gwne': <sup>5</sup>—İBixchen' cui bete'e set zix nga?

Zaquə'ən do tmlil gueyə' gueyoa. Na' mechən' de'len le'ine' chei əgwnežjue'len beṇə' yašə' žalə' ca'.

<sup>6</sup>Jodən' bene' xbabən' ca' caguə por ni che beyaše'ene' beṇə' yašə' ca' sino por ni che naque' beṇə' bguan. Len' bexe'e mech de'len bchin yoguə'əto' na' gwlejlane' mechən'. <sup>7</sup>Nach Jeso'osən' gože'ene': —İjoye'lenə'. Babene' de'len non gonene' nada' žan' əgaša'anə'. <sup>8</sup>Ca naquə beṇə' yašə' ca', syempr nitə'əcze' len le'e, pero nada' caguə syempr soa' len le'e.

**Bχoz əblao ca' boso'oxi'e so'ote' Laçhən'**

<sup>9</sup>Na' beṇə' zan beṇə' Izrael gwłaz cheton' gwsa'acbe'ine' de que

Jeso'osən' zoe' na'. Na' ja'aque', pero caguə por ni che Jeso'os na'azən', sino par besə'əle'ine' Laçhən', ben' bosban Jeso'osən' ladjo beṇə' guat ca'. <sup>10</sup>Na' b̄xoz əblao che n̄asyon çeton' lec̄zə boso'oxi'e so'ote' len Laçhən', <sup>11</sup>çhedə' beṇə' zan beṇə' Izrael gwlaž çeton' ja'aque' na' gwso'on̄lilaže'e Jeso'osən' por ni che le'.

### Jeso'osən' beyo'e Jerosalennə'

<sup>12</sup>Na' beteyo gwza'ato' Betanian' len Jeso'osən' na' gweyjtə' Jerosalennə'. Na' ca orən' beṇə' zan chəsə'əžag Jerosalennə' beṇə' zja'ac l̄ni pascon'. Na' gosə'ənezene' de que Jeso'osən' yežine' Jerosalennə'. <sup>13</sup>Na' de'le na'anə' besə'əchoje' bedəsə'əleze' neto', zjənoxe'e no zin, na' chəsə'əgü'e be' lban che' chəsə'əne': —Le' naco' Rei che n̄asyon Izrael chechon', goclenšga neto'. Sošgo' mbalaz le' baza'o nga, babselə' Xancho Diozən' le'.

<sup>14</sup>Na' b̄žel to borr dao' bia gwžia Jeso'osən' lao zde'. Goc can' nyojczən nan:

<sup>15</sup>Le'e ža'ale Jerosalennə' bito žeble.

Le'e ggüiašc baza' Rei çhelen' žie' to borr dao'.

<sup>16</sup>Na' neto' disipl che' bito gweyjni'ito' kategazə de que goc che' con can' boso'ozəj de'e profet ca' beṇə' ca' gwso'e xtižə' Diozən' cana'. Gwde gwso'ot beṇə' Jeso'osən' na' Diozən' be'ene' yelə' bala'an̄ xen, na' canan' jəyeza'alazažə'əto' dižə' ca' zjənyoj che' na' gocbe'ito' gwso'one'ene' le' can' nyojčəṇə'.

<sup>17</sup>Beṇə' ca' gwnitə' len Jeso'osən' catə'an̄ bolgüiže' Laçhən' na' bosbane'ene' par bechoje' lo'o ban' gwso'e dižə' len beṇə' ca' ža' syodan' can' bene'ene'. <sup>18</sup>De'e na'anə' bedəsə'əleze'ene' çhedə' gosə'ənezene' ca miłagr de'en bene'. <sup>19</sup>Na' gosə'əna beṇə' fariseo ca' entr lega'aque': —Bachle'ile cuicə bi de gonchon'. Yoguə' beṇə'çhən' zjəsə'ənao le'.

### To çhopə beṇə' griego gwse'ene' əso'elene' Jeso'osən' dižə'

<sup>20</sup>Na' zjəlen balə' beṇə' griego, beṇə' ja'ac l̄ninə' par gwso'elaogü'e Diozən'. <sup>21</sup>Beṇə' quinga besə'əžine' gan' zo Lip beṇə' Betsaida distrit che Galilean'. Na' gwsa'ata'əyoine' Lipən' gwse'ene': —Gwzi'ixenšga, chene'eto' güe'elento' Jeso'osən' dižə'.

<sup>22</sup>Nach gweyč Lipən' jəye' Ndrəsən'. Nach Ndrəsən' len Lipən' jəsə'əye' Jeso'osən'. <sup>23</sup>Nach Jeso'osən' gože' lega'aque': —Na'a bachžin ža so'ot beṇə' nada' par niçh Diozən' gone' nada' yelə' bala'an̄ xen. Len' bsele'e nada' golja' beṇə'çh. <sup>24</sup>De'e li əchnia' le'e, šə to trigon' cui yexinjən catə' əxopən lao yon', chega'an̄czə tozən, pero šə yexinjən na' yela'an, de'e zan trigon' yeyaquan. <sup>25</sup>Notə'ətezə beṇə' chaquene' gone' par niçh cui çhi' saque'e o par niçh cui no so'ot le', be'enan' cuiayi'. Na' notə'ətezə beṇə' chsanlažə' cuine' çhi' saque'e o so'ot beṇə' le' por ni çhia', bade yelə' mban zejlicane che'ene'. <sup>26</sup>Na' notə'ətezə beṇə' chene'ene' gone' xšina'anə', çheyalə' gonlilaže'e nada' na' gwzenague' çhia'. Na' ga'an soa'

na' so ben' gon xšina'anə'. Na' beṇə'  
ca' so'on xšina'anə', Xa'anə' güe'e  
lega'aque' yelə' bala'an.

**Jeso'osən' gwdixjue'e de  
que so'ot beṇə' le'**

<sup>27</sup>Bachžaglaogua' lo'o  
yichjla'aždaogua'anə'. ¿Echaquele  
ṇabda' Xa'anə' yosle' nada' lao  
de'e ca' ze'e gaquə čhia' na'a? Abi.  
Babida' par nič gaquəczə čhia'  
ca'anə'.

<sup>28</sup>Nach bene' orasyonṇə' gwne':  
—Xa', ben par nič le' si'icho' yelə'  
bala'an.

Nach Diozən' ben' zo yoban'  
gwne' gože'ene': —Babena' ca  
gwxia' yelə' bala'an, na' ze'e  
goncha' ca si'icha'annə'.

<sup>29</sup>Beṇə' zan zjənžague' neto' ca  
orən' na' catə' gwse'ene' de'en  
gwna Diozən', baḷe' gosə'əne' de  
que gwṇinnə'. Na' yebaḷe' gosə'əne':  
—To anglən' əgwṇe le'.

<sup>30</sup>Na' Jeso'osən' gože' neto': —  
Diozən' gwne' nada' zižjo caguə  
par nič nada' ənezda' de que  
chzenague' čhia'anə', sino par  
nič əneze le'enə'. <sup>31</sup>Bachžin ža  
catə' Diozən' əgwnežjue' castigw  
zejlicane che beṇə' ca' cui  
zjənobbia' le'. Na' bachžin ža  
catə' gwxie'enə' de'en chnabia'  
beṇə' ca' cui zjənobbia' Diozən' nit  
yelə' gwnabia' cheinə'. <sup>32</sup>Na' catə'  
gwso'ote' nada' le'e yag corozən',  
gona' par nič yoguə'əḷəḷ beṇə'  
bagwlej Diozən' par əsa'aque' xi'ine'  
so'onḷilaže'e nada'.

<sup>33</sup>Na' de'e ngan' gwne' chzejni'ine'  
neto' de que so'ot beṇə' le'  
yoso'ode'ene' to le'e yag coroz.

<sup>34</sup>Nach baḷə beṇə' zan ca' ža'anə'

gwse'ene': —Neto' babeneto'  
choso'osed choso'olo'i beṇə' can'  
na Xtižə' Diozən' de'en nyojən,  
na' nezetə' nan de que Cristən'  
ben' gwlej Diozən' par gaquəlene'  
ṇasyon čhechon' soe' zejlicane. Na'  
le' nao' de que Diozən' bsele'e le'  
goljo' beṇəč. ¿Bixchen' nao' le' de  
que so'ot beṇə' le' to le'e yag coroz?  
¿Ebselə' Diozən' le' goljo' beṇəč?

<sup>35</sup>Nach Jeso'osən' gože' lega'aque':  
—Nada' za'a par əchgua'a be'eni'  
lo'o yichjla'aždao' beṇəčan'.  
Na' yeto term da'ogan' soa' par  
əgwse əgwlo'ida' le'e. Le'e šejle'  
xtiža'anə' žlac ne'e de latjə par  
nič cui cuiayi'ile zejlicane. Beṇə'  
ca' cui chse'ejle'e xtiža'anə' bito  
chsa'acbe'ine' de que yesə'əbiayi'e.  
Zjənaque' ca to beṇə' chda gan' naquə  
žčoḷ na' bito chache'ine' gan' chde'.  
<sup>36</sup>Le'e gonḷilažə' nada' na'a žlac ne'e  
de latjə par nič šo'o be'eni' čhian'  
lo'o yichjla'ažda'olen' na' par nič  
əgwnežjwle be'eni' che yeziquə'əchlə  
beṇə'. Gwde gwna Jeso'osən' ca'  
beze'e bocaše'ene' lega'aque'.

**Zan beṇə' Izrael ca' bito  
gwso'onḷilaže'e Jeso'osən'**

<sup>37</sup>La'anə'əczə besə'əle'i beṇə'  
Izrael gwlaž četon' ben Jeso'osən'  
zan miḷagr, casi yogue'e bito  
gwso'onḷilaže'ene'. <sup>38</sup>Na' de'en goc  
ca' goc complir can' bzoj de'e profet  
Isaiazən' ben' be' xtižə' Diozən'  
cana', nan:

Xanto', casi notono no  
choso'ozenag dižə' de'en  
chyixjue'eto'onə'.

Na' casi notono chsa'acbe'i de  
que babesə'əle'ine' blo'o yelə'  
guac čhio'onə'.

<sup>39</sup>Bito goquə se'ejle'e, chedə' chac chega'aque' can' na yeto de'en bzoj de'e profet Isaiazən', nan:

<sup>40</sup>Diozən' babene' par niçh nažjo yichjla'aždao' beṇə' quinga na' par niçh zjənaque' beṇə' godenag.

Babene' par niçh chəsə'əle'ine' pero cabi chsa'acbe'ine' bi zejen de'en chəsə'əle'ine'enə', na' chse'enene' pero bito chse'ejni'ine' bi zejen de'en chse'enene'enə'.

Gosyə'ədinjljei

xtolə'əga'aque'enə na' gwso'elje' latjə yocobə Diozən' yichjla'ažda'oga'aque'enə' žalə' chse'ejni'ine'en na' žalə' chsa'acbe'ine' bi zejen.

<sup>41</sup>De'e quinga gwna de'e profet Isaiazən' chedə' ble'ine' yelə' chey che'eni' che Jeso'osən' na' be'e dižə' che'.

<sup>42</sup>La'anə'əczə beṇə' zanch lao nasyon Izrael cheton' bito gwse'ejle'e che Jeso'osən', bia'aczə zane' gwso'onlilaže'ene', na' len no beṇə' gwnabia' cheto' ca'. Pero na' bito gwso'e dižə' de que chso'onlilaže'ene' chedə' besə'əžebe' cabich əso'e beṇə' fariseo ca' latjə par so'e lo'o yo'oda'onə'.

<sup>43</sup>Gwse'enchene' so'e beṇachən' lega'aque' yelə' bala'an cle ca so'one' ca güe' Diozən' lega'aque' yelə' bala'an.

Xtižə' Jeso'osən' zjənaquən  
de'e žialao xen

<sup>44</sup>Na' Jeso'osən' gwne' zižjo gože' lega'aque': —Beṇə' ca' chso'onlilažə' nada' caguə nadə'əzan' chso'onlilaže'e sino

lenczə Xa'anə' ben' əbsele' nada'.

<sup>45</sup>Ben' chle'i nada' leczə chle'ine' Xa'anə' ben' bsele' nada'. <sup>46</sup>Nada' za'a yežlyo nga par niçh chgua'a be'eni' lo'o yichjla'aždao' beṇə' ca' chso'onlilažə' nada'. Chgua'a be'eni' lo'o yichjla'ažda'oga'aque'enə' par niçh cuich so'ontezə so'one' de'e malən'. <sup>47</sup>Na' notə'ətezə beṇə' chse'ene xtižə'anə' na' bito choso'ozenague' chei caguə nada' choglaogua'an chega'aque' de que zjənapə' dolə, chedə' bito za'a yežlyo nga par niçh choglaogua'an che beṇachən' de que zjənapə' dolə' sino par niçh gona' ca cui žjəya'aque' lao yi' gabilən' šə so'onlilaže'e nada'. <sup>48</sup>Xtižə'anə' de'en babi'a len lega'aque' choglaon chega'aque' de que zjənapə' dolə' chedə' bito chse'ejle'e chia' na' nic choso'ozenague' che xtižə'anə'. Choglaon chega'aque' de que zjənapə' dolə' catə' əžin ža šo'o fin che yežlyon'. <sup>49</sup>Dižə' de'en babi'anə' bito bi'an de'e bia'azəlaža'a. Xa'anə' bsele'e nada' na' le'enə' none' mendad bin' cheyalə' nia' na' bin' əgwsed əgwlo'ida' beṇə'. <sup>50</sup>Na' notə'ətezə beṇə' yoso'ozenag che xtižə' Xa'anə' de'en none' mendad cho'elena' beṇachən', əgwnežjue' yelə' mban zejlicane chega'aque'. De'e na'anə' cho'elena' le'e dižə' con can' bagwna Xa'anə'.

Gwdib Jeso'osən' ni'a disipl che' ca'

**13** Na' ca naquə Jeso'osən', bedote chaquene' che neto' chonlilažə'əto' le' yežlyo nga. Na' nezene' de que bachžin ža yeze'e yežlyo nga par yeyeje' gan' zo Xe'enə'. De'e na'anə' catə' ze'e

za'alə lni pascon' blo'ichene' neto' can' lechguale' chaquene' cheto'.

<sup>2</sup>Na' bach gwlo'o gwxiye'enə' xbabən' lo'o yichjla'aždao' Jod Iscariot xi'in Simonə' par əgwdie' Jeso'osən' lao na' beṇə' contr che' ca'. <sup>3</sup>Na' neze Jeso'osən' de que Xe'enə' babene' par niç nape' le'ezelaogüe yelə' chnabia' xen, na' nezene' de que gan' zo Dioz nan' gwze'e na' gan' zo Dioz nan' yeyeje'. <sup>4</sup>Na' lao chaoto' xše'enə' Jeso'osən' gwzože'e na' gwcua'a xadon che'enə' na' gwxi'e to lachə' na' bcheje'en lsine'enə'. <sup>5</sup>Nach gwxi'e nisən' gwde'en to lo'o ša' na' gwzolaogüe' gwdbibe' ni'ato'onə' ca to mos. Na' bosbiže' ni'ato'onə' len lachən' de'e nchej lsine'enə'.

<sup>6</sup>Na' catə' bžine' gan' chi' Simon Bedən', Bedən' gože' le': —Xana' ələ' chibo' ni'anə'?

<sup>7</sup>Na' gož Jeso'osən' le': —De'e nga chona' cabi chejni'ido'on na'a, pero gwejni'ido'on telə.

<sup>8</sup>Na' gož Bedən' le': —Le' cuat chibo' ni'anə'.

Na' Jeso'osən' gože'ene': —Šə cui ga'a chiba' le' caguə leno' nada'anə'.

<sup>9</sup>Na' Bedən' gože'ene': —Xana' caguə ni'a na'azən', sino doxencza'.

<sup>10</sup>Nach gož Jeso'osən' le': —Beṇə' nošə' nazjə, ni'e na'azə chyažje chibe', la' banaquəczə doxen cuerp che'enə' xi'ilažə'. Ca naquə le'e ža, naquəczle xi'ilažə' la'anə'əczə caguə yoguə'əle.

<sup>11</sup>Jeso'osən' nezene' non' əgwdie le' lao na' beṇə' contr che' ca', na' de'e na'anə' gwne': “Caguə yoguə'əle nacle xi'ilažə'”, na' zejen caguə yoguə'əto' naquəto' beṇə' la'aždao' xi'ilažə'.

<sup>12</sup>Na' catə' beyož gwdbibe' ni'ato'onə', na' beyaz xadon che'enə' na' bebi'e de'e yoblə cho'a mesən'. Na' gože' neto': —¿Chejni'ile bi zejen de'en babena' len le'e? <sup>13</sup>De'e nga zejen. Le'e nsi'ile nada' Maestr na' Xanle, na' güenczən' nale chedə' can' naca'. <sup>14</sup>Na' nada' naca' Xanlen' na' nactia' Maestr chelen' bagwdiba' ni'alen' ca to mos, de'e na'anə' le'e leczə cheyalə' gaquəlen ljuəžjle ca to mos. <sup>15</sup>Bagwdiba' ni'alen' parzə niç gwlo'ida' le'e de que cheyalə' gonle can' babena'anə'. <sup>16</sup>De'e li əchnia' le'e notə'ətezə mos bito naque' blaoch ca xane'enə', ni ben' chej mendadən' cui naque' blaoch ca ben' chselə' le'. <sup>17</sup>Šə chejni'ile de'e quinga na' gonle can' nia'anə', nachən' sole mbalaz.

<sup>18</sup>Caguə nia' ca' che yoguə'əlen'. Nada' nezdə' nac naquə yichjda'aždao' le'e bagwleja' par nacle disipl chia'. Pero na' gwleja' le'e par niç gaquə complir can' na Xtižə' Diozən' de'en nyojən nan: “Be'en gwdaolena' txen bablej bšoše' nada'.” <sup>19</sup>Nada' əchnia' le'e de'e nga na'a antslə cuiṇə' gaquən, par niç catə' gaquən šejle'ele de que nada' naca' ben' bagwnia' le'e. <sup>20</sup>De'e li əchnia' le'e ben' cho'elao' notə'ətezə beṇə' əchselə'a, nada'anə' cho'elaogüe'e. Na' ben' cho'elao' nada', ben' əbselə' nada' na'anə' cho'elaogüe'e.

**Jeso'osən' be'e dižə' che  
ben' naquən əgwdie le' lao na'  
beṇə' ca' chəsə'əgue'i le'**

<sup>21</sup>Beyož gwna Jeso'osən' de'e ca' bachžaglaogüe' lo'o yichjla'aždaogüe'enə', na' gwne'

clar: —De'e li əchnia' le'e de que to le'e əgwdele nada' lao na' beñe' ca' chəsə'əgue'i nada'.

<sup>22</sup>Nach neto' bgüia lao ljuežjto' chaqueto' noto' chein' ne' ca'.

<sup>23</sup>Nach nada' chi'a cuite'enə' chedə' chacchğüeine' chia'. <sup>24</sup>Na' Bedən' bene' señy len nada' par niçh gwñabda' Jeso'osən' no chein' gwne' ca'. <sup>25</sup>Nach bgüiga'a bao goža' Jeso'osən': —Xana', ¿non'?

<sup>26</sup>Nach gož Jeso'osən' nada': —Be'en əgwnežjua' to pedas yetən' catə' bablo'oja'an xojən', le'enə'.

Nach blo'oje' yetən' xojən' na' bnežjue'en Jod Iscariot xi'lin Simonə'. <sup>27</sup>Na' beyož bnežjue' Jodən' yetən' le'e gwyo'o gwyazte Satanəsən' de'en chnabia' de xio' ca' lo'o yichjla'aždao' Jodən'. Nach Jeso'osən' gože'ene': —De'en gono'onə' benən lğüegwzə.

<sup>28</sup>Na' ni to neto' ža'ato'onə' cui gwyejni'ito' bixchen' gože' le' ca'.

<sup>29</sup>Jodən' noxe'e bols mechən' na' de'e na'anə' bałəto' bento' xbab de que Jeso'osən' gože' le' šeje' žjəxi'e de'e chyažjeto' lao lñin' o de que cheyalə' əgwnežjue' latə' mechən' beñə' yašə' ca'. <sup>30</sup>Na' catə' beyož gwdao Jodən' pedas yetən' de'en bnežjw Jeso'osən' le', le'e bchojte'. Na' ca orən' bagol.

**To de'e cobə de'e non  
Jeso'osən' mendad goncho**

<sup>31</sup>Na' gwde bchoj Jodən' Jeso'osən' gwne': —Diozən' bsele'e nada' golja' beñach, na' na'a so'ot beñə' nada' na' gone' nada' yelə' bala'an xen. Na' leczə Diozən' si'e yelə' bala'an xen ca de'en gaquə chia'. <sup>32</sup>Na' ca naquə Diozən'

si'e yelə' bala'an ca de'en gaquə chia', leczə le'enə' gone' nada' yelə' bala'an, na' le'e solaote gone' nada' yelə' bala'anə' na'a. <sup>33</sup>Xi'indaogua'a, yešlož da'ogan' soa' len le'e. Na' yeyiljle nada', na' can' goža' beñə' blaο che nasyon Izrael chechon', leczə can' əchnia' le'e na'a de que gan' yeya'a bito gaquə sa'alenle nada'. <sup>34</sup>Nach to de'e cobə chona' mendad gonle, de que gague che ljuežjle tole yetole can' chacda' chele, leczə can' le'e gague che ljuežjle tole yetole. <sup>35</sup>Na' yesə'əneze yoguə'əlol beñə' de que nacle disipl chia' šə gaguele che ljuežjle tole yetole.

**Jeso'osən' ne' de que Bedən' cui  
chebe' de que nombi'ene'**

<sup>36</sup>Na' gož Bedən' le': —Xana', ¿gan' yeyejo'?

Na' gož Jeso'osən' le': —Gan' yeya'a bito gaquə denaogo' nada' na'a, pero telə denaogo'.

<sup>37</sup>Na' gož Bedən' le': —Xana' ¿bixchen' cui gaquə denaogua' le' na'a? Gwsanlažə' cuina' so'ot beñə' nada' laogüe de'en chacda' chio' šə chonclən byen.

<sup>38</sup>Na' gož Jeso'osən' le': —¿Echacdo' gwsanlažə' cuino' so'ot beñə' le' laogüe de'en chacdo' chia'? De'e li əchnia' le' de que bito cuež lecon' antslə ze'e gaquə šon las cui chchebo' de que nombi'o nada'.

**Beñə' ca' chso'onlilažə' Jesocristən'  
zjənombi'e X'e' Diozən'**

**14** Bito gaquəžejlažə'əle chia' nada'. Legonlilažə' Diozən', na' leczə legonlilažə' nada'. <sup>2</sup>Gan' zo Xa' Diozən' naquən ca to yo'o

xen gan' ža' de'e zan cuart. Gwnia' le' žalə' cui bi cuart de par le'e. Na' yeya'a žjəyeyenšaogua'a cuart par to tole. <sup>3</sup>Na' catə'an babeyož jəyeyenšaogua'a cuart chelen', yida' yetši'i na' yechi'a le'e socho txen par nič gan' soa' na' so le'e. <sup>4</sup>Banombi'ale gan' yeya'a na' bənezele naquən' gonle par yeda'acle na'.

<sup>5</sup>Na' gož Tomasən' le': —Xanto', bito nezetə' gan' yeyejo'. ¿Na' nacxa gaquən' ənezetə' nac gonto' par yela'ato' na'?

<sup>6</sup>Jeso'osən' gože'ene': —De'en cheyalə' gonle gonlilažə'əle nada' par nič yežinle gan' zo Xa'anə'. Nada' nezdə' na' chzejni'ida' yoguə'əlo' de'en naquə de'e li che Diozən'. Na' nada' nsa'a yelə' mban zejlicane par beṇə' ca' chso'onlilažə' nada'. Ni to cono yežin gan' zo Xa'anə' šə cui gonlilaže'e nada'. <sup>7</sup>Žalə' nombi'ayanə'əle nada', lente Xa'anə' nombi'ale žalə' ca'. Na' dezd na'a banombi'alene' na' bable'ilene'.

<sup>8</sup>Na' gož Lipən' le': —Ben par nič le'ito' Xa'onə'. Lezən de'en chene'eto'.

<sup>9</sup>Jeso'osən' gože'ene': —Lip, sša xen bagwzoa' len le'e, ¿əna' cuinə' gombi'o nada'anə'? Notə'ətezə beṇə' bable'i nada' lenczə Xa'anə' bable'ine'. ¿Bixchen' nao' gona' par nič le'ile Xa'anə'? <sup>10</sup>¿Ecu' chejli'o de que nada' zoa' len Xa'anə' na' Xa'anə' zoe' len nada'? Dižə' quinga cho'a nada', caguə cho'an de'e bia'azəlažə'anə'. Xa' na'anə' zoe' len nada' na' len' chone' par nič cho'a dižə' quinga na' chona' yoguə'əlo' de'en chona'. <sup>11</sup>Le'e šejle' chia' ca de'en ənia' de que zoa' len Xa'anə'

na' le' zoe' len nada'. Na' šə cui chejle'ele xtiža'anə', le'e šejle' chia' por ni che de'en bable'ile chona'anə'. <sup>12</sup>De'e li əchnia' le'e ben' chonlilažə' nada', ca de'e ca' chona' leczə gone'en. Na' de'e zaquə'əch ca de'e ca' gone' chedə' nada' yeya'a gan' zo Xa'anə'. <sup>13</sup>Na' yoguə' de'e ənabele Xa'anə' gona' laogüe de'en chonlilažə'əle nada', gona'an par nič Xa'anə' si'e yelə' bala'an ca de'en gona' naca' Xi'ine'. <sup>14</sup>Bitə'ətezə de'e ənable gona' por ni che de'en chonlilažə'əle nada', nada' gona'an.

**Jeso'osən' bene' iyebe  
sele'e Spirit che Diozən'**

<sup>15</sup>Šə chaquele chia' cheyalə' gonle can' nona' mendad gonle. <sup>16</sup>Na' nabda' Xa'anə' par əsele'e Spirit che'ənə' len le'e par gaquəlenən le'e can' babena' nada'. Na' son len le'e zejlicane. Spirit che Diozən' əgwzejni'in le'e de'en naquə de'e li. <sup>17</sup>Beṇə' ca' cui zjənombia' Diozən' bito chso'elaogüe'e Spiritən' chedə' bito chesə'əle'ine'en na' nic zjənombi'en. Pero le'e nombi'alen chedə' zon len le'e na'a na' gwžin ža catə' son lo'o la'ažda'olen'. <sup>18</sup>Bito gwcua'ana'a le'e ca gozebə. Güida' yeto nga gan' zole. <sup>19</sup>Na' yešlož da'ozə na' beṇə' ca' cui zjənombia' Diozən' cabich yesə'əle'ine' nada', pero le'e gwle'ile nada'. Na' laogüe de'en zoa' nsa'a yelə' mban zejlicane che beṇə' chso'onlilažə' nada', de'e na'anə' le'e sole zejlicane. <sup>20</sup>Na' catə' əžin ža la' Spirit che Diozən' son lo'o la'ažda'olen' canan' ənezele de que nada' zoa' len Xa'anə', na' le'e zole



len nada', na' nada' zoa' len le'e.

<sup>21</sup>Ben' neze can' nona' mendad na' chone' can' ani'anə', bena'an chaque chia'. Na' ben' chaque chia' leczə chaque Xa'anə' che', na' gwzochcza' gaquəda' che' na' gona' par niç ənezene' de que zotezə zoa' len le'.

<sup>22</sup>Na' Jodən' pero caguə Jod Iscariotən' gože' le': —Xanto' ĩbixchen' gono' par niç neto' le'icheto' le' na' cui gono' par niç benə' yoblə yesə'əle'ichene' le'?

<sup>23</sup>Na' Jeso'osən' gože'ene': —Le'e chaquele chia' chzenagle xtiža'anə'. Na' Xa'anə' leczə chaquene' chele na' neto' desoto' len le'e. <sup>24</sup>Benə' ca' cui chsa'aque chia' bito choso'ozenague' xtiža'anə'. Dižə' de'en chenele ənia' le'e, caguə cho'an de'e bia'azəlaža'anə', sino cho'a dižə' de'en chenele Xa'anə' ben' əbsejə' nada'.

<sup>25</sup>De'e quinga bagwnia' le'e žlac ne'e zoa' len le'e. <sup>26</sup>Na' Xa'anə' əsele'e Spirit che'enə' son lo'o la'aždao' le'e chonlilažə'əle nada' niç gaquəlenən le'e. Na' Spiritən' əgwzejni'in le'e yoguə'əloj de'en cheyalə' ənezele na' gonən ca žjəyeyza'alažə'əle yoguə'əloj de'en bagwnia' le'e.

<sup>27</sup>Chona' par niç so cuezle binlo len xbab de'en yo'o lo'o yichjla'ažda'olen' ca binlo zo chbeza' len xbab de'en yo'o lo'o yichjla'aždaogua'anə'. Nada' chona' ca zo chbezəchle binlo len xbab de'en yo'o lo'o yichjla'ažda'olen' cle ca chso'on benəçhən' par so cuezle binlo len xbab de'en yo'o lo'o yichjla'ažda'olen'. Bito gaquəžejlažə'əle, nic žeble.

<sup>28</sup>Babenele can' bagwnia' de que yeya'a gan' zo Xa'anə', na' de que yida' de'e yoblə gan' zolen'. Žalə' chaquele chia' can' cheyalə'ənə', gobeile de'en yeya'a, chedə' Xa'anə' zaquə'əche' ca nada'. <sup>29</sup>Na'a ža bagwnia' le'e de'e ca' antslə cuiñə' sa'aquən par niç catə' sa'aquən šejle'ele de que naca' ben' bagwnia' le'e.

<sup>30</sup>Bitoch gua'a dižə' zan len le'e chedə' baza' gwxiye' de'en chnabia' benə' ca' cui chso'onlilažə' nada' na' tiļəlenən nada'. Pero bito soin nada'. <sup>31</sup>Chona' con can' non Xa'anə' mendad par niç əneze benəçhən' de que chacda' che Xa'anə'. Na'a ža lešo'o šejəchcho.

Jeso'osən' gwxaquə'əlebene'  
ca to yag oba

**15** Nada' gwxaquə'əlebəda' ca to yag oba de'en naquə le'ezelaogüe yag zaque'e. Xa'anə' gwxaquə'əlebene' ca ben' chonš'i'i yaguən'. <sup>2</sup>Na' le'e chonlilažə'əle nada' gwxaquə'əlebele ca xozə' yaguən'. To to xoze'e ca' cui bi frot chbian, chchogue'en. Na' to to xoze'e ca' de'e chəsə'əbia frot, chpe'en par niç chbiachən frot zanch. <sup>3</sup>Can' banaquə yichjla'ažda'olen' chedə' chzenagle xtiža'anə' de'en babi'a len le'e. <sup>4</sup>Lesotezə leso len nada' par niç nada' gaquə sotezə soa' len le'e. Ca che xozə' yag frotən', bito bi frot cuian to gwłazzen šə cui zon nca'an le'e yaguən', can' naquən len le'e, bito gaquə gonle de'en chazlažə' Diozən' šə cui sotezə sole len nada'. <sup>5</sup>De'e yoblə əhia' de que nada' gwxaquə'əlebəda' ca yag oban'

na' le'e ca xoze'enə'. Notə'ətezle šə zotezə zole len nada' na' nada' zotezə zoa' len le'e, gonchguale de'en chazlažə' Diozən'. Pero cuiczə gac gonle de'en chazlaž'e'enə' to gwłazle. <sup>6</sup>Beṇə' cui zotezə zo len nada' əhoje' ca'alə, ca che xozə' yag oban' de'e ca' chchog ben' chonš'i' yaguən' na' chəsə'əbižən. Nach chtobe'en chade'en yi' par chse'eyən.

<sup>7</sup>Šə le'e zotezə zole len nada' na' šə yo'o yichjle xtiža'anə' do tyempte, bitə'ətezə de'e chene'ele ənable len orasyonṇə' de'e sil'iczlə'nə'.

<sup>8</sup>Yełə' bala'an chzi' Xa'anə' catə'ən chonchguale can' chazlaž'e'enə', na' bach chlo'ele de que chonlilažə'əle nada' na' chzenagle chia' can' cheyałə' gonle šə bachonchguale de'en chazlaž'e'enə'. <sup>9</sup>Ca Xa'anə' chaquene' chia', leczə ca' nada' bachacda' chele. Le'e so legon ca gacbe'ile de que chacda' chele.

<sup>10</sup>Šə chonle can' nona' mendadən', nachən' gacbe'ile de que chacda' chele, ca nada' chona' can' non Xa'anə' mendadən' na' chacbe'ida' de que chaquene' chia'.

<sup>11</sup>Bagwnia' le'e ca' par ničh sole mbalaz ca mbalazən' zoa' nada'. Che'enda' sole mbalaz juisy. <sup>12</sup>De'e nga chona' mendad gonle, gaquele che ljuežjle tole yetole can' chacda' chele. <sup>13</sup>Notono nla' beṇə' chaquechene' che ljuežje' mazəchlə can' chaque ben' chsanlažə' cuine' so'ot beṇə' le' par gaquəlene' beṇə' migw che' ca'.

<sup>14</sup>Le'e nacle migw chia' šə chonle can' nona' mendadən'. <sup>15</sup>Bitoch ənia' le'e mos chia' chedə' beṇə' zjənaquə mos bito zjənezene' bi

chon xanga'aque'enə'. Bania' le' migw chia', chedə' yoguə'əloł de'e ca' babenda' gwna Xa'anə' babzejni'ida'an le'e. <sup>16</sup>Caguə le'e gwlejlə nada' par naca' Xanle. Nada' bagwleja' le'e par chonlilažə'əle nada'. Na' chselə'a le'e par ničh šejəchle gonchguale can' chazlažə' Xa'anə' na' caguə de'e te che de'e ca' gonlen'. Na' šə gonle can' chazlaž'e'enə', yoguə'əloł de'en ənabele Xa'anə' laogüe de'en chonlilažə'əle nada', gon'en. <sup>17</sup>De'e nga de'en chona' mendad gonle, de que gaquele che ljuežjle tole yetole.

**Beṇə' ca' cui zjənombia' Diozən'  
chəsə'əgue'ine' beṇə' ca'  
choso'ozenag che Jeso'osən'**

<sup>18</sup>Bito yebanele de'en chəsə'əgue'i beṇə' ca' cui zjənombia' Diozən' le'e. Legon xbab de que zgua'atec nadan' besə'əgue'ine' antslə ca le'e. <sup>19</sup>Žalə' nacle txen len beṇə' ca' cui zjənombia' Diozən', gwsa'aque'ne' chele can' chsa'aque'ne' che beṇə' ca' zjənaque' txen. Nada' bagwleja' le'e par naole nada', na' bitoch nacle txen len beṇə' ca' cui zjənombia' Diozən', na' de'e na'anə' chəsə'əgue'ine' le'e. <sup>20</sup>Le'e žjsa'alazə' de'en bagwnia' le'e: "Notə'ətezə mos bito naque' blaoch ca xane'enə'." Can' baboso'olagzežə bosə'olagzide' nada', leczə can' yoso'olagzežə yoso'olagzide' le'e. Žalə' bosə'ozenague' xtiža'anə', leczə gosə'əzenague' xtižə'əlen'. <sup>21</sup>Na' yoguə' de'e ca' so'one' len le'e chedə' le'e chonlilažə'əle nada' na' lega'aque' bito zjənombi'e Xa'anə' ben' bsełə' nada'.

<sup>22</sup>Žalə' nada' cui bida', na' žalə' cui bia'a dižə' len lega'aque',

bito zjənapə' dolə' ca naquən'  
 chəsə'əgue'ine' nada'. Na' n̄a'  
 cuiczə bi de bi yoso'ode'ine' par  
 yesə'əne' cui bi dolə' zjənapə'.  
<sup>23</sup>Ben' chgue'i nada', lenczə X̄a' nan'  
 chgue'ine'. <sup>24</sup>Žalə' cui bena' entr  
 lega'aque' miłagr de'e cuiṇə' gon ni  
 to beṇə' yoblə, bito zjənapə' dolə'  
 ca naquən' chəsə'əgue'ine' nada'.  
 Pero n̄a'a babesə'əle'ine' de'e ca'  
 chona' na' bia'aczə chəsə'əgue'ine'  
 nada' na' len X̄a'anə'. <sup>25</sup>Pero na'  
 chac ca' par niḅh chac complir can'  
 na Xtižə' Diozən' gan' nyojən nan:  
 "Besə'əgue'ine' nada' sin cui bi bi  
 de'e mal bena'."

<sup>26</sup>Bagwnia' le'e de que sełə'a  
 Spirit che X̄a' Diozən' par  
 gaquəlenən le'e na' par əgwzejni'in  
 le'e de'en naquə de'e li. Spiritən'  
 sa'an gan' zo X̄a'anə' la' sełə'an  
 par güe'en xtižə'anə'. <sup>27</sup>Na' leczə  
 ca' le'e güe'ele xtižə'anə', chedə'  
 bagwzole len nada' dezd catə'ən  
 gwzolaə chyixjui'a xtižə' X̄a'  
 Diozən'.

**16** Bagwnia' le'e de'e ca'  
 par niḅh cui yebiguə'əle  
 gosxanlə. <sup>2</sup>Yesyə'əbeje' le'e lo'o  
 yo'odao' chēga'aque' ca'. Na' bazon  
 əžin ža catə' notə'ətezə beṇə'  
 se'enene' so'ote' le'e so'one' xbab  
 yebei Diozən' lega'aque' de'en  
 so'one' ca'. <sup>3</sup>So'one' ca' len le'e  
 chedə' cui zjənombi'e X̄a'anə' na' ni  
 nada' cui zjənombi'e. <sup>4</sup>Na' bagwnia'  
 le'e ca' par niḅh catə' əžin ža gac ca'  
 žjəsə'alazə'əle de que bagwnia' le'e  
 can' gaquən.

#### De'e chon Spirit che Diozən'

Catə'ən gwleja' le'e par nacle  
 disipl chia' bito gwnia' le'e yoguə'

de'e ca' gac chele, chedə' gwnezdə'  
 socha' len le'e. <sup>5</sup>Na' la'anə'əczə  
 yeya'a n̄a'a gan' zo X̄a'anə' ben'  
 əbselə' nada', ni tole cui chṇabele  
 nada' bi zejen de'en yeya'anə'.  
<sup>6</sup>Na' de'en bagwnia' le'e de'e ca'  
 bachacchgüeile lo'o la'ažda'olen'.  
<sup>7</sup>Pero de'e li əchnia' le'e napən  
 le'e cuent yeya'a, la' šə cui yeya'a  
 Spirit che Diozən' de'en gaquəlen  
 le'e bito yedəson lo'o la'ažda'olen'.  
 Na' de'en yeya'anə' əselə'an len le'e.  
<sup>8</sup>Na' catə'əch yidə'ən əgwzejni'in  
 beṇəchən' de que zjənapə' dolə',  
 əgwzejni'in lega'aque' de que  
 naca' le'ezelaogüe beṇə' güen,  
 na' əgwzejni'in lega'aque' de  
 que gatə' castigw zejlicane che  
 notə'ətezə beṇə' cui choso'ozenag  
 chia'. <sup>9</sup>Egwzejni'in lega'aque'  
 de que zjənapə' dolə' de'en cui  
 chso'onjilažə'e nada'. <sup>10</sup>Egwzejni'in  
 lega'aque' de que naca' le'ezelaogüe  
 beṇə' güen chedə' yeya'a gan' zo  
 X̄a'anə' na' bitoch le'ile nada'. <sup>11</sup>Na'  
 əgwzejni'in lega'aque' de que gatə'  
 castigw zejlicane che notə'ətezə  
 beṇə' cui choso'ozenag chia', chedə'  
 gwxiye' de'en chnabia' beṇə' ca' cui  
 zjənombia' Diozən' banchoglaon  
 chei de que si'in castigw zejlicane.  
<sup>12</sup>Nedech de'e zan de'e əṇia'  
 le'e, pero zdebə naquən n̄a'a par  
 šejni'ilen. <sup>13</sup>Pero catə' yedəso  
 Spirit che Diozən' lo'o la'ažda'olen'  
 par əgwzejni'in le'e de'en naquə  
 de'e li, əgwsed əgwlo'in le'e  
 yoguə'əloł de'en cheyałə' ənezele  
 chia' nada'. Bito güe'en dižə' de'e  
 bia'azləžə'i sino güe'en bitə'ətezə  
 dižə' de'en chzene X̄a'anə' len  
 na' chixjue'in le'e biquə' de'e ze'e  
 za'ac. <sup>14</sup>Gonən nada' yełə' bala'an,

chedə' əgwzejni'in le'e chia'  
nada'. <sup>15</sup> Xa'anə' babene' ca nezdə'  
yoguə'əlo' de'en nezene' na' de'e  
na'anə' gwnia' de que Spirit che'enə'  
əgwzejni'in le'e de'e ca' nezdə'.

**Jeso'osən' gože' disipl che' ca'  
de que nite'e trist to tyemp  
dao' na' techlə yesyə'əbeine'**

<sup>16</sup> Yeto tyemp dao' le'e bitoch le'ile  
nada'. Na' techlə yeto tyemp dao'  
yoblə na' yezle'ile nada' nach yeya'a  
gan' zo Xa'anə'.

<sup>17</sup> Na' balə neto' disipl che' gož  
ljuežjto': —¿Bi zejen de'e nga che'e  
chio'o de que yeto tyemp da'ozə  
na' bitoch le'ichone' na' de que  
techlə yeto tyemp dao' yoblə na'  
yezle'ichone'? ¿Na' bi zejen de'en  
ne' yeyeje' gan' zo Xe'enə'? <sup>18</sup> ¿Bi  
zejen de'en ne' yeto tyemp da'ozə  
ža? Cuili bixchen' ne' ca'.

<sup>19</sup> Na' gocbe'i Jeso'osən' de que  
chene'eto' nabeto'one' bi zejennə',  
na' gože' neto': —¿Ede'e ngan'  
de'en chnabe ljuežjle? ¿Echene'ele  
ənezele bi zejen ca de'en gwnia'  
le'e de que yeto tyemp da'ozə na'  
bitoch le'ile nada', na' techlə yeto  
tyemp dao' yoblə na' yezle'ile  
nada'? <sup>20</sup> De'e li chnia' le'e de que  
bazon cuežle na' yegüine'ele na'  
benə' ca' cui zjənombia' Diozən'  
yesyə'əbeine'. Yeyašə'əlažə'əle pero  
con to tyemp da'ozən' na' techlə  
yebeile. <sup>21</sup> Šə catə' chzan to no'olə,  
chžaglaogüe' lao chaque' bes che  
yelə' sanə'. Pero na' catə' bagoljə  
bda'onə' bitoch chone' xbab che  
de'en bžaglaogüe'enə' de'e tant  
chebeine' de que bagoljə yeto  
benəch yežlyo nga. <sup>22</sup> Leczə can'  
len le'e, na'a sole trist, pero catə'

yežagcho de'e yoblə cana' yebeile  
lo'o la'ažda'olen'. Na' ni to cono  
yeca'a yelə' chebei chelen'.

<sup>23</sup> Na' catə' babžin ža soa' gan' zo  
Xa'anə' de'e yoblə bito yažjele bi  
ənable gona' par le'e. De'e li əchnia'  
le'e bitə'ətezə de'e ənabele Xa'anə'  
laogüe de'en chonlilažə'əle nada',  
gone'en par le'e. <sup>24</sup> Xte na'a cuiczə  
bi ne'e nabele Xa'anə' ye'elene'  
de que chnablen por ni che de'en  
chonlilažə'əle nada'. Na' na'a lenabe  
Xa'anə' bi de'en ənabelene' ye'elene'  
ca', na' gone' can' ənabelene' par  
nič sole mbalaz juisy.

**Jesocristən' babene' par nič  
gwxiye'enə' cuich nabia'an chio'o**

<sup>25</sup> De'e zan de'e ca' bagwnia' le'e  
babzejni'ida'an len jempl. Ežin žan'  
catə' bitoch əgwzejni'ida' le'e len  
jempl sino clar chixjue'ida' le'e che  
Xa'anə'. <sup>26</sup> Na' catə' babžin ža soa'  
gan' zo Xa'anə' de'e yoblə, cana'ach  
ənabele Xa'anə' bi de'en ənabelene'  
ye'elene' de que chnablen por ni  
che de'en chonlilažə'əle nada'. Na'  
bito ənia' le'e de que nada' naba'  
lao Xa'anə' par nič gaquəlene' le'e.  
<sup>27</sup> Cuinczə Xa'anə' chaque' chele  
por ni che de'en bachejle'ele de que gwza'a  
gan' zoe'enə'. <sup>28</sup> Gan' zo Xa'anə'  
gwza'a babida' yežlyo nga. Na' na'a  
yeza'a yežlyo nga na' yeya'a gan' zo  
Xa'anə'.

<sup>29</sup> Na' neto' disipl che' gožto'one':  
—Na'a cho'o dižə'an clar. Bito  
cho'o dižə' len jempl de'e cui  
chejni'ito'. <sup>30</sup> Na' chache'ito' de que  
nez nle'ido' xbab che benəchən'.  
Bito chyažjdo' no əna le' bin'  
chse'ene'ene' yesə'ənezene'. De'e

na'anə' chejle'eto' de que gwza'o gan' zo Diozən'.

<sup>31</sup>Na' gwna Jeso'osən' neto':

—¿Ena'a chejle'ele ža? <sup>32</sup>Gwžin or na' na'a baza'an catə' gasə'əlasle. To tole ca'ale xnez che chele na' əgwcuə'anle toza'. Pero caguə zoa' toza'anə' chedə' Xa'anə' zoe' len nada'. <sup>33</sup>Bagwnia' le'e ca' par nič so cuezle binlo len xbab de'e yo'o lo'o yichjla'ažda'olen' laogüe de'en chonlilažə'əle nada'. Yežlyo nga čhi' saquə'əle, pero bito žeble, nada' babena' par nič gwxiye'enə' cuich nabia'an le'e.

Jeso'osən' bene' orasyon par nič gaquəlen Diozən' disipl čhe' ca'

**17** Gwde gwna Jeso'osən' ca', bgüie' yobalə na' gwne': — Xa', babžin or par gaquə čhia' can' babžio' bia' gaquə. Ben nada' yełə bala'an par nič leczə ca' nada' gona' le' yełə bala'an, nadan' naca' Xi'inə'. <sup>2</sup>Babeno' nada' yełə chnabia' lao yoguə' benəč par nič chnežjua' yełə' mban zejlicane che yoguə'əloł noquə' benə' ca' bagwlejo' par chso'onlilažə'e nada'. <sup>3</sup>Na' benə' ca' zjənapə yełə' mban zejlicanen' zjənombi'e le' ca tozon' zaco'o par güe'ela'oto', na' leczə zjənombi'e nada' Jesocrist ben' əbsəlo'onə'.

<sup>4</sup>Babena' le' yełə' bala'an yežlyo nga ca de'en babeyož bena' yoguə'əloł de'en gwlo'o lao na'a gona'. <sup>5</sup>Na'a ža Xa', ben par nič yezi'a yełə' bala'an čhia'anə' catə' yela'a gan' zo'onə' ca yełə' bala'an de'en gwdapa' catə'an gwzoa' len le' antslə ze'e xə yežlyo nga.

<sup>6</sup>Bagwlejo' balə benəč par chso'onlilažə'e nada' na'

bablo'iga'acda'ane' naquən' naquə yichjla'aždaog'o'onə' na' naquən' chono'. Zjənaque' xi'inə', na' beno' par nič chso'onlilažə'e nada' na' chso'one' can' nono' mendadən'. <sup>7</sup>Na' bazjənezene' de que yoguə'əloł de'en chona' na' yoguə' dižə' de'en cho'a za'an che cuino'. <sup>8</sup>Babe'elena' lega'aque' dižə' de'en beno' mendad güe'elenga'aca'ane', na' bazjənonen čhega'aque'. Na' bachsa'acbe'ine' de que de'e liczə gwza'a gan' zo'onə', na' chse'ejle'e de que len' əbsəlo'o nada'.

<sup>9</sup>Chnabda' le' gaquəleno' lega'aque'. Caguə chnabda' le' gaquəleno' yoguə' benəčən', sino gaquəleno' benə' ca' zjənaquə xi'inə', benə' ca' gwlejo' par chso'onlilažə'e nada'. <sup>10</sup>Na' yoguə' benə' ca' chso'onlilažə' nada' zjənaque' xi'inə'. Na' ca'acžən' naquən, notə'ətezə benə' zjənaquə xi'inə' leczə zjənaque' xi'inə'. Echzi'a yełə' bala'an de'en chso'onlilažə'e nada' na' de'en chso'one' bichlə de'en chso'one'enə'.

<sup>11</sup>Na' na'a caguə socha' yežlyo ngan', pero benə' quinga nitə'əczel' yežlyo nga. Nada' bazeza'a gan' zo'onə'. Xa', naco' le'ezezaogüe benə' la'aždao' xi'ilažə'. Na' ca naquə benə' ca' gwlejo' par chso'onlilažə'e nada', bcuasə' bcue'ejga'aque' len de'e malən' por yełə' chnabia' čhio'onə'. Bcuasə' bcue'ejga'aque' len de'e malən' par nič əsa'aque' tozə len lježjga'aque'enə' ca chio'o naccho tozə. <sup>12</sup>Bedote žlac zoa' len lega'aque' babcuasə' bcue'ejga'aca'ane' len de'e malən' por yełə' chnabia' čhio'onə'. De'e na'anə' ni toga'aque' cui gwžiyai'

sino tozə ben' banaquəczən cuiayi'e par niç gaquə complir can' na Xtizo'onə' de'en nyojən.

<sup>13</sup>Na' n̄a'a bazeza'a gan' zo'onə', na' cho'a dižə' quinga lao orasyonnə' žlac n̄e'e zoa' yežlyo nga par niç lega'aque' n̄itə'əchgüe' mbalaz ca mbalazən' zoa' nada'.

<sup>14</sup>Nada' babe'elenga'aca'ane' xtižo'onə'. Pero na' beṇə' ca' cui zjənobbia' le' chəsə'əgue'ine' beṇə' ca' chso'onl̄ilažə' nada' por ni che de'en cuich zjənaque' txen len lega'aque', ca nada' cui naca' txen len beṇə' ca' cui zjənobbia' le'. <sup>15</sup>Na' ca naquə beṇə' ca' chso'onl̄ilažə' nada', caguə chṇabda' le' yeca'aga'aco'one' lao yežlyo ngan', sino chṇabda' le' par əgwcuasə' əgwcu'e'jga'aco'one' len de'en chon gwxiye'enə'.

<sup>16</sup>Bito zjənaque' txen len beṇə' ca' cui zjənobbia' le' ca nada' cui naca' txen len beṇə' ca' cui zjənobbia' le'. <sup>17</sup>Ben par niç beṇə' ca' chso'onl̄ilažə' nada' so'on cuinga'aque' lažə' na'onə' laogüe de'en bazjənobbi'e dižə' l̄i chio'onə'. Yoguə'əlołte de'en babzejni'ido' lega'aque' naquən de'e l̄i. <sup>18</sup>Len' bseło'o nada' yežlyo nga par chzejni'ida' benəchən' dižə' l̄i chio'onə', na' leczə ca' nada' bachsela'a lega'aque' par yoso'ozejni'ine' benəchən' dižə' l̄i chio'onə'. <sup>19</sup>Zoa' chon cuina' lažə' na'onə' chedə' chacda' che beṇə' ca' chso'onl̄ilažə' nada'. Na' chona' ca' par niç lega'aque' so'on cuinga'aque' lažə' na'onə' laogüe de'en bazjənobbi'e dižə' l̄i chio'onə'.

<sup>20</sup>Na' ca naquə chṇaba' gaquəleno' beṇə' ca', bito chṇaba' gaquəleno'

lega'acze' sino leczə gaquəleno' beṇə' ca' so'onl̄ilažə' nada' catə' əse'enene' dižə' de'en əsoe' beṇə' ca'. <sup>21</sup>Xa', ben par niç yoguə'əlołe' əsa'aque' tozə len l̄juežjga'aque' ca le' naco' tozə len nada' na' nada' naca' tozə len le'. Ben ca əsa'aque' tozə laogüe de'en zjəngode'e txen len chio'o, par niç beṇə' ca' cui zjənobbia' le' se'ejle'e de que len' əbseło'o nada'. <sup>22</sup>Babeno' par niç chsa'acbe'i beṇə' de que nono' nada' yełə' bala'an, ca'aczən' chona' nada' par niç chsa'acbe'ine' de que chnežjua' lega'aque' yełə' bala'an. Na' chona' ca' par niç əsa'aque' tozə len l̄juežjga'aque' ca chio'o naccho tozə. <sup>23</sup>Lega'aque' zjəngode'e txen len nada' na' nada' ngoda'a txen len le' niç yoguə'əcho gaccho tozə na' ca' beṇə' ca' cui zjənobbia' le' yesə'əneze' de que len' əbseło'o nada' na' de que chacdo' che beṇə' ca' zjəngodə' txen len nada' can' chacdo' chia'.

<sup>24</sup>Xa', bachacdo' chia' antslə ze'e x̄e yežlyo nga. De'e na'anə' beṇo' nada' yełə' chey che'eni'inə'. Na' che'enda' de que beṇə' ca' bagwlejo' par chso'onl̄ilažə'e nada' n̄ite'e len nada' gan' so'anə' par niç yesə'əle'ine' yełə' chey che'eni' chia'anə'. <sup>25</sup>Xa', le' naco' le'ezelaogüe beṇə' güen, na' ca naquə beṇə' ca' cui chso'onl̄ilažə' nada' bito zjənobbi'e le', pero nada' nombi'a le' na' beṇə' ca' bagwlejo' par chso'onl̄ilažə'e nada' bazjəneze' de que len' əbseło'o nada'. <sup>26</sup>Na' babena' par niç zjəneze' can' naquə yichjla'aždaog'o'onə' na' can' chono', na' n̄e'e gonchcza' ca yesə'əneze'.

Chzejni'iga'acda'ane' can' naquə  
yichjla'aždaogo'onə' na' can' chono'  
par nich əsa'acbe'ine' de que  
chacdo' čhega'aque' can' chacdo'  
chia' nada' na' par nich sotezə soa'  
len lega'aque'.

**Jodən' bdie' Jeso'osən'  
lao na' soldad ca'**

**18** Na' ca beyož gwna  
Jeso'osən' de'e ca', neto'  
disipl čhe' gwza'ato' len le' gwyejto'  
šļa'a yao Sedron gan' gotə' to güert,  
na' gwyo'oto' len le'. <sup>2</sup>Na' Jodən'  
ben' banaquən gone' Jeso'osən'  
lao na' beṇə' ca' chəsə'əgue'i le'  
nombi'e güertən', chedə' zan las  
bagwyejto' len Jeso'osən' lo'o  
güertən'. <sup>3</sup>Na' bχoz əblao ca' na'  
beṇə' fariseo ca' bososele'e xonj  
soldad na' len xa'ag yo'oda' ca'  
zja'aclene' Jodən' par jəsə'əxene'  
Jeso'osən' lo'o güertən'. Zja'aque'  
gan' zo Jeso'osən' zjənoxe'e lintern,  
yi' yech na' spad. <sup>4</sup>Jeso'osən'  
banezene' yoguə'əlo' de'en  
gaquə che', nach bchoje' jəšague'  
lega'aque' nach gože': —čNon'  
cheyiljle?

<sup>5</sup>Na' gwse'ene': —Jeso'os beṇə'  
Nasaret.

Na' gož Jeso'osən' lega'aque':  
—Nada'anə'.

Na' len Jodən' lega'aque', ben'  
banaquən gone' Jeso'osən' lao  
na'aga'aque'enə'. <sup>6</sup>Na' catə' gože'  
lega'aque': “Nada'anə'”, le'e  
besyə'əbiguə'əte' gosxanlə na'  
gosə'əbixə' gwsa'ate'e lao yon'. <sup>7</sup>Na'  
de'e yoblə gože' lega'aque': —čNon'  
cheyiljle?

Na' lega'aque' gosə'əze'ene': —  
Cheyiljto' Jeso'os beṇə' Nasaret.

<sup>8</sup>Na' gwna Jeso'osən': —Bagwnia'  
le'e de que nada'anə'. Na' šə nadan'  
cheyiljle, le'e güe' latjə žjəya'ac  
beṇə' quinga.

<sup>9</sup>Gože' ca' par nich goc  
complir can' gwne' de que ni to  
beṇə' ca' bagwlej Diozən' par  
chso'onlilaže'ene' cui yesə'əbiayi'e.  
<sup>10</sup>Na' Simon Bedən' no'e to spad  
na' golje'en gwchogue' nag liča  
xmos beṇə' gwnabia' che bχoz  
ca'. Na' mosən' le' Malco. <sup>11</sup>Na'  
Jeso'osən' gože' Bedən': —Bego'o  
spad čhio'onə' lo'o liže. čEchaquele  
gonle par nich cui čhi' saca'a can'  
babsi' Xa'anə' xneze čhi' saca'a?

**Gosə'əche'e Jeso'osən'  
lao ben' le Anas**

<sup>12</sup>Nach soldad ca' len capitán  
čhega'aque'enə' na' zjəlen xa'ag  
yo'oda' che nasyon Izrael  
čheton' gosə'əzene' Jeso'osən'  
na' bosoccheje'ene'. <sup>13</sup>Na'  
gosə'əche'ene' zgua'atec lao Anas  
xta'obin' che Caifasən'. Caifasən'  
naquəche' bχoz əblao che nasyon  
čheton' ca izən'. <sup>14</sup>Na' Caifas na'anə'  
babnežjue' beṇə' bla' čhe nasyon  
Izrael čheton' consejon' de que  
napən lega'aque' cuent tozə ben'  
so'ote' lgu'a yesə'əbiayi' yogue'e  
len nasyon čheto'onə'.

**Bedən' bito gwchebe' šə  
lene' Jeso'osən'**

<sup>15</sup>Simon Bedən' na' nada' jənaoto'  
Jeso'osən'. Na' nombia' bχoz  
əblaonə' nada'. De'e na'anə' goc  
gwyo'a len Jeso'osən' chy'o  
che bχoz əblaonə'. <sup>16</sup>Na' Bedən'  
bega'anə' cho'a puertən' fuerlə. Na'  
bechoja' na' be'elena' no'olən' chapə



cho'a puertən' dižə', nach gwlo'o no'olən' Bedən' čhedə' nombia' bχoz əblaonə' nada'. <sup>17</sup>Nach no'olən' chapə cho'a puertən' gože' Bedən': —¿Ecaguə leno' len' naco' disipl čhe be'enə'?

Na' gwne': —Bito lena' nada'.

<sup>18</sup>Na' mos ca' na' x'a'ag yo'odao' ca' bagosə'əbeque' yi' ya'alj čhedə' chac zag. Na' zjəzeche' cho'a yi'inə' par chəsyə'əže'ine'. Na' len Bedən' zeche' len lega'aque' cho'a yi'inə' par cheže'ine'.

**Gosə'əhəbene' Jeso'osən' čhe de'en chsed chlo'ine'**

<sup>19</sup>Na' bχoz əblaonə' gwñabene' Jeso'osən' čhe neto' disipl čhe' na' čhe de'en chsed chlo'ine'.

<sup>20</sup>Nach Jeso'osən' gože'ene': —Nada' zaquə'əlao babi'a dižə' len beñəçən'. Syempr babsed blo'ida' lo'o yo'odao' čhecho ca' na' leczə ca' lo'o yo'odao' əblaonə' gan' chəsə'əžag yoguə' beñə' Izrael gwlaž čhechon'. Bito bi bi dižə' nē'e gua'a bgašə'əzə. <sup>21</sup>¿Bixçhen' chñabdo' nada'? Gwñabe beñə' ca' bagwse'ene de'en babsed bablo'ida'. Lega'aque' zjənezene' bi dižə'an babe'elenga'aca'ane'.

<sup>22</sup>Gwde gwna Jeso'osən' ca', to x'a'ag yo'odao' beñə' zechan' gwdape'le xague'enə', nach gože'ene': —¿Eca' choži'o xtižə' ben' naquə bχoz əblaonə'?

<sup>23</sup>Nach gož Jeso'osən' le': —Šə bi de'e mal bagwnia', be' dižə' čhe bi de'e malən'. Na' šə gwnia' de'e güen, ¿bixçhen' chgapo'o nada'?

<sup>24</sup>Nach Anasən' bdie' Jeso'osən' ncheje' lao Caifasən' ben' naquəch bχoz əblaonə'.

**De'e yoblə Bedən' bito gwçhebe' šə lene' Jeso'osən'**

<sup>25</sup>Na' Bedən' nē'e zeche' cho'a yi'inə' par cheže'ine' na' beñə' ca' zjəzecha na' gosə'əze'ene': —¿Ecaguə leczə lenon' naco' disipl čhe be'enə'?

Na' bito gwçhebe', na' gwne': —Bito lena' nada'.

<sup>26</sup>To xmos beñə' gwnabia' čhe bχoz ca' naque' family čhe ben' əgwçhog Bedən' nague', na' gože' Bedən': —¿Ecaguə zle'ida' le' len Jeso'osən' lo'o güertən'?

<sup>27</sup>Na' Bedən' de'e yoblə bito gwçhebe', na' le'e gwçheže to lecw.

**Gosə'əçhe'e Jeso'osən' lao Pilatən'**

<sup>28</sup>Na' do che'eni'iilas bχoz əblao ca' gosə'əbeje' Jeso'osən' gan' zo Caifasən' na' gosə'əçhe'ene' gan' chon Pilatən' yełə' jostisən'. Na' lega'aque' bito gwso'e len Jeso'osən' gan' chon Pilatən' yełə' jostisən' čhedə' segon costombr čhega'aque' bito gaquə əsa'ogüe' de'e ca' gwso'one' par xše' lni pascon' šə so'e lo'o yo'o čhe beñə' ca' cui chəsə'ənao costombr čhega'aque' ca'. <sup>29</sup>De'e na'anə' Pilatən' bchoje' gan' nitə' beñə' blao čhe nasyon Izrael čheton' na' gože' lega'aque': —¿Bi ben bengan'? ¿Ede bi de'e chaole xya?

<sup>30</sup>Na' gwse'ene': —Žalə' bengə cui naque' beñə' mal bito əgwdeto'one' lao na'onə'.

<sup>31</sup>Na' gož Pilatən' lega'aque': —Le'e yeçhe'e na' le'e gon yełə' jostis čhe'enə' segon lei çhelen'.

Na' beñə' blao čhe nasyon Izrael čheton' gwse'ene': —Bito bi lens çheto' de par no gotto'.

<sup>32</sup>Ca goquən' goc complir can' gwna Jeso'osən' bzejni'ine' naquən' gaquə so'ote'ene'. <sup>33</sup>Nach Pilatən' beyo'e gan' chone' yelə' jostisən', na' goxe' Jeso'osən' nach gože'ene': —İElen' naco' Rei che beṇə' Izrael ca'?

<sup>34</sup>Jeso'osən' gože'ene': —İEcon de'e babidzən yichjo'onə' nao' ca', o šə beṇə' yoblə gosə'əne' le' ca'anə'?

<sup>35</sup>Pilatən' gože'ene': —İEchacdo' naca' nada' beṇə' Izraelən'? Beṇə' gwlaž chio' ca' na' bχoz əblao chele can' bosodie' le' lao na'a nga. İBi de'e xinjnən' beno'?

<sup>36</sup>Nach Jeso'osən' gože'ene': —Nža'alə can' chnabia' nada' na' nža'alən' chəsə'ənabia' notə'ətezəchlə beṇə' gwnabia'. Yelə' gwnabia' chi'anə' bito za'an che beṇə' ža' yežlyo nga. Žalə' za'an che beṇə' ža' yežlyo nga beṇə' ca' chəsə'ənabi'anə' yesə'ədile' par ničh cui gaca' lao na' beṇə' Izrael gwlaž chia' quinga. Pero yelə' chnabia' chia'anə' bito za'an che yežlyo nga.

<sup>37</sup>Nach gož Pilatən' le': —İEna' rein' naco'?

Na' gwna Jeso'osən': —De'e lin' bagwnao' de que nada' naca' rei. Babida' yežlyo nga golja' par ničh nabi'a na' par ničh əgwzejni'ida' beṇə'chən' dižə' li che Diozən'. Beṇə' ca' bachoso'ozenag che dižə' li che Diozən' leczə choso'ozenague' chia'.

<sup>38</sup>Nach gož Pilatən' le': —Cuili bin' naquə dižə' lin'.

**Gosə'əchoglaogü'e'n  
so'ote' Jeso'osən'**

Na' beyož gwna Pilatən' ca' bchoje' yetš'i' gan' nitə' beṇə' blao che nasyon Izrael cheton' na' gože'

lega'aque': —Bito bi chla'alaon šə bi dolə'ənə' napə benga. <sup>39</sup>Na' ca naquə de costombr chele de que to beṇə' presən' gwsana' lao lni pascon', čəchene'ele gwsana' benga naquə Rei che le'e beṇə' Izrael?

<sup>40</sup>Nach gwsosye'e gosə'əne': —Bito gwsano' be'ena'. Barrabas na' əgwsano'.

Len Barrabasən' naque' to beṇə' bguan.

**19** Nach ben Pilatən' mendad gosə'əyine' Jeso'osən'. <sup>2</sup>Na' soldad ca' gwsone' to coron de xis yešə' na' bosozine'en yichje'enə'. Na' bosozine'enə' to clas lachə' morad ca de'en chəsə'əchin rei ca'. <sup>3</sup>Na' gwo'onene' borl gosə'əne': —Biba Rei che beṇə' Izrael.

Na' gosə'əgape'e xague'enə'.

<sup>4</sup>Nach Pilatən' bchoje' chyo'onə' de'e yoblə na' gože' beṇə' Izrael ca' ža'anə': —Na'a cueja'ane' par ničh ənezele ca xyan' de'en chaole che', ni to de'e xinj cui cheželda' šə bin' none'.

<sup>5</sup>Na' bchoj Jeso'osən' chyo'onə', zo coron de yešə'ənə' yichje'enə', na' nyaze' lachə' moradən'. Na' gož Pilatən' lega'aque': —Le'e ggüia, nga zecha be'enə'.

<sup>6</sup>Na' bχoz əblao ca' na' x'a'ag yo'odao' ca', catə' besə'əle'ine' le' gwsosye'e gosə'əne': —İBde'e le'e yag corozən'! İBde'e le'e yag corozən'!

Pilatən' gože' lega'aque': —Le'e leche'e na' legwde'e le'e yag corozən' chedə' ca xyan' chaole che', ni to de'e xinj cui cheželda' šə bin' none'.

<sup>7</sup>Na' gwse' beṇə' blao che nasyon Izrael cheton' le': —Segon lei cheto'

de'en de cheyałə' gotchone' chedə' ne' naque' xi'iq̄ Dioz la'anə'əczə' naque' con to beṇəchzə.

<sup>8</sup>Bachžeb Pilatən' ca de'en bachaquən', na' catə' benene' gosə'əne' ca' che Jeso'osən' nachlə bžebəche'. <sup>9</sup>Nach beyo'o Pilatən' len Jeso'osən' de'e yoblə gan' chone' yelə' jostisən'. Na' gože' Jeso'osən': —¿Ga beṇə' le'?

Pero Jeso'osən' bito božile xtiže'enə'.

<sup>10</sup>Nach Pilatən' gože'ene': —¿Ecuí choži'o xtiža'anə'? ¿Ecuí nezdə'onə' nada' napa' yelə' chnabia' par gwsana' le' na' napa' yelə' chnabia' par əgwda' le' le'e yag corozən'?

<sup>11</sup>Jeso'osən' gože'ene': —Bito bi yelə' gwnabia' napo' len nada' žalə' Diozən' cui nonə'en le'. Na' ben' əbde nada' lao na'onə' dolə' xench nape' cle ca le'.

<sup>12</sup>Nach gwdiljlažə' Pilatən' naclə gone' əgwsane'ene'. Pero beṇə' blao che nasyon Izrael cheton' gwsə'osye'e gosə'əne': —Šə əgwsano' bengə, contr Rei Sesar nan' gono' šə ca'. Notə'ətezə beṇə' ne' de que naque' rei, contr Rei Sesarən' chone'.

<sup>13-14</sup>Nach Pilatən' beyož benene' de'en əgwse' beṇə' ca' le', gwleje' Jeso'osən' chy'onə'. Na' lecžə bchoj le' chy'onə' gan' nao yej, gan' nzi'in dižə' ebreo Gabata. Na' gwchi'e gan' chbi'e catə' chone' yelə' jostisən'. Nach gože' beṇə' blao che nasyon Izrael cheton': —Nga zo Rei chelen'.

Na' do gobiž catə'an gože' lega'aque' ca', na' beṇə' Izrael gwlaž cheto' ca' choso'osi'ini'e par lni pascon' žanə'.

<sup>15</sup>Nach lega'aque' gwsə'osye'e gosə'əne': —iGwcue'e! iBde'e le'e yag corozən'!

Na' gož Pilatən' lega'aque': —¿Erei chele nga gona' mendad yoso'ode'ene' le'e yag corozən'? Nach bχoz əblao ca' gwse'ene': —Caguə rei cheto' bengə. Tozə Sesarən' naque' rei cheto'.

<sup>16</sup>Ca' goquən' bdie' Jeso'osən' lao na'aga'aque'enə' par te'e le'e yag corozən'.

**Boso'ode'e Jeso'osən' le'e yag corozən'**

<sup>17</sup>Nach gosə'əche'e Jeso'osən' fuerlə syodan' gan' boso'oda' soldad ca' le' le'e yag corozən'. Latjən' nzi'in Golgota dižə' ebreo, zejen dižə' latjə che yichj beṇə' guat. Na' gwze'e zde' noa' coroz che'enə'. <sup>18</sup>Na' Golgota na' boso'ode'ene' le'e yag corozən'. Na' len yechopə beṇə' yoblə boso'ode'e le'e yechopə yag coroz tgüeje' cuite'enə', Jeso'osən' gwyo'e gwchol.

<sup>19</sup>Na' Pilatən' bene' mendad byoj to chopə letr de'e gwda' yichj yag coroz che Jeso'osən', boso'ozoje'en nan: “Jeso'os beṇə' Nasaret, Rei che beṇə' Izrael.” <sup>20</sup>Boso'ozoje'en dižə' ebreo, dižə' griego na' dižə' latin. Na' zan beṇə' Izrael gwlaž cheton' boso'olabe' de'enə' byojən', chedə' gan' gwda' Jeso'osən' le'e yag corozən' naquən gałə'əzə syodan'.

<sup>21</sup>De'e na'anə' beṇə' ca' zjənaquə bχoz əblao che nasyon Izrael cheton' gwse'e Pilatən': —Bša'an par nič cui nan de que naque' rei che neto' beṇə' Izrael, sino nan de que len' gwne' naque' rei cheto'.

<sup>22</sup>Na' Pilatən' gwne': —De'en bena' mendad boso'ozoje', banyojənnə'.

<sup>23</sup>Nach soldad ca', beyož boso'ode'e Jeo'osən' le'e yag corozən' gosə'əzi'e xalane'e ca' na' gwsə'one'en taplə, to part güejən gosə'əzi'e. Na' leczə ca' gosə'əzi'e xe'enə' de'en naquə ca xadon cha'o. Pero lachə'ənə' naquən de to golizə. Bito bi dia nyazən. <sup>24</sup>Na' gwse'e ljuəzje': —Bito əgwzoxjchon' sino gonchon rif. Yešc no yechelən.

Na' gwsə'one' ca' par niçh goc can' nyoj Xtižə' Diozən' gan' nan: “Yosyo'ole'e xalana'anə' entr lega'aque' na' so'one'en rif.” Na' ca'anə' gwsə'on soldad ca'.

<sup>25</sup>Na' cuit coroz che Jeso'osən' zecha xne'enə' len beṇə' bile'enə' na' len Maria no'ol che Cleofas na' Maria beṇə' Magdala. <sup>26</sup>Na' catə' Jeso'osən' ble'ine' zecha xne'enə' gaḷə'əzə na' nada' zecha' cuite'enə', nach gože'ene': —Naogüe, benga gaque' ca xi'iqo'.

<sup>27</sup>Nach gože' nada': —Bži'ilažə' xna'a nga ca xna'onə'.

Na' lao žanə' nada' gwcua'ane' bena'ane' ca family chia'acza'.

#### Can' goquə catə'ən got Jeso'osən'

<sup>28</sup>Jeso'osən' nezene' de que baçh goc yoguə'əloḷ de'en cheyaḷə' gaquən. Na' par niçh gaquə can' na Xtižə' Diozən' de'enə' nyojən gwne': —Chbilda' nis.

<sup>29</sup>Na' de latə' bino corrient de'e yožə to lo'o xguaguə dao'. Na' to beṇə' bosgaže'e to sponj len bino corrientən' na' bosšine'en cho'a Jeso'osən' bso'en to lao xis de'en ne' isopo. <sup>30</sup>Na' beyož gwxop Jeso'osən' bino corrientən' gwne': —Baçh goc yoguə'əloḷ de'en cheyaḷə' gaquən'.

Na' bchequə' yichje'enə' gote'.

#### To soldadən' gode'e lanz cuit le'e Jeso'osən'

<sup>31</sup>Nach beṇə' blao che nasyon Izrael cheton' gosə'əṇabene' Pilatən' gone' mendad yesə'əyišjw soldad ca' ni'a beṇə' ca' zjəda' le'e yag corozən' niçh yob sa'ate' par niçh ca' yesyə'əque'e lega'aque'. Bito gwse'enene' yesyə'əga'an cuerp ca' le'e yag corozən' xte yeteyo, çhedə' yeteyon' naquən ža dezcanz na' ža lni xen. <sup>32</sup>Nach Pilatən' bene' mendad ja'ac soldad ca' na' gosə'əyišjue' çhopə la'a ni'a ben' boso'ode'e to šla'a cuit Jeso'osən'. Na' leczə ca' gwsə'one' len ben' gwda' le'e yag corozən' cuite'en yešla'a. <sup>33</sup>Na' cata' besə'əžine' gan' da' Jeso'osən', besə'əle'ine' bagote', na' bito gosə'əyišjue' ni'e ca'.

<sup>34</sup>Pero to soldadən' gode'e lanzən' cuit le'e Jeso'osən', na' le'e bchojten chen len nis. <sup>35</sup>Nada' ble'ida' can' goquən' na' nezda' de que dižə' de'en cho'a naquən de'e li. Na' cho'a dižə'ənə' par niçh lenczə le'e šejle'ele. <sup>36</sup>Goc ca' par niçh goc complir can' na Xtižə' Diozən' de'en nyojən gan' nan: “Ni to žit yo'e cui yesə'əyišjue'.” <sup>37</sup>Na' len yeto gan' nan: “Yoso'ogüie' ben' əgwsa'ade'e lanzən'.”

#### Boso'ocuaše'e Jeso'osən'

<sup>38</sup>Na' gwde na' Jwse beṇə' Arimatea gwṇabene' Pilatən' gwnežjue' lsens yeque'e cuerp che Jeso'osən'. Na' Pilatən' be'e lsens. Nach gwyej Jwsen' na' beque'e cuerpən'. Jwsen' naque' disipl che Jeso'osən' pero bgašə'əzə por ni che bžebe' beṇə' blao che

nasyon Izrael c̄heton'. <sup>39</sup>Na' l̄eczə gwyejlen Nicodemon' l̄e' ben' bagwyey antslə gan' zo Jeso'osən' to še'elə. Na' Nicodemon' no'e to de'e chl̄a' zix̄ de'e none' len mirra na' aloes, ca do tapa robən'. <sup>40</sup>Na' bosu'oc̄hele' cuerp̄ che Jeso'osən' sint de lachə' na' len de'en chl̄a' zix̄ən', ca costumbr̄ che neto' beṇə' Izrael catə'ən chcuasə'əto' beṇə' guat. <sup>41</sup>Na' galə'əzə gan' gwso'ote' Jeso'osən' l̄e'e yag corozən' gotə' to güert. Na' lo'o güertən' bazo to bloj ba de'e cobə de'e bagw̄che'en̄ Jwsen' l̄e'e yej ga cuiczə no beṇə' guat ne'e šo'o. <sup>42</sup>Na' bosu'oc̄uasə'e Jeso'osən' lo'o bloj banə' laogüe de'e zon galə'əzə chedə' chsa'ac̄byenene' por ni che de'e naquə yeteyo ža dezcanz na' ža xen che l̄ni pascon'.

### Beban Jeso'osən' ladjo beṇə' guat ca'

**20** Na' bal dmigw Maria beṇə' Magdalan' gwyeye' cho'a bloj ban'. Na' ble'ine' yejən' da' cho'inə' babga'an. <sup>2</sup>Nach beza'adoe' beyede' ga'an zoto' len Simon Bedən', nach gwne' neto': —Babesyə'əbeje' X̄anchon' lo'o ban', na' bito nezecho galə besyə'əyo'ene'.

<sup>3</sup>Nach gwza'ato' len Bedən' gwyejto' cho'a bloj ban'.

<sup>4</sup>Chopteto' gwsa'adoto' pero nada' gwsa'adocha' ca Bedən' na' zgua'atec nada' bžina'. <sup>5</sup>Na' bcheca'a bgüia' lo'o ban' na' ble'ida' lachə' ca' gan' zjəchi'in, pero bito gwyo'a. <sup>6</sup>L̄e'e bla'ate Simon Bedən' na' l̄e' gwyo'e lo'o ban' na' l̄eczə ble'ine' lachə' ca' gan' zjəchi'in.

<sup>7</sup>Na' bey de'en bosyo'oguzje' laogüe'enə' bito lenən lachə' ca'

yel̄a', ndobən chi'in ca'aḷə. <sup>8</sup>Na' l̄a'añə'əczə nadə'əteca' byob bžina', gwdechlə gwyo'a lo'o ban', na' catə' ble'ida' de'e ca' gwyejl̄i'a de que beban Jeso'osən'. <sup>9</sup>La' ca orən' bito ne'e šejni'ito' Xtižə' Diozən' de'lenə' nyojən nan de que yeban Jeso'osən' ladjo beṇə' guat ca'. <sup>10</sup>Na' beza'ato' beyej ližto'.

### Maria beṇə' Magdalan' ble'ine' de que mbanczə Jeso'osən'

<sup>11</sup>Na' Marian' bega'ane' chbeže' cho'a bloj ban'. Na' lao chbeže'lenə' bcheque'e bgüie' lo'inə'. <sup>12</sup>Na' ble'ine' ch̄opə angl zjənyaze' lachə' šyiš zjəchi'e lo'o ban', toe' chi' zda yichjlei na' yetoe' chi' zda xni'alei gan' gotə' cuerp̄ che Jeso'osən'. <sup>13</sup>Nach gwse'e no'olən': —¿Bix̄chen' chbežo' no'olə?

Na' l̄e' boži'en gože' lega'aque': —Chedə' babesyə'əyo'e X̄ana'anə', na' cabi nezdə' galə jəsyə'əsane'ene'.

<sup>14</sup>Ca beyož gwna Marian' ca', gwyechje' bgüie' traslə na' ble'ine' Jeso'osən' zeche' cože'lenə', pero bito beyombia' Marian' l̄e'. <sup>15</sup>Nach gož Jeso'osən' l̄e': —No'olə ¿bix̄chen' chbežo'? ¿Non' cheyiljo'?

Na' Marian' bene' xbab de que ben' chapə güert na'anə', na' gože'ene': —Šə le' babeyo'one'lenə', gwna nada' galə jəyesano'one'lenə' na' nada' yeyo'ane'.

<sup>16</sup>Jeso'osən' gože' l̄e': —Maria.

Na' Marian' gwyechje' de'e yoblə na' gože'ene': —Raboni—, naquən dižə' ebreo na' zejen Maestr.

<sup>17</sup>Jeso'osən' gože' l̄e': —Bito goxo'lo nada', la' bito ne'e yeyepa' ga'an zo X̄a'anə'. Beyej lao disipl̄ chia' ca' yel̄a' beṇə' ca' zjənaquə ca biša'a na' zana'

na' gožga'aque' de que yeyepa' ga'an zo Xa'anə', ben' leczə naque' Xale. Naque' Dioz ben' cho'elaogua'a na' leczə naque' Dioz ben' cho'ela'ole.

<sup>18</sup>Nach beza' Maria beṇə' Magdalan' bedəyedixjue'ine' neto' disipl de que bable'ine' Xanchon'. Na' be'elene' neto' dižə' de'en gož Jeso'osən' le'.

**Disipl che Jeso'osən' besə'əle'ine' de que mbanze'**

<sup>19</sup>Na' ca beṇjw že' ža dmigon' neto' disipl che' nžagto' txen. Na' zjənyeyjw puert ca' por ni che de'en bžebto' beṇə' blaoc che nasyon Izrael cheton'. Catə'əczla gocbe'ito' bazecha Jeso'osən' gwchołto'onə'. Nach gože' neto': —Leso binlo len xbab de'en yo'o lo'o yichjla'ažda'olen'.

<sup>20</sup>Ca beyož gwne' ca' blo'ine' neto' lo'o taque'e ca' na' cuit le'enə'. Na' bebeito' ble'ito' Xanchon'.

<sup>21</sup>Nach goze'e neto' yetš'i'i: —Leso binlo len xbab de'en yo'o lo'o yichjla'ažda'olen'. Can' bsele'ə Xa'anə' nada' yežlyo nga par chona' xšine'enə', ca'aczn' əchsele'a le'e par gonle xšina'anə'.

<sup>22</sup>Beyož gwne' ca' bloble' neto' nach gože' neto': —Le'e si' Spirit che Diozən'. <sup>23</sup>Beṇə' ca' yesyə'ədinje xtolə'əga'aque'enə' nable yelə' chnabia' par ye'ega'aclene' de que bagwnitlaon. Pero beṇə' ca' cui yesyə'ədinje xtolə'əga'aque'enə' nable yelə' chnabia' par ye'ega'aclene' de que bito nitlaon.

**Tomasən' ble'ine' de que mban Jeso'osən'**

<sup>24</sup>Na' Tomas ben' bososi'e Didimo laogüe de'en naque' beṇə'

cuaš, lene' neto' šižinto', pero bito zoe' len neto' catə'ən bedəyelo'elao Jeso'osən'. <sup>25</sup>Na' neto' gožto'one': —Bable'ito' Xanchon'.

Nach Tomasən' gože' neto': —Xte que le'ida' taque'e ca' na' əgwzebə xbenə'anə' gan' gwdebə clab ca', na' əgwzebə na'anə' cuit le'enə', nach šejli'a.

<sup>26</sup>Gozde to xman zezzoto' lo'o yo'onə' de'e yoblə, na' zo Tomasən' len neto'. Na' leczə zjənyeyjw puert ca', catə'əczla bezla' Jeso'osən' na' gozzeche' gwchołto'onə', na' gwne': —Leso binlo len xbab de'en yo'o lo'o yichjla'ažda'olen'.

<sup>27</sup>Nach gože' Tomasən': —Bgüia lo'o taca'a quinga na' bzeb xbenə'onə'. Na' bzeb na'onə' cuit li'a nga par nič šejli'o. Na' cui gaco' to beṇə' cui chejle'.

<sup>28</sup>Nach Tomasən' gože'ene': —Xana', na' Dioz chia'.

<sup>29</sup>Nach gož Jeso'osən' le': —Xte que ble'ido' nada' nach gwyejli'o. Mbalazəch len beṇə' cui yesə'əle'i nada' na' se'ejle'e.

**Libr nga nyojən par nič šejle' beṇə' de que Jeso'osən' naque' Xi'in Dioz**

<sup>30</sup>Na' de'e zan miłagr de'e ben Jeso'osən' gan' zoto'onə' pero bito bzojga'aca'an nga. <sup>31</sup>Pero zjənyoj de'e quinga par nič sotezə sole šejle'e de que Jeso'os na'an Xi'in Diozən' ben' gwlej Diozən' par gaquəlene' beṇəchən', na' par nič gatə' yelə' mban zejlicəne chele laogüe de'en chonlilažə'əlene'.

**Jeso'osən' blo'elaogüe' gažə disipl che' ca'**

**21** Gwde goc de'e ca', Jeso'osən' bozloe' laogüe'



neto' disipl che' yetš'i'li cho'a nisdao' Galilea de'en leczə nzi' Tiberias. Quinga blo'elaogüe' neto':  
 2Txen zoto'onə' Simon Bedən', len Tomasən', na' Natanaelən' na' nada' na' beṇə' biša'a na' yečopə disiplən'. Natanaelən' naque' beṇə' Cana, to yež de'e chi' gan' mbane Galilean'. Na' Tomasən' de'en naque' beṇə' cuaš nachən' boso'osi'ene' Didimo. 3Simon Bedən' gože' neto': —Ša'ayetošca' gw Xen beḷ.

Na' gožto'one': —Lečzə gwza' neto'.

Nach gwza'ato' gweyjtə' cho'a nisda'onə' na' gwyo'oto' to lo'o barcw. Pero že'enə' cuiczə no no bdole'eto'. 4Na' che'eni'ilas bla' Jeso'osən' cho'a nisda'onə' pero na' neto' bito beyombi'ato' šə le'enə'. 5Jeso'osən' gwne' zizjo gože' neto': —Xi'inda'ogua'a čgan beḷ ya'a gaocho?

Na' boži'ito' xtiže'enə' gožto'one': —Notono de.

6Nach gože' neto': —Le'e gwzaḷə' yixjw beḷ chelen' cuit barcon' ličhalə na' əže'leleb.

Nach bzalə'əto' yixjw beḷ čheto'onə' na' xte caguə gwzoito' yecuetə'on lo'o barcon' tant beḷ zan gwža' lo'inə'. 7Nach nada' goža' Bedən': —Xancho na'anə'.

Nach Simon Bedən' cate goža'ane': “Xancho na'anə'”, le'e beyacwte' xalane'enə', la' de'e cho'o lo'olzən' nacue' par nič chone' žinnə', na' le'e bexitə'əte' lao nisən' par nič byob bežine' gan' zo Jeso'osən'. 8Na' neto' zeyo'oto' lo'o barcw da'onə' ze'e zenxobəto' yixjw beḷən' gan' ža' beḷ ya'a ca'. Caguə nactequəch zitə' cho'a nisda'onə', ca do yeto

gweyoa metrən'. 9Na' catə' bežinto' cho'a nisda'onə' beyetjto' lo'o barcon' na' ble'ito' chi' yi' ya'aljən' na' xoa to beḷ ya'a laogüen', na' len yet. 10Jeso'osən' gože' neto': —Le'e yeyoxə' la' beḷ ya'a ca' ze'e gw Xen niḷə.

11Na' Simon Bedən' gweyje' gan' chi' barcon' na' jəyeseže' yixjw beḷən' gan' nchejən. Nach bexobəto'on yo bižlə. Na' ža'an to gweyoa ši'inəyon beḷ Xen. Na' bito gwchezə yixjon' la'aṇə'əczə bia zannə' gwža' lo'inə'. 12Jeso'osən' gože' neto': —Le'e da gaole xsil.

Na' ni toto' cui beyaxjeto' ye'eto'one': “čNo le'?” la' gocbe'ito' de que Xancho na'acžənə'.

13Jeso'osən' bgüigu'e' gwxi'e yetən' na' beṇə' che čheto'. Na' leczə ca' bene' len beḷən'.

14De'e nga beyon las blo'elao Jeso'osən' neto' disipl che' lao bebane' ladjo beṇə' guat ca'.

**Jeso'osən' be'elene' Simon Bedən' dižə'**

15Na' ca bedaoto'onə' Jeso'osən' gože' Simon Bedən': —Simon xi'in Jonas čəchaquəchdo' čhia' can' chsa'aque beṇə' quinga čhia'?

Na' boži'en gože': —Xana' le' nezdə' de que chacda' čhio'.

Jeso'osən' gože' le': —Bsed blo'i beṇə' ca' ze'e gwzolao chso'onliḷažə' nada'.

16Na' de'e əgwchop lase gože'ene': —Simon xi'in Jonas čəchacdo' čhia'?

Na' Bedən' gože'ene': —Xana' le' nezdə' de que chacda' čhio'.

Jeso'osən' gože' le': —Bgüia bye beṇə' ca' chso'onliḷažə' nada'.

17De'e əgwyon lase gože'ene': —Simon xi'in Jonas, čəchacdo' čhia'?



Na' Bedən' gocchgiüneine' de'e  
gože'ene' de'e gwyon lase:

“¿Echacdo' chia'?” Na' gože' le': —  
Xana' le' neze nle'ido' yoguə'əlo'.  
Le' nezdə' de que chacda' chio'.

Jeso'osən' gože' le': —Bsed blo'i  
benə' ca' chso'onlilažə' nada'.

<sup>18</sup>De'e li əchnia' le' catə' goco' benə'  
gięgo' cuino' bochej doxpeyo'onə'  
na' gwejejo' con ga nazən chio'.  
Pero catə' gaco' benə' golə, əgwli  
na'onə' na' benə' yoblə yocheje'  
doxpeyo'onə' na' yesə'əche'e le' ga  
cui che'endo'.

<sup>19</sup>Na' de'en gože'ene' ca' zeje dižə'  
de que Bedən' gone' ca si' Diozən'  
yelə' bala'an ca de'en gaquə Bedən'  
lao na' benə' mal ca' par so'ote'ene'.  
Gwde gwna Jeso'osən' can' gaquə  
che Bedən' nach gože' Bedən': —Da  
len nada'.

**Jeso'osən' goquene' che Juannə'**

<sup>20</sup>Na' beyechj Bedən' ble'ine'  
nada' naogua' lega'aque' na' bene'  
xbab can' chaque Jeso'osən' chia',  
la' nada'an gwchi'a cuit Jeso'osən'

žen' gwdaoto' xše'enə' txen catə'an  
goža'ane': “Xana', inoxaczxən'  
əgwde le' lao na' benə' ca'?” <sup>21</sup>Nach  
Bedən' gože' Jeso'osən': —Xana'  
inac gaquə che bengə?

<sup>22</sup>Jeso'osən' gože' le': —Šə  
che'enda' ne'e zoczə bengə xte  
catə'an yida' yetlas ibixa zedən'  
chaco'? Con gwzotezə gwzo  
benlilažə' nada' na' bzenag chia'.

<sup>23</sup>De'e na'anə' gwditj dižə'anə'  
entr benə' ca' chso'onlilažə' Cristən'  
de que nada' bito gata'. Pero  
Jeso'osən' caguə gože' Bedən' cui  
gata'anə' sino gože'ene': “Šə nada'  
che'enda' ne'e zoczə' xte catə'an  
yida' yetlas ibixa zedən' chaco'?”

<sup>24</sup>Nada'an naca' disiplən' ben'  
goquene' chei na' nezdə' can' goquə  
yoguə' de'e quinga babzoja'. Na'  
lecə' le'e nezczele de que dižə' lin'  
cho'a.

<sup>25</sup>Zanch de'e de de'e ben  
Jeso'osən' de'e cui zjənyoj. Žalə'  
zjənyoj yoguə'an na' tgüejə tgüejən  
libr zan juisy zjəde žalə' ca'.

De'e na'azən' chzoja'.